

# UBUSOBANURO BWA DANIELI



## **AMASHAKIRO**

|                                                                           |    |
|---------------------------------------------------------------------------|----|
| <i>AMASHAKIRO</i> .....                                                   | 2  |
| <i>UBUSOBANURO BW'IGITABO CYA DANIELI INTERURO:</i> .....                 | 4  |
| URUFATIRO RW'IBY'AMATEKA YA DANIELI .....                                 | 4  |
| AMATARIKI YO KWIBUKWA .....                                               | 7  |
| UBUHANUZI BWEREKEYE DANIELI .....                                         | 7  |
| IBYIREGUZO BYACU .....                                                    | 9  |
| <i>IGICE CYA MBERE: IHIRIKWA RY'INGOMA Y'ABAYUDA</i> .....                | 14 |
| Ibyerekeye Amatariki Avugwa mu Gice cya mbere (Danieli 1).....            | 16 |
| IBYIGISHO TWAKURA MURI IKI GICE CYA 1: .....                              | 20 |
| <i>Danieli 2 (IGICE CYA KABIRI)</i> .....                                 | 21 |
| UBUSOBANURO BWIMBITSE .....                                               | 21 |
| IBITWEMEZA KO TUGEZE KU MANO Y'IGISHUSHANYO .....                         | 23 |
| <i>IGICE CYA GATATU: (Mu itanura ry'umuriro)</i> .....                    | 25 |
| BYABAYE RYARI? .....                                                      | 25 |
| KUKI BYABAYEHO? .....                                                     | 25 |
| <i>IGICE CYA KANE: Umwami ajya kurisha hamwe n'inyamaswa</i> .....        | 26 |
| <i>IGICE CYA GATANU: IKIGANZA CYANDIKAGA</i> .....                        | 28 |
| IBYEREKEYE IBIRORI.....                                                   | 28 |
| GUHANGUKA K'UMUTWE W'IZAHABU .....                                        | 29 |
| <i>IGICE CYA GATANDATU: Danieli mu rwobo rw'intare</i> .....              | 31 |
| INTERURO Y'UMUGABANE WA KABIRI .....                                      | 31 |
| IBYEREKEYE AMARENGA N'IBISHUSHANYO BYA GIHANUZI.....                      | 34 |
| IBY'INGENZI BIJYA BIBONEKA HATO NA HATO NI IBI: .....                     | 34 |
| IBIRI MU BICE 7-12 MURI MAKE .....                                        | 35 |
| <i>IGICE CYA 7</i> .....                                                  | 37 |
| TUBISESENGURE NEZA.....                                                   | 39 |
| UWO NI INDE?.....                                                         | 39 |
| YOHANA Nawe YERETSWE IBY'UWO MWAMI: .....                                 | 39 |
| MBESE HARI UBWO ABAKRISTO BONONEKAYE BIGEZE GUTERA ABANDI BAKRISTO? ..... | 39 |
| UKO AKANWA KAVUZE IBIKOMEYE (Dan.7:8).....                                | 42 |
| DORE UKO PAPA YARENGANYIJE ABERA B'ISUMBABYOSE .....                      | 43 |

|                                                                 |    |
|-----------------------------------------------------------------|----|
| AZIGIRA INAMA YO GUHINDURA IBIHE N'AMATEGEKO:.....              | 44 |
| <i>IGICE CYA MUNANI: (Danieli 8)</i> .....                      | 47 |
| UKO RYAMUKUYEHO IGITAMBO GIHORAHO: .....                        | 49 |
| SUZUMA IBI BYANDITSWE BY'IRYO TORERO: .....                     | 50 |
| IGICE CYA CYENDA: URUHEREREKANE RW'IMYAKA 2,300.....            | 52 |
| ICYO NI IGISHUSHANYO CYEREKANA UKO IBYUMWERU 70 BYAGENZE .....  | 54 |
| Iki gishushanyo kirerekana uko imyaka 2300 yagenze.....         | 54 |
| IGICE CYA CUMI: iyerekwa ry'intambara zigeza imperuka.....      | 56 |
| IGICE CYA CUMI NA RIMWE: uko izo intambara zizakurikirana ..... | 57 |
| <i>IGICE CYA CUMI NA KABIRI:AKAZAKURIKIRA INTAMBARA</i> .....   | 67 |


### **UBUSOBANURO BW'IGITABO CYA DANIELI INTERURO:**

1. Igitabo cya Danieli cyahozze ari igitabo kibumbye kitumvikana. Ubuhanuzi bukirimo bwahozze buyobera abasomyi ba BIBILIYA uhereye kera kose. Imana yashatse ko biba bityo. Reba Dan.12:4,9
2. Imana yageneye ubwo buhanuzi abo mu minsi y'imperuka aribo twe.
  - a) Byahanuwe ko Ubwenge bwo gusobanura ubuhanuzi n'Ibihishwe buzagwira mu minsi y'imperuka, abantu bakajarajara hirya no hino mu Byanditswe Byera bashaka ubusobanuro bwabwo.(Dan.12:4)
  - b) Ariko ngo ababi ntibasobanukirwa nabwo. Dan. 12:10. Bigereranye na 1Kor. 2:14.
  - c) Madame WHITE yarabisongeye ati: “ uko turushaho kwegera imperuka niko dukwiriye gushimikira ubuhanuzi bwa DANIELI, abizera baramutse basobanukiwe neza n'Igitabo cya Daniel imitima yabo yahinduka ukundi” ***Abahanuzi n'Abami p 547,.548 na T.M 114.***
3. Isengesho ryacu ribe:
  - a) Kutagira imitima n'ingeso byanduye byatuvutsa ubwenge buhishwe twagenewe.
  - b) Gusaba Imana ngo ibyo tuzajya twumva bidukoreremo, biduhindure ukundi, tube twiteguye guhagarara tudatsinzwe imperuka nigera.

### **URUFATIRO RW'IBY'AMATEKA YA DANIELI**

1. Ibyanditswe muri Danieli byerekeye I Babuloni, aho abayuda babaga bamaze kunyagwa. Byongeye kandi harimo ibitekerezo by'ibihugu bitari bimwe. Kugira ngo twumve iby'icyo gitabo neza tuba dukwiriye:
  - A) Kumenya ikarita ya **PALESTINE,i Buyuda,i YERUSALEMU, ISRAELI, i SAMALIYA, EGIPUTA, NILI, YORODANI, GALIRAYA, AZIA NTO, AZIA NGARI, URI, NINEWE, i BUGIRIKI, ITALIA, ROMA, UBURAYI,ASHULI, MESOPOTAMIYA, BABULONI, EUFURATE, TIGRISI, Inyanja y'umunyu, Inyanja itukura, Ikigobe cya PERSE, MEDITERANE, ARABIA, ARARATI.**
  - B) Kumva neza amateka ya contexte, kuko Danieli ari igitabo cy'amateka: Kirimo imigabane ibiri, umugabane wose urimo ibice 6:
    1. Igice cya 1-6: Ibitekerezo by'amateka uretse icya 2.
    - 2.Igice cya 7-12: Ubuhanuzi ariko bwose bwerekeye amateka y'isi.
2. Ubwami bwa BABULONI bwahanzwe nyuma y'umwuzure wabaye mu mwaka wa1656 isi iremwe.ni ukuvuga mu mwaka w' 2348M.K, Itang 10:9,10 hatubwira ko NIMURODI ariwe wahanze umudugudu w'I Babuloni.

**Dore amasekuruza ye:**



*YAFETI yatuye mu bihugu by'IBURAYI iburengerazuba. Aba SHEMU berekera mu gisiza cya Shinali bagera mu majyepfo ku Nyanja y'ubuhindi, ahitwa URI ari naho ABURAHAMU yavukiye.*

*Bene HAMU bagana i palestina bararomboreza bagera no muri Afrika, ariko si bose. Bamwe bajya i Mesopotamiya. Nibo bubatse umunara w'I Babeli, ariho hahindutse umurwa ukomeye wo mu bwami bwa BABULONI hanyuma.*

**Inkomoko y'amazina: BABELI na BABULONI,**

**-BAB-ILU risobanurwa ngo:** Irembo ry'Imana imwe.

**-BAB-ILON Risobanurwa ngo:** irembo ry'imana nyinshi

3. Bene NOWA bamaze gutatana batyo indimi nyinshi zibabuza kunga ubumwe ngo bagire ubwami bumwe, ahubwo baba mu midugudu myinshi: umudugudu wose wifitiye uwawo mwami. I mesopotamiya

( Babeli na Uri) hari imidugudu ikomeye.

4. Hari amahane n'intambara hagati y'iyo midugudu myinshi n'abami. Reba urugero mu itangiriro 14:1,2. Amaherezo HAMURABI yigaruriye igisiza cyose cy'I shinali, ahahanga ubwami bwa mbere bw'ibabuloni nko mu mwaka w'1850 M.K.
5. Ubwami bwa mbere bwa Babuloni bwagejeje nko mu 1700M.K. bwigarurirwa n'Abahiti( bene Yafeti bari baturutse I Burayi nko mu 2000 M.K) batura muri Azia nto, icyo gihugu cyose barakirangiza, bubaka umurwa wabo ukomeye I BOGAZI-KOYI ( niho hitwa HATTU). Bamaze kwigarurira Azia nto bakomeza kwigarurira ibihugu by'I Palestina bagera no mu Egiputa, bakura abanyegiputa ku ngoma. Ubwo hari mu gihe cya Yosefu. Bagitangira kugera I palestina, bamwe berekera iburasirazuba bagera i Mesopotamiya. Nuko nko mu 1700 M.K bahanga ubwami

bw'abenegihugu. HITITE niryo zina bise abo banyamahanga babateye. Mu Ruheburayo ni GOYIMU, na none risobanurwa AMAHANGA.( Itangiriro 14:1)

6. Kuva 1500 M.K ubwami bwo muri Egipta burakomera. Mu gihe cya Yosefu ibikomangoma byo mu Egipta birahaguruka, byirukana ba banyamahanga bibatwara ubwami bwabo,maze ubwami bwabo buragara. Nibwo himye Farawo utaramenye Yosefu( Kuva 1:8). Abanyegiputa bigarurira Palestina, bageze mu majyaruguru hari Mesopotamiya ariko ho ntibahatsinda. Muri icyo gihe cyo gukomera k'ubwami bwa Egipta, Wibuke ko:

-Mu 1590 M.K Yosefu yatanze.

-Mu 1526 M.K Mose aravuka.

-Mu 1446 M.K Mose akura Abaheburayo mu Egipta.

-Mu 1406 M.K bagera i Kanani.

7. Kuva mu 1700 kugeza 1500 kugeza M.K i Mesopotamiya hakomeje gutegekwa n'Abanyamahanga ( Abahitite, maze hanyuma Abakasite nabo baturutse mu misozi y'I ZAGROSI hateganye n'inyanja y'I KASPIA).
8. Ubwami bw'Abashuli butangira kugara muri 750, (TIGLATI) PALESERI wa III(3) yigarurira i Mesopotamiya n'I palestina. Abami b'I Buyuda n'israeli baba abo kumusorera. Bagejeje ku ngoma SHALMANASERI V, FARAO wo mu Egipta washatse kwikinga umwanzi ubegereye yoshya Hosea, umwami wa Israeli, kugomera Abashuli. Nuko Shalmanaseri agaba ingabo ku murwa wa Samaria barawugota, abawurimo bawuhezemo imyaka 3. Muri 721 M.K umudugudu bawucamo icyuho barawutsinda, Abisraeli bajyanwaho iminyago, babatuza mu bihugu by'Abamedi biri hakurya y'i TIGRISI. Ingoma ihanguka ityo. Shalmanaseri azana abanyashuri abatuza i Samariya, babyarana abana n'Abisraeli bakeya bari baciye ku icumu baba ubwoko bushya bwitwaga ABASAMALIYA, Bakangana n'Abayuda urunuka.
9. Abashuri bakomeza kwigarurira ibihugu by'ikusi ( amajyepfo), batera no mu Egipta, ariko mur'icyo gihe ab'i Babuloni batangira kubutsa umutwe. Nuko Abashuri bunga ubumwe n'Abanyegiputa kugira ngo bakizwe akaga k'ab'i Babuloni. Muri 612 M.K. ab'i Babuloni bakubira hamwe n'Abamedi batsinda Ninewe umurwa mukuru wa Ashuri, maze ubwami bwa kabiri bwa Babuloni bwima ingoma. Umwami NEBOPORAZALI, muri 605M.K aratanga azungurwa n'umuhungu we NEBUKADINEZARI, aba umwami ukomeye cyane yagura ubwami bwe kuruta mbere hose.
10. icyakora Nebukadinezari atarima ingoma ya se, akiri umugaba w'ingabo yateye Palestina yigarurira ibihugu byahozze bitegekwa n'Abashuli. Nibwo DANIELI na bagenzi be b'imfura bajanywe i Babuloni ari iminyago. Nebukadinezari amaze gutera i Buyuda akomeza kugana mu majyepfo agambiriye kwigarurira na Egipta. Agiye kuhatera ubutumwa bumugeraho ko Neboporazali yatanze asubira i Babuloni yima ingoma ya se.
11. Hashize imyaka 19 ubugome bw'Abayuda buranga, Nebukadinezari atera i Yerusalemu arahatsiratsiza ajyana Abayuda hafi ya bose i Babuloni ho iminyago, Ubwami bw'i Buyuda buhanguka ubwo muri 586 M.K.

## **AMATARIKI YO KWIBUKWA**

Mu 2348 M.K : Umwuzure.

Mu 1850-1700 M.K: Ubwami bwa 1 bwa Babuloni.

Mu 1700-1500 M.K: Abahitite bagara.

Mu 1500-1200 M.K: Egiputa yigarurira ibihugu.

Mu 1446M.K : Mose abatura Abaheburayo.

Mu 1406 M.K : Bagera i Kanani.

Muri 750-612M.K : Abashuri bakomera cyane.

Muri 721 M.K : Abashuri bahangura ubwami bwa Israeli.

Muri 612 M.K : I Nenewe hagwa, Neboporazali akomera.

Muri 605 M.K : Nebukadinezari yima ingoma I Babuloni.

Muri 586 M.K : Ab'i Babuloni bahangura ingoma y'i Buyuda.

## **UBUHANUZI BWEREKEYE DANIELI**

1. *Mu ijana rya 19 N.K ubwo inyigisho za EVOLUTIONISME zatangiraga kumvikana, habonetse abantu b'abagenzuzi bagarageza uko bashoboye kose ngo bahinyuze Bibiliya ivuga ko byose byaremwe n'Imana. Ibitabo bibabwiragira cyane ni ibirimo ubuhanuzi, kuko aribyo byerekana ko hariho ufite ububasha bw'indengakamere bwo kumenya iby'ejo, maze bagerageza gushaka impamvu zatuma abantu bakura umutima kuri Bibiliya bagahinyura ubuhanuzi ngo si ubuhanuzi ahubwo ngo byanditswe amategeko amaze kuba.*
2. *Kuko igitabo cya Danieli cyuzuyemo ubuhanuzi kandi batangaje, barakigenzura cyane maze ngo: harimo ibimenyetso bikomeye byinshi bigaragaza ko kitanditswe cyera mu gihe cya Nebukadinezali mu ijana rya 6 M.K. Izo mpamvu batanga ni izi:*
  - a) Igitabo cya Danieli cyanditswe mu buryo bw'umuntu wa gatatu. Iyo Danieli acyandika aba yarabyiyerekejehe( Dan. 5:6).
  - b) Kirimo amagambo y'indimi enye, Kandi uburyo bw'ayo magambo n'indimi butwemeza neza ko kitanditswe mu ijana rya 6, kuko:
    - Uruheburayo rurimo amagambo ya vuba Atari rwa Ruheburayo bavugaga cyera mu myaka 600-500 M.K.

- Kirimo Urunyaramaya rwavugwaga hakurya ya Tigrisi. Iyo Danieli acyandika ntabwo aba yararukoresheje kuko ubwami bwa Babuloni bwari bukomeye mu kinyejana cya 6 M.K. ntibari kuvuganira I bwami imbere ya Nebukadineza mu rurimi rw'abanyamahanga.
- Kirimo amagambo y'Uruperesi n'Urugereki ngo kuko ayo moko yakomeye cyane hanyuma, Daniel ntiyajyaga gukoresha indimi zabo. Noneho ubwo zibonetse muri icyo gitabo biratugararagariza ko cyanditswe ubwami bw'Abamedi n'Abaperei bumaze gukomera.

**c) Byongeye kandi kirimo amakosa muby'amateka yo mu gihe cya Nebukadineza:**

- 1- Dan 1:1 havuga ko Nebukadineza yari umwami ubwo yateraga i Yerusalemu. Nyamara tuzi ko Atari umwami, ko yari igikomangoma n'umugaba w'ingabo.
- 2- Dan. 1:1 ngo byabaye mu mwaka wa gatatu wo ku ngoma ya YEHOYAKIMU ari ku ngoma. Nyamara Yer. 25:1 ngo ni mumwaka wa kane.
- 3- Dan4:20-22, 30 havuga ko nebukadineza yari umwami ukomeye cyane, wagize cyane umuhati wo kongera umurwa we mu isi. Twebwe tuzi ko atigeze akomera kandi si nawe wubakaga cyane i Babuloni, ahubwo ni SEMIRAMISI.
- 4- Dan.5: havuga ko Abamedi n'Abaperesi bahanguye ingoma y'i Babuloni Berushazali ariwe uri ku ngoma. Ariko amasekuruza y'abami b' I Babuloni n'amateka yabo uko byanditswe n'abanyamateka b'Abagiriki ba kera avuga ko umwami uheruka w'i Babuloni yari Nabonidusi. Ndetse iryo zina ngo Berushazali ntiriyegize rivugwa na rimwe muri ayo mateka.
- 5- Kubw'ibyo byose abahinyuzi ngo iyaba Danieli ariwe wanditse icyo gitabo ntiyari gufudika atyo ku bigaragara cyane. Tuzi noneho ko igitabo cya Danieli cyanditswe nyuma cyane nko mu 168M.K, Ubwo abayuda bari mu kaga k'intambara yabayeho hagati y'Abamakabe.

Intandaro yayo ngiyi: ALEXANDRE mukuru, umwami ukomeye cyane watumye ubwami bw' Abagiriki bugara cyane bumaze gusimbura ubw'Abamedi n'Abaperesi; amaze gutanga ubwami bwe bwigabanyamo kane, butwarwa n'abagaba b'ingabo be bane aribo: *Seleukusi, Lysimakusi, Pitolemi na Kasanderi*. Seleukusi yatwaraga mu Basiriya (Palestina ya ruguru). Uwo yazunguwe n'abandi maze bigejeje kuwa 8 *Antiokusi Epifanusi*, uwo ashegera ubwoko bwe byasaze, ashaka ko bese bahuza idini n'imigenzo bya Kigiriki, abatega kureka gukebwa, kwirengagiza Isabato, kujya barya ingurube no gusenga ibigirwamana by'abagiriki. Maze bamwe banze kudohoka atuma abasirikare ngo bahumanye urusengero (ubuturo bwera) rw'i Yerusalemu ku ngufu babuze n'ibitambo bya buri muni. Bagiye gutamba ingurube ku gicaniro cyo mu Buturo Bwera, MATATIASI arabahagurukira akoresheje imbaraga, hashize imyaka 3 Abayuda batsinda abasiriya beza ubuturo bwera basubizaho ibitambo. Uwo muni wabaye umuni mukuru cyane n'ubu abayuda baracyawukomeza Reba uko uvugwa muri Yoh.10:22.

***Ba bahinyuzi bavuga ko igitabo cya Danieli cyahimbwe n'umuyuda nko mu 168 M.K ubwo iyo ntambara yateraga i Buyuda batareza ubuturo Bwera. Ngo impamvu zo kugihimba muri icyo gihe no kubeshya ngo cyanditswe kera ni izi:***

- a) Gushaka uburyo bwo kubarema agatima ngo bashikamire mu kaga nka'aka Danieli na bagenzi be, ntibimure Imana naho akarengane kazabageza kure.

- b) Gushaka kubaha ibyiringiro ko bazatsinda Antiokusi Epifanusi, ngo iby'icyo gihe barimo byahanuwe kera cyane kandi ubwo buhanuzi buhamya ko amaherezo azaba meza:
- 1- Ihembe rito ryo muri Dan. 7.8,24,25 na 8:11,12 ni Antiokusi Epifanusi,
  - 2- Guhumanya ubuturo Bwera no gukuraho ibitambo by'iteka byahanuwe muri Dan.8:11.
  - 3- Ariko ngo amaherezo buzasubizwaho n'ubuturo buzezwa (Dan.8:13,14)

## **IBYIREGUZO BYACU**

1. **Ku kirego cya mbere:** ngo cyanditswe mu buryo bw'umuntu wa gatatu.

- A. Ibice bya mbere bya bindi 6 nibyo byanditse mu buryo bw'umuntu wa 3, ibisigaye uko ari 6 byanditse mu buryo bw'umuntu wa mbere ( reba Dan. 10 :7 uko abyiyerekezaho).
- B. Akamenyero k'abanditsi bo muri Bibiliya ni ako kutihimbaza bivuga nka MOSE ( kuva 2: 11,14,21, Gutegeka. 1:1). Na Yohana wiyise umwigishwa Yesu yakundaga, aho kwivuga, yabivuze mu buryo bw'umuntu wa (Yoh.13:23) ubutumwa bwanditswe nawe.

2. **Ku kirego cya kabiri:** Ngo uruheburayo ni urwa vuba si urwavugwaga mu ikinyejana cya 6.

Ibindi bitabo byo mu isezerano rya kera byose niko bimeze. icyabiteye ni uko impapuro abahanuzi banditse mbere na mbere zasazaga abandi bakabyandikura, maze amagambo yakera atagikora bakayasimbuza amashyashya yumvikana mu gihe cyabo. Izo mpapuro nazo zasaza abandi bakabyandukura bityo bityo na none bagasimbuza Uruheburayo rwa kera urwo mu gihe cyabo.

3. **Ku kirego cya gatanu:** iyo Danieli acyandika ntaba yarakoresheje urunyaramaya rw'abanyamahanga bari hakurya i Tigrisi.

- A. Ubumenyi bw'abacukura mu matongo (ARCHEOLOGIE) buhinyuza icyo kirego, kuko injy n'amabehe biriho imanzi z'inyandiko ya kera n'inzibutso z'amabuye abakera bakorogoshoyeho, ibyo byose bitwereka ko Urunyaramaya rwari ururimi rw'akarande kera. Abanyaramaya bari abacuruzi cyane bigatuma bazerera cyane; kandi ururimi rwabo rwari rworoshye bituma ruba gikwira.
- B. Ibyanditswe ku nzibutso n'ibishushanyo byo muri Azia nto, byakozwe kera nko muri 800 M.K biri mu Runyaramaya.
- C. Muri Mezopotamiya no muri Ashuri habonetse inzandiko z'ubucuruzi zanditswe ku mabaho n'ibipimo by'uburemere byahozeho uherye muri 800-500 M.K byanditsweho Urunyaramaya.

- D. Ndetse no mu Egipta habonetse ibizungu bigaragaza ko Urunyamaya rwahavugwaga naho uhariye muri 500-400 M.K.
- E. Kuri izo mpamvu si igutangaza kugirango ab'ibwami babwire umwami mu Runyamaya arirwo Rusiliya ruvugwa muri Dan.2:4. Ahubwo Urunyamaya nirwo rwavugwaga ahagutse cyane mu ijana rya 6 M.K.

**4. Ku kirego cya kane: Ngo kirimo Uruperesi n' Urugiriki rwavugwaga hanyuma cyane.**

- A. Kirimo amagambo 17 gusa y'uruperesi. Twibuke ko abaperesi bigaruriye Babuloni mu gihe cya Danieli, kandi si ugushidikanya ururimi rwabo rwari rwaratangiye kumvikana i Babuloni batarahindura ubwo Abaperesi batangiraga kuza mu gihugu cy'i Mezopotamiya buhoro buhoro, hamwe n'abatasi babo.
- B. Amagambo y'urugiriki ni 3 gusa. Nayo yose ni amazina y'ibicurangwa bivugwa muri Dan.3:5. Abagiriki bari abaririmbyi cyane kandi bagakunda ibishushanyo bibajwe( arts). Si ugushidikanya ubwo ab' i Babuloni batumizaga ibicurangisho by'abagiriki bakomeje kubyita amazina yabyo mu Kigiriki, kubera ko batari babifite batarabibonana abagiriki.

**5. Kukirego cya gatanu: ngo kirimo amafuti menshi y'iby'amateka, Dan.1:1 havuga ko umwami Nebukadineza yanyaze i Yerusalemu. Nyamara ntiyari umwami ahubwo yari umugaba w'ingabo. Ni koko. Nyamara iyo umuntu amaze guhabwa isumbwe n'icyubahiro, benshi cyane tumuvuga dukoresheje izina ry'isumbwe n'icyubahiro.Tuba tuvuga ibyo yakoraga atararihabwa. Tuzi ko Nebukadineza yari amaze kwima ingoma ubwo Danieli yandikaga igitabo cye.**

**6. Ku kirego cya gatandatu: Ngo Dan.1:1 na Yer 25: haravuguruzanya ku matariki.**

- A. Ntabwo havuguruzanya, ahubwo ubwo Nebukadineza yateraga Yerusalemu hari ku ngoma ya Yehoyakimu mu mwaka wa 3 koko. icyo gihe Nebukadineza yari atarima ingoma.
- B. Mu mwaka ukurikiraho wo ku ngoma ya Yehoyakimu niho yimitswe amaze guhururira iwabo, aba ariho ahabwa rya sumbwe n'icyubahiro. Hari mu mwaka wa kane koko.

**7. Ku kirego cya karindwi: Ngo Nebukadineza ntiyari umwami ukomeye nkuko muri Danieli habivugwa, kandi siwe waguye i Babuloni, ahubwo ni Semiramisi.**

Ubuhamya bwinshi bumaze kuboneka mu matongo, butwemeza nta shiti ko Nebukadineza yari umwami ukomeye waguye ubwami bwe bitangaje. Hari amatafari menshi cyane mu matongo y'i Babuloni ariho imanzi ze. Abacukuzi bo mu matongo( Archeologues) bamaze gusuzuma amatongo yaho, basanze umurwa w'I Babuloni wari ufite umuzenguruko wa km 4 ubwo Nebukadineza yimikwaga, arawagura ageza ubwo umuzenguruko ureshya na km 64.

-Inkike zawo zari zifite umubyimba wa m 8.

- Yazubatseho iminara miremire yo kurinda umurwa m 250.

Umwamikazi yari umumedi-kazi wakumburaga imisozi y'iwabo, maze amuremera imisozi miremire mu mumudugudu hagati ateraho ibiti n'umurima w'indabyo. Mu mateka y'isi ya kera iyo misozi yo muri Babuloni yabagarwa ko ari kimwe mu bitangaza 7 bihebuje byo mu Isi yose. Ntawe uhakana ko Nebukadinezari yari umugabo w'umwubatsi w'igitangaza. Amabehe bavumbuye muri Mesopotamiya araduhamiriza ko Semiramisi atigeze ateguka i Babuloni. Ntiyari n'uwo i Babuloni ahubwo yari umugabe-kazi w'Abashuri.

8. **Ku kirego cya Munani**: Ngo Berushazali si we wari ku ngoma ubwo Babuloni yahangurwaga n'Abamedi-Peresi. Umwami uheruka ni Nabonidusi, nta na rimwe izina Berushazali riboneka mu masekuruza y'abami b'i Babuloni uko twayahawe n'abanyamateka b'Abagiriki ba kera ni ibihimbano, ntiyigeze abaho.

- A. Mu 1861 N.K umucukuzi witwa TALBOT yatangaje mu igazeti ko mu matongo y'urusengero rw'i Babuloni basengeragamo ukwezi, yavumbuyemo amabehe ariho inyandiko. Kuri rimwe hariho isengesho ry'uwiswe Nabonidusi asabira umuhungu we BEL-SHAR-UTSURI.
- B. Mu 1862 N.K urundi rwandiko ruravumburwa ruvuga uburyo i Babuloni hanyazwe n' Abamedi. Ngo muri icyo gihe umwami Nabonidusi ntiyari ahari, yari mu kiruhuko ahitwa TEMA ahamara imyaka ariko ngo umuhungu we asigara i Babuloni. Ngo niwe wari uhari ubwo haterwaga n'Abamedi.
- C. Mu 1916 N.K bavumbuye na none urundi rubihamya. Birumvikana ko Berushazali ariwe wasigariye se Nabonidusi i Babuloni ubwo Abamedi bahanyagaga. Ariko ayo mateka yibagiranye i Babuloni hamaze kugwa.

Iyo igitabo cya Danieli cyandikwa mu gihe cy'Abamakabe,nticyari kuvuga ko umwami uheruka ari Berushazali. Ariko ubwo kivuga ko ari we, ntikivuge Nabonidusi, ni ibimenyetso bikomeye bitwereka ko icyo gitabo cyanditswe ayo mateka ataribagirana. Kandi amagambo ya Dan. 5:7 asigaye yumvikana neza. Umutware wa mbere uvugwa ni Nabonadusi, Uwa kabiri ni umuhungu we Berushazali. Uwajyaga gusobanura inyandiko ye ku rusika niwe wajyaga kuba umwami wa gatatu mu bwami bw' i Babuloni.

***IBINDI BIDUHAMIRIZA KO IGITABO CYA DANIELI CYANDITSWE MBERE Y'IJANA RYA KABIRI M.K***

- 1. Hari ibitabo 16 byitwa Apocripha byanditswe hagati y'amasezerano yombi. Bimwe birimo ibihimbano bivuga ibyabaye mu gihe cya Danieli nk'aho ababihimbye bari bahari.

Urugero: indirimbo y'abana bera batatu(3), ngo ni amagambo bagenzi ba Danieli 3 baririmbye bari mu itanura. Abayuda banze kwemera ibyo bitabo ngo bidahwanya icyubahiro n'ibindi 39 byo mu isezerano rya kera kubera izi mpamvu:

- A. Bigaragara ko bimwe ari ibihimbano byahimbwe mbere cyane.
- B. Nyuma ya Malaki yanditse igitabo cye nko muri 444 M.K ntawundi muhanuzi wakurikiyeho keretse hashize imyaka 400 mu gihe cya Yohana Umubatiza.

Umunyamateka w'umuyuda wa Kera yanditse ko Abayuda bamaze kubona abahanuzi bashizeho bakoranye Ibyanditswe Byera byari bimaze kwandikwa, babikubira mu gitabo kimwe.

Ibyo byanditswe n'Imana tubyita CANON. Iyo Canon bayifunze ari ku ngoma ya ARUTAZERUSI wimye ingoma y' Abaperesi mu ijana rya 5 hagati M.K. Nuko bya bindi bya Apocripa bimaze kuboneka ntibyemerwa kuko Canon yari yamaze gufungwa kandi ntawazunguye Malaki. Igitabo cya Danieli cyo cyari muri CANON.

- 2. Igitabo cya Danieli cyahoze ari igitabo cyubahwa uhereye kera kose kandi na Danieli yari ikirangirire uhereye kera:

Ezekieli yabayeho ubwo Nebukadineza yari ku Ngoma yari amuzi ( Ezek: 14:14,19,20;28:3). N'umwami w'i Tiro yari amuzi, nicyo cyatumye Ezekieli abona uko amugereranya na Danieli, amwandikira.

Abayuda babagaho hagati y'amasezerano yombi baramwubahaga cyane bamubariraga hamwe n'abahanuzi babo 48. Ibitabo byinshi bandikaga bivuga ibya Danieli. Na Yesu yavuze ko Danieli ari umuhanuzi ukwiriye kwitabwaho (Mat 24:15, 16).

Yesu amaze gusubira mu ijuru, abanditsi b'isezerano Rishya baramwubahaga. Ndetse mu isezerano Rishya harimo imirongo 32 itondagura amagambo yo muri Danieli. Nta na rimwe Yesu yigeze asesereza ku magambo yo muri Apocripa.

- 3. Igitabo cya Danieli kirimo amagambo 15 y'Uranyakadi. Ni rwo rwakomotse ku mudugudu wahanzwe nyuma y' umunara w'i Babeli na Nimurodi (Itang.10:10) urwo rurimi rwakera rwose rwari rumaze guhenebera mu gihe cya Nebukadineza, hari hakiriho abantu bakeya gusa baruvuga. Bigeze ku ngoma y'Abaperesi rushiraho. Abo mu gihe cy'Abamakabe ntibari baruzi. Niba igitabo cya Danieli cyaranditswe mu gihe cy'Abamakabe se umwanditsi yari kurubwirwa n'iki ko yakoresheje amagambo yo muri rwo?

- 4. Yosefu yanditse iki gitekerezo mu gitabo cye cy'amateka kerekeye Alexandre, umwami w'abagiriki mu mwaka wa 322 M.K ariwo mwaka Alexandre yahanguye ubwami bw'Abaperesi ubwo yateraga umudugudu w' i Tiro. Akiwugota yatumye ku bakuru b'i Yerusalemu ngo bamutwerere ingabo n'intwari. Umutambyi mukuru wategukaga i Yerusalemu arazimwima kubw'isezerano ryo kugandukira umwami Dario bari barasezeranye. Umwami Alexandre abonye icyo gisubizo

azabiranywa n'uburakari, amaze gutsinda i Tiro agana I Yerusalemu ngo abibahore. Umutambyi abiburirwa mu nzozi, maze ateguka abatambyi bose kwambara imyenda yera de bakajya gusanganira Alexandre. Abibonye atyo yikubita imbere yabo ababwira uburyo nawe yarose inzosi akiri iwabo mu Bugiriki: ngo muri izo nzozi yabonye umutwe w'abantu bambaye ibishura byera baje kumusanganira.

Nuko ya migambi yo kuharimbura ayidohokaho ajyana n' Abatambyi mu mudugudu atamba igitambo, maze umutambyi mukuru amwerekera mu gitabo cya Danieli ubuhanuzi bumwerekeyeho (Dan 8:21) wibuke ko ibyo byabaye muri 332 M.K.

*Abahinyura igitabo cya Danieli ngo ntibishoboka ko umuntu yahanura ibitangaza uko biri muri icyo gitabo bigasohora! Ahubwo bakavuga ko byanditswe nyuma ayo mateka amaze kubaho.*

### ***Igisubizo:***

Niyo abantu bakwemeza ko igitabo cya Danieli cyanditswe mu 168 M.K harimo ubuhanuzi bwinshi bwari butarasohora muri icyo gihe bwashoye nyuma. Danieli yahanuye ibya Messia avuga umwaka azatangiriramo umurimo we n'umwaka azatangamo n'uwo ubutumwa buzatangira kubwirizwa mu banyamahanga. Ko ibyo byashoye se uhereye muri 27 N.K, si ubuhanuzi?

### **Indunduro:**

Nta mpamvu ihari yatuma tutizera ko Danieli arri igitabo cyanditswe kera mu ijana rya 6 M.K. Impamvu zose Abahinyuzi batanga iyo tuzigenzuye, aho kudushidikanyisha, zirushaho kutwemeza ko igitabo cya Danieli ari ijambo ry'Imana bwite.

\*\*\*\*\*

\*\*\*\*\*

\*\*\*\*\*

\*\*\*\*\*

## IGICE CYA MBERE: IHIRIKWA RY'INGOMA Y'ABAYUDA

### AMAKURU Y'INCAMUGONGO

- I. Imana yahaye Abaheburayo i Kanaani ho gakondo y'iteka ryose, yashatse ko i Yerusalemu hazahoraho iteka ryose, kandi ko Abaheburayo bazahinduka ubwoko bukomeye cyane mu isi yose. Reba amasomo abihamya:
- a) Guteg. 4:6: Abanyamahanga bajyaga gutangarira Abaheburayo.
  - b) Guteg. 28: Uwiteka Imana yawe izagusumbisha amahanga yose yo mu isi. Itang. 12: 2 ngo nzaguhindura ubwoko bukomeye.
  - c) Guteg. 28: 11-13 Imana yabageneye kuzagwiza ubutunzi: Uwiteka azaguhindura umutwe ntazaguhindura umurizo. Uzaba hejuru gusa ntuzaba hasi.
  - d) Yes. 45:14: Abanyegiputa n'abandi bari kuzakeza Abaheburayo.
  - e) Yes. 19: 18-22 Imana yashatse ko Abaheburayo bazihanisha Abanyegiputa.
  - f) Yes. 60:12 Ubwami n'ishaynga bitazemera kugukorera bizashiraho. Ayo magambo yabwirwaga Abaheburayo.
  - g) Zek.12:2,3,8,9 Imana yavuze ko i Yerusalemu hazahungabanya amahanga yose ashaka kuhatera iti: “ uwo munsu nzashaka kurimbura amahanga yose yateye i Yerusalemu”. Zek.14:16 ngo:” uzarokoka mu mahanga yose yateye i Yerusalemu azajya azamuka uko umwaka utashye aje gusenga Umwami Uwiteka Nyir'ingabo”.
  - h) Yer.17:25 ngo:” Uyu murwa Yerusalemu uzahoraho iteka”.
  - i) Yoweli 3:19,20 hati:” I Buyuda hazahoraho iteka n'i Yerusalemu ibihe byose”.

- II. Tumaze kugereranya ayo magambo y'igitangaza na Dan.1:1,2 turibaza tuti: “ni iki cyatumye Imana yemera ko umwami w'umupagani atera mu gihugu cy'Abayuda kandi yarashatse ko bazahora hejuru gusa, atari hasi”?

**IGISUBIZO: Yer.18:6-10: uherye kera kose amaherezo yo kwimura Imana yabaye kunyagwa.**

Adamu na Eva banyazwe ingobyi ya Edeni bigomwa ubugingo buhoraho kubwo kwimura Imana bakimika inzoka. Mu 2348 M.K abo mu gihe cya NOWA bazize kwimura Imana.

Nyuma y'umwuzure abantu bamaze kuyimura na none yitoraniriza **Aburahamu** ngo ayibere umugabo wo kuyihamya, imukura i Mesopotamiya imujyana i Kanani ho mu mahuriro y'inziira ziva i Burayi no muri Aziya no muri Afurika, ngo amenyekanishe iby'Imana y'ukuri. Mu mwaka wa 1951 M.K, Abanyakanani banga kureka imigenzo yabo ya kabutindi. Imana niko kujyana bene Aburahamu mu Egipta, ba bandi birindirije kuzahanirwa ibyaha byabo biramutse birenze urukiriro. Abaheburayo bageze mu Egipta bananirwa no kwihanisha Abanyegiputa bafatanyiriza hamwe nabo gukurikiza imigenzo yabo ya gipagani. Imana ntiyaherako ibibahora, ahubwo ikomeza kubiringira, niko kubakura mu Egipta ituma bamara umwaka muzima i Sinayi ishaka kubahwitura no kubihanisha. Muri uwo mwaka wa 1446 M.K ibaha guhitamo bakiri Sinayi ibaburira uko bizamera nibasubira mu nzira zo kuyimura. Soma witonze Lewi 26:3-5, 14-16, 27, 31-33, wite ku buhanuzi buvuga ko ingaruka yo kwimura Imana ari:

**-Ukurya inyama z'abana babo**

**-Guhinduka amatongo n'imisaka kw'imidugudu yabo -Kunyagwa ubwabo no gutatanira mu mahanga.**

Bavuye i Sinayi bagiye kwinjira i Kanani ( 1446 M.K) barabyirengagiza baragoma, Imana ntiyabasiga aho, ahubwo ibaheza mu butayu imyaka 40 yifuza kubihanisha. Iyo myaka ishize mu 1406 M.K bageze kuri Yorodani, bakiri hakurya y'i Yeriko Mose abasezeraho, yongera kubaburira no kubaha guhitamo, abibutsa ko nibaramuka bimuye Imana amaherezo yabo ari ukunyagwa bakajyanwa mu mahanga. Guteg. 28:25,64.

Bamaze kubaka urusengero ku ngoma ya Salomo muri 940 M.K Imana yongera kubahwitura ibibutsa imigisha cyangwa imivumo biri imbere yabo (1 Abami: 9:6-8). Ariko bitereye Agati mu ryinyo, Salomo atanze ubupolitike buratangira ubwami bwigabanyamo kabiri:

-Imiryango 10 iba ubwami bw'Abisraeli baherera mu ruhande rwa ruguru, umurwa mukuru ukaba SAMARIYA.

-Indi miryango 2 ihanga ubwami bw'i Buyuda, baherera mu majyepfo. umudugudu wabo mukuru uba YERUSALEMU.

Abaheburayo bose bakomeza gusaya mu byaha, ariko Abisraeli bo barashayisha, Imana ibatumaho abahanuzi benshi ibabwira ko amaherezo yabo ari ukunyagwa nibatihana (1 Abami 14:15) ngo bazajyanwaho iminyago bahere mu gihugu kiri hakurya ya UFURATE, ntibabyitaho. Nuko mu mwaka wa 721 M.K Abashuri barabatera, babajyana mu Bamedi (2 Abami 17:6, 7) ibyabo ntibyongera kumvikana ukundi, baherayo. Imana yashatse ko Abayuda bakurikiza icyigisho bakihana, binangira imitima, Imana ibatumaho abahanuzi batari bamwe. Wibuke ko Yesaya yahanuye ibya bene Hezekiya (2 Abami 20:12-20). Yeremiya nawe yarabisongeye (17:24-25) baranga barabyirengagiza.

Muri 605M.K Nebukadineza atera i Yerusaremu asaka urusengero ajyana abasore b'imfura (aribo bene Hezekiya) ho iminyago. Yehoyakimu asigara ku ngoma (Yer 25:8, 9) bakomeza kugoma, hashize imyaka umunani Nebukadineza akura Yehoyakimu ku Ngoma amusimbuza YEHOYAKINA, nabwo ntibyagira kivurira. Hashize imyaka 3 Nebukadineza yongera kubatera ajyana ab'i Yerusalemu hafi ya bose i Babuloni, asiga Matani se wabo wa Yehoyakina ku ngoma, nawe amaze kumusezeranira ko atazagomesha abantu. Nuko Nebukadineza **amuhindurira izina amwita Zedekia (ngo Yehova arakiranuka) ngo rihore rimwibutsa ya ndahiro ye** (2 Abami 24:12-14, 17) ariko nawe abura umutima (2 Abami 24:19), Ezekeili amuburira yeruye ariko ntiyabyumva (Ezek. 12:13) Amaze imyaka 11 ari ku ngoma birananirana, maze muri 586 M.K Nebukadineza atera i Yerusalemu ubwa gatatu arahazimagiza rwose, ahangura ubwami bw'Abayuda (2 Abami 25:8-15) soma witonze Yeremiya 44: 2-6.

#### **INDUNDURO:**

Bibiliya itubwira ko icyatumye ibyo byago bigera ku Baheburayo ari uko:

- a. Banze kwitandukanya n'ingeso za gipagani zose bamaramaje (Yer 25:5-11; 2 Ngoma 36:14).
- b. Banze gukomeza Isabato uko bikwiriye (Yer.17:19-27)
- c. Banze kwita ku Bahanuzi Imana yabatumye (2 Ngoma 36:15-20; Yer 25:3-11).
- d. Abami babo nibo bashayishaga mu bibi, bakababera ikitegererezo kibi.

***Ibyigisho by'inkoramutima twakwigira kuri ibyo (1 Kor. 10:11)***

- A. Kwanga gucika ku ngeso za gipagane aho ziva zikagera, amaherezo yacu azaba kimwe n'ay' Abayuda. Tuzaba twivukije amahirwe yo kuzibera mu gihugu cyasezeranyijwe.
- B. Abanga gukomeza isabato y'Imana babyitumye amaherezo yabo bazabona ingaruka nk'iz' Abayuda.
- C. Kutumvira ni inkomoko y'amakuba yose. Utumviye se na nyina yumvira ijeri. Tumenye ko icyaha kizadukoraho.
- D. Nk'uko abami b'Abayuda babereye ingabo zabo amendeze yo kurimbuka, niko n'abayobozi bo mu itorero kuri ubu bashobora kwandurisha abakristo babo ingeso mbi. Uyobora abandi burya aba ari mu kaga kuko uretse no kubazwa ibye gusa, azabazwa n'iby'abandi bamwigiyeho. N'ubundi ngo:”**uwiba ahetse aba yigisha uwo mu mugongo**”.

***Icyatumye Imana yemera ko abayuda bajyanwa i Babuloni:***

- Kubabera igihano gituma bihwitura (2 Abami 25:8-15)
- Kubabera amendeze yo kumenyekanisha Imana mubatayizi.(Ezek. 12:16). Igitabo cya Danieli ni igitekerezo cy'uburyo *abasore bagerageje mu ruhande rwabo gusohozwa imigambi y'Imana.*


***Ibyerekeye Amatariki Avugwa mu Gice cya mbere (Danieli 1)***

Dan.1:1 Mu mwaka wa 3 wo ku ngoma ya Yehoyakimu uwo mwaka ni uwuhe?

Dore uburyo tubimenya:

1. Tugereranya za Lisiti z'Abastronotes (abagenzuzi b'ibyo mu kirere) n'ibyanditswe byavumbuwe mu matongo y'i Babuloni. Izo lisiti z'abastronotes zitubwira ibihe ukwezi kwagiye kwijima mu myaka yashize uherye ku kuremwa kw'isi (kandi uko kwijima k'ukwezi kugira gahunda idahinduka). Kuri izo lisiti bigaragara ko kwijimye kuri 22/4/621 M.K. ubwo bumenyi bubangikanye n'ubwanditswe ku ibebe bavumbuye. Iryo behe rivuga ko ukwezi kwijimye mu mwaka wa 5 wa Neboporazali se wa Nebukadineza. Ibyo tubibangikanyije n'iyi tariki tumaze kuvuga, biragaragara ko hari mu mwaka wa 621 M.K. Tuzi ko Neboporazali yategetse imyaka 21 yose hamwe. Nuko rero ubwo ukwezi kwijimaga hari mu mwaka wa 5, ni ukuvuga ko hashize imyaka 16 akazungurwa n'umuhungu we Nebukadineza.

2. Ku rindi behe bavumbuye rivuga ko ukwezi kwijimye na none mu mwaka wa 37 wa Nebukadineza. za lisiti z'Abastronotes zivuga ko ukwezi kwijimye tariki 4/7/668 M.K na none birahura.
3. Tubugereranye n'ibyo Yosefusi yanditse mu gitabo cye cy'amateka yakera, atondagura amagambo y'umunyamateka witwaga Berosi ati:” Nebukadineza yatumwe na se gutera i Palestina no mu Egipta atsinda Palestina mu mwaka se yatanzemo,ariwo Nebukadineza yimye ingoma. Kubwo gukurikiza iby'Abastronotes n'ibyanditswe ku mabehe, tumaze kumenya ko hari mu mwaka wa 605 M.K. noneho Berosi yongeraho ko muri uwo mwaka ariho Nebukadineza yimye amaze gutsinda Palestina. Ibyo ni ukuvuga ko umwaka wa gatatu wok u ngoma ya Yehoyakimu nawo wari 605 M.K.
4. Uwo mwaka wa 605 twufasheho urufatiro, dusobanukirwa n'indi myaka yo muri Bibiliya yerekeye ingoma ya NEBUKADINEZA.
  - a. 2 Ngoma 36:5 ngo Yehoyakimu yimye imyaka 11.
  - b. Dan, 1:1 Nebukadineza yamuteye amaze imyaka itatu ku ngoma ni ukuvuga ko yari asigaje imyaka 8 ku ngoma.
  - c. 2 Abami 24: 12 harabyemeza neza ngo Nebukadineza yateye i Buyuda muri 605 M.K +8= 597 M.K
  - d. Muri uwo mwaka wa 597 M.K Nebukadineza yakuye Yehoyakimu ku ngoma amusimbuza Yehoyakina.
  - e. 2 Ngoma 36:9 ngo Yehoyakina yimye amezi 3 gusa n'iminsi icumi. Ubwo hari muri uwo mwaka nanone, Nebukadineza amusimbuza Zedekiya.
  - f. 2 Ngoma 36:11 ngo Zedekiya yimye imyaka 11 (597 M.K.+11=586 M.K.)



#### **Indunduro y'amatariki y'ingenzi 4004**

**M.K:** Kuremwa kw'isi.

**2348 M.K:** Umwuzure.

**1951 M.K:** Kuvuka kwa Aburahamu.

**1876 M.K:** Yimukira i Kanani.

**1661 M.K:** Yakobo mu Egipta.

**1446 M.K:** Mose akura Abisraeli muri Egipta.

**1406 M.K:** Bagera i Kanani.

**1050 M.K:** Bahanga ubwami.

**931 M.K:** Bigabanyamo kabiri.

**721 M.K:** Abashuri bahangura Abisraeli.

**625 M.K:** Nebopalazali yima i Babuloni ategeekera Abashuri.

**605 M.K:** Nebukadineza atera i Yerusalemu yima ingoma y'i Babuloni.

**597 M.K:** I Yesalemu haterwa ubwa kabiri n'ab' I Babuloni Yehoyakina yima.


**586 M.K:** Nebukadineza atsiratsiza i Yerusalemu.

**457 M.K:** Hatangwa itegeko ryo gusana i Yerusalemu.

**444 M.K:** Malaki yandika ubuhanuzi bwe.

**168-165 M.K:** Akarengane katewe na Antiokusi Epifanusi mu gihe cy'Abamakabe.

#### ***AMASEKURUZA Y'ABAMI BAHERUKA I BUYUDA***



#### ***Reba ubusobanuro bw'amazina avugwa mu nteruro y'igice cya 1.***

Danieli: Umucamanza wanjye ni Imana. (Itangiriro 49:6).

Yehokimu: Yehova ashyira hejuru.

Yehoyakina: Yehova arakomeza.

Zedekiya: Yehova arakiranuka.

Nebukadineza: Rigizwe n'ibi bice: NABO-KUDURRI-UTSUR

NABO:Izina ry'ikigirwamana cy'i Babuloni risobanurwa ngo NABO arinda urubibi.

**(1-5):** Hatubwira uko i Yerusalemu hatewe, bakanyaga imfura z'i Yerusalemu. Ijambo ngo AMUGABIZA  
**(2)** ritugaragariza ko:

- a. Imana ikorera mu bantu bayo no mu bapagani. Niyo igena ibintu byose ngo bisohoze imigambi yayo (Dan 2:21).
- b. Nubwo Satani azana ibyo yibwira ko bizakoma mu nkokora imigambi y'Imana, nabyo Imana ibikoreshe ishaka gusohoze imigambi yayo. Kubw'ibyo, ibintu byose ar'ibibi ari ibyiza, bifataniriza hamwe kuzanira abakunda Imana ibyiza. Abaroma 8:23.
- c. Abategetsi bose bashyizweho n'Imana ngo basohoze imigambi yayo. Nubwo ubwabo batabyemera, ni abagaragu bayo. (Abaroma 13:3,4 ; Yereimiya 25:9; 27:6, Yesaya 44:28.)

**Ijambo ngo ibintu bimwe:** Ibyo byajyanwe muri 605 ibindi muri 597 M.K maze muri 586 M.K abimara mu rusengero ararusenya rwose (2 Ngoma 36:18, 19).

**Mu rusengero rw'imana ye:** Ni i SHINARI (Dan1:2) h'i Babuloni. imana ni BEL-MARDUK.

Kuva i Buyuda kugera i Babuloni ni 1500 Km, kuko banyuraga mu nzira itaziguye berekeza i Kasikazi mu Busiriya, mu misozi y'aho Ufurate na Tigrisi bikomoka, bashaka kureka inzira y'ubutayu bw' Iburasirazuba bwa Palestina, maze bakamanukira mu gisiza cyo hagati y'inzuzi.

#### ***Ku ngoma ya Nebukadineza:***

- a. Inkike ndende zubakishije amatafari y'umuhondo arabagirana nk'izuba, zifite ubugari (umubyimba) wa 8m zari zizengurutse umurwa wose wa 64km.
- b. Hari umudugudu uhebuje iyo mu isi yose, uruzi Ufurate rukawunyuramo hagati.
- c. Hari umugende w'amazi mugari hagati yazo.
- d. Yazubatseho iminara 250 y'abarinzi.
- e. Ba Danieli binjiye mu irembo rya Ishitari ikigirwamana cyo kubyara, banyura mu muhanda nyabagendwa wo kwiyerekana, baca ku nyumba y'ibwami yari iburyo bwabo, bagera kuri cya gitangaza cy'umusozi Nebukadineza yaremeye umwamikazi, bagera ku rugo rw'ingoro rwitwa ESAGILA. Muri rwo harimo umunara wa ETEMENAKI muremure cyane, wari ufite inzego 7 zigerekeranye. Uburebure bwawo ni m100 n'ubugali ndetse n'ubuhagarike ni m 100. Ku musozo hejuru hari ingoro y'abasengazuba( Bel-Marduk). Abacukuzi bo mu matongo ( Archeologues) basanze yuko uwo munara wubatswe na Nebukadineza uri aho umunara w'i Babeli wahoze. Ndetse n'imfatiro zawo zisize ubushishi ziwurimo na bugingo n'ubu.

Urusengero rwa Bel-marduk nirwo ibinyagano byabitswemo bimaze guturwa icyo kigirwamana. Ibyo birori byo kwishima hejuru ya Yehova birangiye, ba Danieli bajyanwa mu Nyumba y'ibwami.

#### **Icyatumye Nebukadineza anyaga abasore b'imfura:**

Ni uko abami ba kera bagiraga akamenyero ko kunyaga abo mu nzu y'umwami watsinzwe, ngo babe ingwate bizatuma wa mwami yitondera kuganduka bitazakora ku bana be banyazwe.

Bigaragara ko imigambi ya Nebukadineza yari ingenzi kuko yafataga neza abo yanyaze (Dan.1:4-5) kuko yari umwami w'amajyambere, yashatse kuzamura abo muri koloni ze kubwo gusimbuza abami n'abatware imfura zabo zigiye kaminuza i Babuloni, zizi amajyambere ya Babuloni, kandi bazi uburyo bw'umwami wabo.

**ABAKARUDAYA NI BANDE?**Nibo Banyaramaya bahoze batuye mu misozi y'i Zagrosi hakurya ya Tigrisi. Bimukira i Shinari, baba ibyegera by'ibwami, ari imfura mu gihugu n'abategetsi b'abandi. Mu gihe cya Danieli babaye abajyanama b'i Bwami n'abahanga b'ishuri ry'i Babuloni bakaba abigisha b'ingenzi cyane.

Abakaludaya bari abanyabwenge mubya Astronomie, siyansi, Amateka, philosophie (ubucurabwenge), n'Imibare, ni nabo babihanze. Kuko basengaga izuba kandi umwaka ukagira amezi 12, bafashe 12 ho urufatiro rw'imibare. Ngiyo yo kubara za Douzaine, kugabanya umunsi mu masaha 12 y'amanya na 12 y'ijoro, kugira INCH 12 muri FOOT imwe no kugabanya uruziga muri dègre 360 (12 inshuro z'iminsi y'ukwezi). Bagiraga ubwenge mu Bumago, mu bupfumu no mu Bukonikoni.

- 6- 14:** hatubwira abana b'ingenzi Nebukadineza yanyaze nuko yabitiriye imana ze, uburyo batonye k'umwami, uburyo birinze kwiandurisha ibiryo bizira by'i Bwami bakagaragara neza kuruta ababyemeye.

**Ibyo Kurya:**

Imana yashyize urubibi ku biribwa n'ibitaribwa Itangiriro 7:2; Yes.66:17; Abalewi 11. Twibuke ko Yesaya yanditse igitabo cye muri 750 M.K. ibyaterekerejwe nubwo ntacyo bitwara umuntu w'Imana, 1Kor 8:4-7, 9-13, 10:27-31; yashatse kwirinda igisa n'ikibi cyose ngo kitabera inkomyi aboroshye bikabaviramo kurimbuka (1 Tes.5:22).

**VINO:** Risobanura ikinyobwa kivuye ku mbuto, cyaba gishya cyangwa igishaje. Imana yashyize urubibi hagati ya vino nziza na vino mbi (Imigani 23:31 na Yes.65:8)

**IBYIGISHO TWAKURA MURI IKI GICE CYA 1:**

1. Kuba umugabo nyakuri, nubwo abandi badohoka, bakimura Imana, bakava mu kuri. Kugambiririra mu mutima kutiyanduzza, kumenya Umwami wacu nka Danieli, tukirinda kumuhemukira kubwo gukomeza undi mwami naho yaba umunyacyubahiro w'umutegetsu. Nguko uko umukristo wese akwiriye gukurikira uwo yitiriwe (Kristo) akagera ikirenge mu cye nubwo abandi bese bamuhana.
2. Kwitondera imirire yacu kubwo gusobanukirwa n'uko imibiri yacu ari insengero z'Umwuka Wera uzirana n'ibyanduye, akanga gukora kuburyo budakwiriye. K'ubw'ibyo tuzahabwa ubwenge bujijutse, isumbwe n'icyubahiro mu bantu, kuramba dufite ubuzima buzira umuze, nkuko tubona icyitegererezo mu mirongo 15-21. Zirikana Mat. 6: 31,33.
3. Kugira kwizera gukomeye tukamenya ko Imana ikorera ibitangaza ku bantu bayo, batarinze kwiandurisha ibyo kurya cyangwa ibindi bintu bizira ngo dukunde tubeho. Ba Danieli barabyibushye nubwo batatungwaga n'ibyo abantu bibwira ko aribyo bibyibushya. Nta mata, nta mavuta, keretse ibishyimbo n'amazi gusa. Bene uko kwizera Imana ntiyabura kukumvira.
4. Birababaje cyane kubona abapagani barusha Abakristo imico myiza: Nebukadineza yari umuntu uzirikana abandi. Yari azi kubabarira abandi ndetse n'abahemu. Ntiyarwaraga inzika kandi yakundaga abantu bitangaje.

Mbese abakristo bameze nkawe muri iki gihe ni bangahe? Zirikana Mat. 18:21, 22.

## **Danieli 2 (IGICE CYA KABIRI)**

### ***IMPAMVU Y'IBYABAYE MURI IKI GICE***


1. Kugirango Imana imenyekanire i Babuloni. Imana yashatse ko imenyekanira muri za koloni za Babuloni zari zikwiriye mu isi yose. Imana yashatse kumenyekana i Babuloni kugirango abantu bayo bafatwe neza, bakire amahane badashiraho kandi aribo yari itezeho kujya barinda iby'ukuri kwayo. Abayuda nibo bonyine bari bazi ukuri kwayo.
2. Nebukadineza yizeraga ko azahoraho iteka, kandi ko ubwami bwe butazahanguka. Ibyo tubimenyeshwa n'urwibutso rwavumbuwe mu matongo y'i Babuloni ngo: Nahesheje abaturage b'i Lebanoni amahoro, sinakundira umuntu wese kugira icyo abatwara, mpashinga urwibutso rugaragaza ko ndi UMWAMI UHORAHO ITEKA RYOSE. Bisa nk'aho amajyambere atangaje yadukiye muri Babuloni muri icyo gihe yatumye Nebukadineza yibwira ko ari umutoni ku mana ze kandi ko zizamubeshaho iteka.
3. ***Icyatumye Imana imuha kurota inzozo ikazimwibagiza:***
  - a. Kwari uguhinyuza icyo gitekerezo yari afite.
  - b. Yashatse guhuza Nebukadineza na Danieli aribo bari abagabo bakomeye bo muri icyo gihe, Ngo Danieli abone uburyo bwo kwihanisha Nebukadineza, bibe intandaro yo gusohozwa imigambi yayo muri icyo gihe.

## **UBUSOBANURO BWIMBITSE**

**IZAHABU:** Ni umutwe umutwe gusa. Ibyo byari uburyo bwo guhinyuza ibyiringiro bya Nebukadineza byo guhoraho iteka. Izahabu ni icyuma cy'igiciro cyinshi. Igaragaza icyubahiro, ububasha n'ubukire. ( Itangir 41:42, Zab 19:9,10; Yobu 28:12-17). Ubwami bw'I Neo-Babulonia bwahanzwe na Neboporazali muri 626 M.K. Bwahindutse izahabu koko. Muri 612 M.K bwatsinze ubw'Abashuri, busigara butegeka Isi yose. Nibwo bwahindutse Izahabu, Ubwiza. Icyubahiro n'ubutunzi by'i Babuloni ntibyarondorekaga.

Uretse Nebukadineza na Yereimiya yahawe ubuhanuzi bwerekeye Babuloni, Imana imugaragariza ko ubwami bwaho butazahoraho iteka, ahubwo yerura ko buzahangurwa bugeze ku ngoma y'umuhungu wa Nebuporazali (umwuzukuru we).

Dore uko byasohoye:



2.

**NEBUKADINEZA 605-562 M.K**

3.

**AMEL-MARDUK 562-560 M.K**



***IFEZA: Ni igituza n'amaboko;***

Amaboko 2 agaragaza ko ubwo bwami buzagirwa n'amahanga 2 abumbiye hamwe. Niko byagenze kandi ubwo Nabonidusi n'umuhungu we Berushazali bari ku ngoma, batewe n'ingabo z'Abamedi n'Abaperesi zirabanesha zihangura ingoma yabo.

***Inkomoko y'abamedi n'Abaperesi:***

Abamedi bakomotse kuri YAFETI n'Abaperesi nuko; Abamedi ni bene MADAI (Itangir 10:2). Nko mu 2000 M.K bene Yafeti batangiye gusubira mu bihugu by'i Burasirazuba, bagera i Palestina no mu Egipta. Abandi bimukira muri AZIA nto bahanga ubwami, abandi bigarurira ubwami bw'i Mesopotamiya, abandi bakwira mu bihugu byo hakurya ya TIGRISI.

Bwa mbere Abamedi nibo bari bakomeye, ariko muri 550 M.K Kuro w'Umuperesi arakomera, asimbura Abamedi ku ngoma yabo agira DARIO w'Umumedi umugaba w'ingabo ze.

Muri 539 M.K atuma Dario kwigarurira i Babuloni, amaze gutsinda uwo murwa, Kuro amugabira ingoma y'i Babuloni kujya ahamutwarira. (Dan. 9:1).

Yesaya yahanuye ibya Kuro nko muri 750 M.K. Kuro yari umwami ukomeye koko. Aya magambo yanditswe nawe yavumbuwe mu matongo arabigaragaza: "Uhereye ku Nyanja yo haruguru ukageza ku Nyanja yo hepfo, igihugu cyose umwami wanjye yangabiye, hamwe n'umurwa w'i Babuloni, nahahesheje ikuzo n'amajyambere mu bihugu byose n'ahatuwe hose. Ninjye Kuro umwami w'Isi, Umwami ukomeye w'amaboko. Umwami w'i Babuloni n'impande enye z'isi. Ninjye rubyarw'Umwami rudashira. Imitegekere yanjye ikunda BEL na Nabu, bakayishimira. Kubwo imitegekere yanjye myiza, Abami bose basigaye bidamarariye mu nyumba zabo uhereye ku Nyanja yo haruguru ukageza kuyo hepfo. Abami bose bo mu bihugu by'iburengerazuba batuye ikoro riremereye, bageze i Babuloni bansoma ibirenge. Ninjye wubatse ingoro z'imana nziha ubuturo bw'iteka. Izo mana nagaruye zijye zinyibuka iteka uko bukeye, zinsabire kuri Bel ziti: "Ureke Umwami ugusenga na Kambusi umuhungu we n'ibihugu byabo bisigare mu mahoro". Ariko izo mana ze ntizagenga amahoro yo muri iy'isi. ubwami bw'IFEZA nabwo bwarahangutse.

**UMURINGA: Ni ABAGIRIKI**

1. *Inkomoko y'ubwo bwami*: Nyuma y'umwuzure nta bwami bukomeye bwaga mu Burayi. Umudugudu wose wagiraga mwami wawo. Hanyuma mu ntara ya Makedoniya ho mu Bugiriki ahaheranyeye n'i Burasirazuba haduka umusore arakomera. Yitwaga ALEXANDRE, yigira umugaba w'ingabo anesha imidugudu y'Ubugiriki aba umwami wa mbere w'Ubugiriki bwose.
2. Amaze guhanga ubwami bw'iwabo ashaka uko yabwagura yerekeje iburasirazuba, anesha amahanga ameze nk'umuriro wo mu bishingwe. Amaze koromya Aziya nto na Palestina na Egiputa, agera mu Buperesi abatsinda mu rugamba rwabaye muri ARBELA muri 331 M.K. Ibyo byose yabikoze mu myaka 8 gusa. Amaze kwigarurira Isi arizwa nuko adashoboye kugera mu yandi masi ngo nayo ayigarurire, agwa i Babuloni amaze imyaka 33 y'ubukuru.

### **UBWAMI BW'IBYUMA: Ni Ubwami bwa Roma**

-Umurwa wa Roma wubatswe na ROMULUSI muri 753 M.K aba Umwami wawo wa mbere.

- Nyuma ye hakurikiyeho abami 8 bigarurira imihana yose izengurutse Roma. icyakora babaye imbura-mbabazi, batwaza abantu igitugu cyane. Ku ngoma ya 8 abantu baragoma, bahanga Repubulika nko muri 500 M.K.
- Repubulika yabo ikomeza kugara buhoro buhoro, yigarurira ibihugu igeri i Babuloni, muri Afurika, mu Burayi ndetse no mu Bwongereza. Mu 168 M.K batsinda Abagiriki ku rugamba rw'i PIDYNA, bahangura ubwami bwahoze ari ubwa Alexandre. Bamaze kumenagura ubw'abandi bwose, bashyiraho PAX ROMANA. Ubwami bwa Roma bwari icyuma koko, kuko mu bwami bwose aribwo bwakabije gukomera no kuramba bukageza muri 476 N.K muri uwo mwaka niho bwahanguwe n'Ababarbaro b'amoko atari amwe aturutse mu buhugu by'Amajyaruguru, baba inkomoko yo kudahuza kw'Abanyaburayi kugeza na n'ubu. Amoko 10 yateye mu Bwami bwa Roma nibwo kimeza-miryango y'amahanga ari mu Burayi ubu. Ayo moko niyo agereranya ubwami bw'amano yo ku birenge. (Ibumba n'icyuma).

**UBWAMI BW'IBUYE:** Ubwo bwaturutse hejuru bwikubita ku birenge by'igishushanyo. Ni ubwa KRISTO buzaturuka mu ijuru muri iki gihe cyacu. Soma winira Mat.24:44.

### **IBITWEMEZA KO TUGEZE KU MANO Y'IGISHUSHANYO**

1. Dan.2:43 Ngo ntibazafatanya. Yesu nawe yahanuye ko mu minsi y'imperuka hazaba amahane n'amatage mu bantu, bangana, bicana, badashyira hamwe. Ntawahakana ko tugeze muri ibyo bihe. (Mat.24:6-13)
2. Igishushanyo cyaremwe mu byuma by'uburyo butari bumwe kandi budahwanyije agaciro uhereye ku IZAHABU ukageza ku IBUMBA. Ibyo ni ukugaragaza uburyo abantu bazahenebera mu by'Umwuka uko ibihe bihaye ibindi. Ntiduteze kubona abantu bakira ubwo ubutumwa buhamye bw'iby'Umwuka (2Tim.3:13).
3. Dukurikije ubu buhanuzi bwa Danieli 2, biragaragara ko Imana yashatse ko ubukomere bw'ubwami buzajya bwimukira iburengerazuba. Uherye kuri Babuloni ukageza i

Roma wasanga ariko byagenze. Kuri ubu ubwoko bukomeye ku Isi yose ntagushidikanya ni AMERIKA ituye i burengerazuba. Tugeze ku iherezo ry'inzira.

\*\*\*\*\*

## **IGICE CYA GATATU: (Mu itanura ry'umuriro)**

### **BYABAYE RYARI?**

Dan.3:2 Hatubwira ko Nebukadineza yahamagaje abatware bose ngo bitabe i Babuloni. Yeremiya 15 :59 havuga ko Zedekiya yajyanye n'umutware w'Abashashi i Babuloni mu mwaka wa kane w'ingoma ye. Zedekiya yimye ingoma muri 597 M.K. Umwaka wa kane w'ingoma ye ni muri 593 M.K. Mbese yari agiyeyo kumara iki ? si ukwitaba umwami Nebukadineza ?

### **KUKI BYABAYEHO?**

1. Ni umurimo wa Satani:
  - a. Yanangiye umutima wa Nebukadineza bituma ahinyura ubusobanuro bw'inzozi zo mu gice cya 2. Niko kurema IGISHUSHANYO cy'izahabu.
  - b. Yashatse gukuraho ba basore b'Abaheburayo bari barengeye Imana y'ukuri.
  - c. Yashatse gutuma abantu bahinyura ijamba ry'Imana ryavugwaga na Yeremiya 27:6,7 no gutuma ibya Yehova bihinyuka.
2. Imana yaretse Satani akoresha imigambi ye mibi, nyamara iriyubahisha:
  - a. Nebukadineza yongeye kworoshya umutima (Dan.3:28).
  - b. Mu cyimbo cyo kurimbuka ba basore barushaho kujya mbere (Dan.3:30)
  - c. Mu cyimbo cyo guhinyura Yehova, abatware bose bava i Babuloni bamaze kwemezwa n'imitima yabo ko Yehova atameze nk'Imana z'abanyamahanga.
  - d. Nguko uko Imana ireka ibibi bigakora ngo bisohoze imigambi yayo. Rya tanura ryashyiriweho kwica abayo niryo yakoresheje yihimbaza, inimenyekanisha. Abaroma 8:28,31

\*\*\*\*\*

## **IGICE CYA KANE: Umwami ajya kurisha hamwe n'inyamaswa**

Ibyo byabaye mu mwaka wa 7 cg wa 8 w'ingoma ye. Nta jambo na rimwe ryabonetse mu matongo cyangwa mu banyamateka ba kera ribivuga. Ni muri Danieli igice cya 4 gusa habivuga kandi bibabaje cyane. Byanditswe na Nebukadineza ubwe cyangwa yabyandikishije amagambo ye ubwe.

a. **IGITUMA IBYANDITSWE BYAVUMBWE MU MATONGO Y'I BABULONI  
BITAVUGA AMAKURU Y'IMYAKA IHERUKA YO KU NGOMA YA**

**NEBUKADINEZA**. Abakaludaya nibo mpuguke kandi nibo bandikaga amateka. Ibyabaye kuri Nebukadineza ntibyabashimishije, kuko byahinyuzaga amagambo yabo yo gushyeshya Umwami ngo azahoraho iteka.

b. **INTERURO Y'IGICE:**

Nibwo ari igitekerezo gishishana kandi gikojeje isoni cyerekeje kuri Nebukadineza, yaranditse ati: "Nishimiye kubyerura" (4:2). Yari amaze kwihana by'ukuri yiyumvamo ko Imana yamukijije akaga gakabije, niko kwifuzza kubiganira. Kandi ni koko ukize inkuba arayiganira. Iyo umuntu abaye uwa Yesu by'ukuri, akaba yarabaye icyaremwe gishya ari mubyo gukira kamere mbi, ntiyabura gushaka kubiganira n'abandi. Ndetse uwakiriye agakiza ka Yesu by'ukuri ntiyakwiyumanganya ngo atabibwira abandi.

c. **UBUKURE BW'I BABULONI**

Nebukadineza yamaze imyaka nka 35 ku ngoma. Yari amaze kwigarurira ibihugu, ubutunzi bwaho bugana i Babuloni kubw'imisoro yabo. Umurwa we wabaye agahano n'akataraboneka ariwe wawaguye cyane. Kudamarara kwe kwamuteye kwibagirwa inzozo ze zo mu gice cya 2 n'ibyabaye mu gice cya 3, asobwa n'ibi:

1. Abantu bose ni nk'ibyatsi. Babaho none ejo bagashiraho. Ntawe uriho kubwe ahubwo twese tubeshwaho n'Imana buri kanya. (Yes.40:6, 1Pet.1:24).
2. Ntawikiza. Ubukire bwose tubuhabwa n'Imana ari ingabire yayo. (Guteg.8:18)
3. Kwibona kubanziriza kugwa (Imigani 16:18; Matayo 19:30). N'ubwo ayo magambo ya Yesu yerekeje ku kubaho gutaha, no muri uku kubaho Imana inyaga umuntu ubutunzi afite bitewe n'umutima mubi we. Imana ntihana umuntu itabanje kumuburira no kumuha akanya ko kwihana. Nicyo cyatumye iha Nebukadineza kurota inzozo zo muri iki gice.

d. **UBUTWARI BWA DANIELI:**

1. Abakaludaya bavuze ko bananiwe gusobanura inzozo. Nyamara suko zari inzozo zidasobanutse, kuko n'umwami ubwe yari asobanukiwe nuko icyo giti ari we, n'uko azahanwa'ukunaniwira kuko zari inzozo zisobanura bibangutse, ndetse n'umwami ubwe yari asobanukiwe nuko icyo giti ariwe, nuko azahanwa. Dore uko yabivuze Danieli ataragira icyo amusobanurira (4:17). Ibyatumye Abakaludaya batabwira Nebukadineza ubusobanuro, nuko babuze uburyo bahimba ibyo kumushyeshya. Batinye ko nibamubwira ibimubabaza abica. Nyamara Danieli amaze kugera imbere y'Umwami abanza kujijinganya.(4:19) ariko arikomeza yerurira Nebukadineza byose atabebera.
2. Amaze kumubwira byose amuha uburyo bwo kwihana. Ngibyo ibimenyetso by'inshuti nyanshuti (Reba 4:27).

**e. IGIHANO GISOHORA KURI NEBUKADINEZA**

Imana yamuhaye amezi 12 ngo yisubireho. Nebukadineza abonye ko ibihe bikomeje guhita, yinangira umutima yanga kwicisha bugufi.

**Reba uko yirataga:** Ibyabonetse mu matongo y'i Babuloni n'urwibutso yahashinze: "Njyewe natumye i Babuloni haba umurwa wera de. Ni ibyirato by'imana zanjye zikomeye. Ni njyewe wawaguye kuruta abambanjirije bese. Ni njyewe watumye insengero z'imana-kazi zicya nk'amanya. Nta Mwami wo mu Bami bese wigeze kurema. Ntawambanjirije wigeze kubaka ibihwaniye akagero n'ibyo nakoreye Marduk. Nakwije ibikoresho byo muri ESAGILA,...

Kubw'ibyo inzira yo kubaho kwanjye ibe ndende, nishime n'urubyaro rwanjye... Izina ryanjye riragakuzwa mu bihe bizaza byose kubw'amajyambere nagize."

Ikindi cyitegererezo cy'uko yirataga (Dan.4:30) ubisome byose urebe ukuntu byose abiyerekezaho ubwe. Iyo ndwara yabereye igihamba guhinyuza mu buryo 2:

- Babwiraga Nebukadineza ko azahora ku ngoma iteka, noneho aba nk'inyamaswa yo mu ishyamba, imvura ikamunyagira, agatondwaho n'ikime n'ijoro.
- Ab'i Babuloni bibwiraga ko ibisazi biterwa nuko umuntu agenderewe n'abazimu. Ibyo nabyo byatumaga Abakaludaya bashoberwa kuko bajyaga babwira Nebukadineza ko ari umutoni ku mana.

**AMAHEREZO MEZA Y'IGIHANO**

Yubuye amaso ye areba ku ijuru agarura akenge; N'ubundi niho umukiro n'ubwenge bituruka. (Dan.4:34) yasobanukiwe nuko ubwami bw'Imana aribwo buzahoraho iteka ryose. (Dan 4:34). Abantu ni nk'ubusa imbere y'Imana, niyo ibaha byose ( Dan 4:35 ). Ntawe ubasha gukoma Imana mu nkokora. Ijambo ryayo naho ryatinda ntirizahera (Dan 4:35). Abibone Imana ibasha kubacisha bugufi. (Dan 4:37)

\*\*\*\*\*

## **IGICE CYA GATANU: IKIGANZA CYANDIKAGA**

Nubwo Nebukadineza yihanyye kandi abakomotse kuri we bakaba bari bazi uburyo Imana yamugaragarije ingaruka yo gukora nabi, ntibabyitayeho. Ubwami bwatangiye guhenebera mu maboko y'Abami bamusimbuye kandi uko bwarushagaho gusaya niko Abamedi n'Abaperesi bakomeraga. AmelMarduk amaze imyaka 2 ku ngoma agwa ku rugamba barwana n'Abamedi-n'Abaperesi, azungurwa n'umukwe wa Nebukadineza witwaga NEGLISALI( 560-556), aba icyohe ibintu bitangira gucika. Amaze imyaka 4 ku ngoma azungurwa n'umuhungu we LABASHIR-MARDUK ( 556-555), ariko we arushaho gusayisha, nuko bamukura ku ngoma ayimazeho amezi 9 gusa, bamusimbuza NABONIDUSI( 555-539).

Muri icyo minsi nko muri 555,556 M.K KURO anyaga Abamedi intebe y'Ubwami. Nabonidusi abonye ukuntu Ubwami bwa Kuro butangiye gukomera agirana amasezerano yo gutabarana na KROESUS Umwami w'i Lidia (Azia nto), na AMASUS wo mu EGIPUTA. Byongeye aha umuhungu we BELUSHAZARI kujya amufasha gutwara. Kuro abanza gutera aba Lidia arabatsinda. Bukeye atsinda ingabo za Nabonidusi mu OPISI ku nkengero y'i Tigrisi, yambuka uruzi yongera gutera ingabo za Nabonidusi i SIPPAR ku nkengero ya Ufurate. Ubwo hari kuwa 11/10/539, Belushazari ahungira i Babuloni. Ku wa 13/10/539 M.K, Umunyamateka w'Umugiriki witwaga ZENOFONI atubwira ko i Babuloni bagiraga umunsi mukuru wo kwinywera no gukesha inkera bisambanira. Nuko uwo munsi ugeze, Belushaza ntiyibuka ko igihugu cye kiri mu kaga ko kwigarurirwa n'abanzi, ararika abatware be bakuru 1.000 ngo baze mu birori, banywe banezerwe.

## **IBYEREKEYE IBIRORI**

- Abanyamateka bahamya ko ab'i Babuloni bari basinze icyo gihe.
- Abacukuzi bo mu matongo (Archeologues) bamenye icyumba abatumiwe na Berushazali barimo ubwo ikiganza cyandikaga ku rukuta. Icyo cyumba n'icyo mu Nyumba y'umwami iteganye n'irembo ry' i Shinari, gifite uburebure bwa metero 108 n'ubugari bwa metero 36.
- Kugira ibirori bifite abararikwa bangana gutyo ntibyari inzaduka. Ibehe bavumbuye i Nimurudi ryanditswe ku ngoma y'Abashuri rivuga y'uko Umwami ASHUR-NASIPAL yararitse abantu 69.574 arabatunga, arabafungurira, amara iminsi 10.

### **Umurongo wa 7:**

Umwenda w'umuhengeri: Niwo w'ubugabe

Umwenda w'izahabu: ikimenyetso cy'icyubahiro mu Bwami. Itangiriro 41:42.

Umutware wa 3 mu Bwami: Wibuke ko iri jambo ari ubuhamya bumwe dutanga twemeza yuko igitabo cya Danieli kitanditswe mu ijana rya 2 M.K. ubwo bari bamaze kwibagirwa ko Nabonidusi Atari we watwaraga i Babuloni ubwo baterwaga n'Abamedi.

### **Umurongo wa 10, 11:**

Hari ikosa abahinduzi bakoze: Si umwami-kazi ni umugabe-kazi. Ni Nyina wa Berushazali uvugwa aho kuba umugore we. Havuga ko Nebukadineza ariwe se wa Berushazali bitewe nuko kari akamenyero ku bakera kwita abana, abuzukuru, abuzukuruza, n'ubuvivi bw'umuntu izina rya nyir'umuryango.

### **Imirongo ya 18-24:**

Irimo amagambo ya Danieli ahwitura Umwami. Yasesengure neza nawe uramenya icyo Berushazali yazize, ubigereranye Na **Mika 6:8**

### **Imirongo 25-28**

**MENE:** Ijambo ry'urunyaramaya, ndetse n'andi yari yanditse ku rukuta nayo n'uko. Icyatumye Umwami atayasobanukirwa nuko muri icyo gihe bandikaga amagambo bayatandukanyije ari Ururandaryi. Byongeye kandi amagambo yo ku rukuta ntiyari amagambo ashititse:

Mene: risobanura ngo barwa (5:26)

Tekeli: risobanurwa ngo pima (5:27)

Upharsin: risobanurwa ngo umugabane cyangwa imigabane (ibice). Iryo jambo rikomoka ku nshinga PERES=KUGABANYA. Ni naryo bitaga Abaperesi

Umurongo wa 28 bawuhinduye nabi. Dukurikije urunyaramaya, ibikwiriye n'ibi: Ubwami bwe buragabanijwe. PERES si kugabwa ni ukugabanywa. Gereranya na Yer.27:6-7.

## **GUHANGUKA K'UMUTWE W'IZAHABU**

Bibiliya ibivuga mu magambo ahiniye hafi cyane (5:30, 31). Ntahandi ho muri Bibiliya hatubwira uko byagenze ariko hari amagambo menshi cyane yanditswe na Yesaya muri 750 M.K. na Yereimiya muri 605 M.K. atubwira imiburo ya Babuloni, ahanura uko bizamera nibatihana.

- a. I Babuloni hazagwa nubwo hakomeye bitangaje. ( Yes. 47:1-3, Yer.50:1,3,35,40. 51:53,58).
- b. Hazahinduka ibirundo by'amatongo babe ikidaturwa (Yes.13:19-22, Yer.51:29, 37).
- c. Umubisha azaturuka i Kasikazi ( 50:1-3,9,41,42).
- d. Nibo Bamedi (Yes.10:17, Yer.51:11, 28).
- e. Bizaba ku ngoma y'Umwami witwa Kuro (Yesaya 45:1, 3, 4) n'ahandi henshi.

Tuzi neza ko Nebukadineza yaburirwaga yabanje gusuzugura Ijambo ry'Imana. Amaze guhanwa bikabije, arihana yemera ko Ingoma y'Imana ariyo yonyine izahoraho iteka ryose yandika icyo gice akigenera abo mu bwami bwe bose, arundurira kuri aya magambo: Abibone Uwitwaga abasha kubacisha bugufi.( Danieli 4:37).

Nubwo ayo magambo yabaye uruhererekane mu bamusimbuye ntibayitayeho. Ingaruka y'agasuzuguro yagaragaye ku ngoma ya Berushazali biba icyuzuzo cy'amagambo ya Nebukadinezari: Ntawe ubasha gukoma Imana mu nkokora kuko Bibiliya itatubwira uko byagenze mw'inyagwa rya Babuloni, dukwiriye guhindukirira abanyamateka n'Abarcheologues, aho dukura

ubumenyi bw'ibyabaye mu ijoro Berushazali yishwe n'inkingi ya Kuro. Ibehe ryanditswe na Nabonidusi n'abanyamateka baronse ibyanditswe mu gitabo cya Yosefusi, Zenofoni, Herodotusi. Igitekerezo uko kivugwa nabo kigenda gitya: "Ingabo za Kuro zamaze kunyaga iz'i Babuloni mu Opisi n'i Sippar zigana i Babuloni zihibasiye, zihageze zisanga hari umudugudu udashoboka. Dario agabanya ingabo mu mitwe 3: umwe usigara aho uruzi rwa Ufurate rwinjirana mu mudugudu, ruca muni y'inkike y' i Kasikazi.

Undi mutwe Dario awujyana mu Butayu ahari icyobo kinini cyacukuwe kera bubaka inkike z'umurwa, bacukura umugende uhuza icyo cyobo n' uruzi, maze bararugomorora amazi agana muri cya cyobo, uruzi rurakama, babandi basigaye inyuma babonye rukamywe baravogera baca muni y'inkike, bagezemo basanga uruzi rukikijwe n'izindi nkike ndende impande zombi. Amahirwe nuko basanze abaturage bibagiwe gukinga inzugi z'imiringa zo kuri izo nkike. N'ubundi Imana yari yarabahanuriye ko izabatanga imbere ibaringaniriza uburyo. Ubusinzi bw'uwo mukuru bwatumye basanga n'abarinzi basinziriye, babacura inkumbi bagana k'urugo rw'Umwami. Abarinzi baho nabo bari basinze nabo babacura inkumbi. Abandi babonye ingabo z'abanyamahanga mu murwa batuma intumwa kuri Berushazali ngo Umurwa bawufashe impande zose bawumaze. Umwami ngo abyumve atyo, ntiyabyemera yiterera agati mu ryinyo nkuko yari abisanganywe, akingura urugi atabyitayeho ingabo zari zimutegereje hanze zimurabutswe ziramugwira, zimutsinda ku gasi. Ibishushanyo n'ubutunzi bw'ifeza babikura mu rusengero babihambira mu ngingo z'amafarashi n'ingamiya babijyana iwabo, Dario aba ariwe wima ingoma y'i Babuloni ahategekera Kuro. N'ubundi Uwiteka ngo: Niko ijambo riva mu kanwa kanjye rizamera, ntirizagaruka ubusa, ahubwo rizasohoka ibyo rishaka, rizashobora gukora ibyo naritumye'. (Yesaya 55:11).

\*\*\*\*\*

## **IGICE CYA GATANDATU: Danieli mu rwobo rw'intare**

Iby'icyo gice byabaye igihe ubwami bw'IFEZA bwari butangiye kwiganzura mu isi yose. Ibuka uko Kuro yimye ingoma muri 550 M.K agaherako agatsinda KROESUS w'i Lidia. Muri 540 M.K aca icyuho mu nkike za Opis, akahigarurira muri 539 M.K., tariki 11/10 ingabo z'i Babuloni zirahunga, Dario yambutse uruzi atera i Sippar.

Ku wa 13/10/539M.K agera i Babuloni ubwaho. Barahigarurira bataruhije baharwanira. Abantu bari bamaze guharurukwa ingeso mbi za Berushazali kandi Kuro yari yumvikanye ko ari umutegetsi w'Ingenzi. Nuko agera i Babuloni hashize ibyumweru bibiri abantu bamuha impundu, ariko cyane cyane Abayuda kuko Yesaya yari yarabahanuriye ko Kuro uwo azabasubiza i Yerusaremu ngo bahasane (Yesaya 44:28).

### ***Uburyo Kuro yari atandukanye n'abandi Bami babanje:***

Abashuri bari Imbura-mbazi, bishe abasaza n'abana nta mpuhwe. Bamaze kubaca mu gihugu bahasiga ibirundo by'ibiganza baciye kubo bafashe mpiri, batwika n'imidugudu. Wibuke uko i Samariya habaye muri 721 M.K.

Nebukadineza nawe yajyanaga abantu ho iminyago, imidugudu yabo akayisenya. Kuro we siko yameraga. Ageze i Babuloni ntacyo yahatwaye, abategetsi baho arabakomeza ndetse na Nabonidusi amusiga i Tema ngo ahamutegekere. Yagiraga na Gahunda yo gusubiza abanyagano iwabo. Ibyo ntibyashimishije Satani, ashaka ko kubona uko amurimbura.

### ***Ikigeragezo cyageze kuri Danieli:***

1. Cyatewe n'ishyari ry'abandi bategetsi kuko Danieli yabarushaga imico myiza no gukiranuka mu mirimo (6:4), babuze uko bamurega kubwo imigenzereze ye mu mirimo bahindurira ku kubaho kwe kw'imuhira ngo bakugenzure.
2. Ikigeragezo cya kabiri ni ukudasenga umuntu, gutanga ubuhamya bweruye ko umukristo asenga Imana ubudasiba. Danieli yamenyekanye ko asenga Imana iteka (6:16), yangaga guhisha uwo mucyo naho bamwaka ubugingo.

### ***Indunduro:***

Amateka y'Abamedi n'Abaperesi, amaze gushyirwaho impeta y'Umwami ntiyakuka rwose. Reba Esiteri 1:19, 8:8, Danieli 6:15. Iki gice cyongera kugaragaza uburyo Imana ihindura imigambi ya Satani ubusa, ikiyogezza kubwo kubaho k'umugabo wanze kudohoka.

## **INTERURO Y'UMUGABANE WA KABIRI**

Ibice 6 biheruka byo muri Danieli byuzuye ubuhanuzi. Ubuhanuzi mu Rugiriki ni **Profeteia** risobanura ngo **Ibivugwa mu cyimbo cya...** ubuhanuzi ni ubutumwa Imana icisha mu Bahanuzi bayo burimo imiburo, Inama, gutesha no kwigisha ibyerekeye ibyahise, ibiriho n' ibizaza. Ni umucyo utumurikira mu nzira izatugeza mu bugingo buhoraho (2Petro1:19).

Ubuhanuzi bwo muri Danieli 7-12 bwerekeye ibizaba, cyane cyane ibyo ku mperuka. Bwatanzwe kugirango tumenye aho tugeze mu ruhererekane rw'ibihe, tumenye aho duhagarariye, tubone kwitegura ngo dushyire

hamwe dutebutse umunsi w'Umwami wacu. Kuko ubuhanuzi bwa Danieli burimo amarenga menshi n'amayoberane, ibindi birimo bikaba byarasohoye ku buryo butangaje, hari abantu bamwe batemera ko ari ubuhanuzi, ngo byanditswe bimaze kubaho, kandi ngo ni ibyahimbwe bitumvikana by'amateshwa. Kuko ubuhanuzi na Bibiliya ari magirirane, niba butizerwa na bibiliya niko bimeze.

Dore impamvu 7 zituma twizera n'ibyiringiro byose ko Bibiliya ari ijamba ry'Imana bwite:

### **1. Amateka yo muri Bibiliya ni ay'ukuri no kwizerwa:**

Mu ijana rya 19 N.K ubwo inyigisho za **Evolutionisme** zatangiraga kwaduka, abayoboke bazo bagenzuye Bibiliya cyane ngo bayishakemo impamvu zo kuyikerensa, bayigereranya n'ibinyamateka byanditswe n'Abagiriki n'Abaroma uhereye nko mu gihe cya Alexandre mu ijana rya 4 M.K, basanga amateka amwe yo muri Bibiliya atandukanye n'ay'abo bagabo banditse, bati: "Noneho Bibiliya irimo amakosa kuko iciye ukubiri n'amateka y'Abagiriki n'Abaroma. **Ingero batanga:**

- a. Bibiliya ivuga kenshi iby'ishyamba ryitwa **Abahitite**, Abanyamateka ntibigeze babavugaga. Ngo kubw'ibyo Abahitite ntibigeze babaho, Ni ibihimbano byo muri Bibiliya. Nyamara Abarcheologues bamaze kuvumbura mu matongo ane ya za Bibliotheque 4 zikomeye i Ninewe, i Hattu (Bogaskei). i Nuzi n'i Mari; i Ninewe bahabonye amabehe asaga 10.000 yanditsweho ubutumwa n'ibitekerezo byinshi hatararimbuka, muri 612 M.K i Hattu bahavumbuye amabehe asaga 16.000 agaragaza yuko uwo mudugudu wari umurwa mukuru w'Abahitite. Ntamumenyi ugihakana ko Abahitite batigeze babaho.
  - b. Abanyamateka bavugaga ko Umwami uheruka i Babuloni ari **NABONIDUSI**. **Bibiliya ivuga ko ari BERUSHAZALI**, kandi mu masekuru y'Abami, baho yanditswe n'Abagiriki n'Abaroma nta Berushazali uvugwamo. Tumaze kubona ukuntu Archeologie yaraguye Bibiliya kuri icyo.
  - c. Bibiliya ivuga ko Umwami w'Abashuri yitwaga SARGONI V. Abanyamateka bo mu ijana rya 4 ntibamuvugaga. Noneho abahinyuza bati: "Ibyo muri Bibiliya ni ibinyoma". Ariko kuri ubu tumaze kumenya ko mu matongo y'inyumba ya Sargoni y'i Bwami n'ibyanditswe ku mabehe yavumbuye i Ninewe bigaragaza ko ariwe wasimbuye SHALMANEZA V, ntawundi ujijutse ugishidikanya kuri ayo mateka yo muri Bibiliya.
- 2. Ubumwe bwo mu butumwa bwa Bibiliya:** Igitabo cya mbere cyo muri Bibiliya "**YOBU**" cyanditswe na **MOSE ari i Midiani nko mu 1480 M.K** hakurikiraho ibindi 65 byanditswe n'abantu batari bamwe nka 35 b'amahara kwinshi; Abami nka Dawidi, Abarobyi nka Yohana, Abakarani nka Ezira na Matayo, Umuganga Luka, Umushumba Amosi; abo bese banditse bari ahantu hatari hamwe. Itangiriro cyanditswe na Mose ari i Sinaï, Yobu i Midiani, Yesaya i Palestina, Ezekieli i Mesopotamia, i Korinto muri Aziya nto, Abaroma mu Bugiriki, Ibyahishuwe kuri Patimo. Kandi rero kuva igihe Mose yanditse igitabo cya mbere kugeza kuri Yohana yandika Ibyahishuwe, hacye imyaka isaga 1500. Ariko igitangaza ni uko ibyanditswe muri Bibiliya byose bitabusanije, nta bihabane bihari, nta bihinyuzanya, ahubwo byose bigendera hamwe nk'urushunzi rumwe. Ibyo ntibyariruhutse gushoboka iyo abanditsi bese batayoborwa n'Umwuka umwe ariwo w'Imana.
- 3. Kuramba kwa Bibiliya:** Bataravumbura imashini zicapa (Gutenberg mu kinyejana cya 15 N.K) ibitabo byose byandikwaga n'abantu. Kubw'ibyo byari bike cyane, no mu myaka y'ibihumbi za Bibiliya zari nkeya cyane, nazo Satani akagerageza kuzimaraho, agatuma Abaheburayo bazirengagiza kugeza ubwo zibagirana rwose. Wibuke ko bayivumbuye mu matongo y'urusengero ku ngoma ya YOSIYA. Ni Imana yarinze iyo Bibiliya imwe kugira ngo idasibangana rwose, Satani

akayiteza abanzi bavuye inyuma y'itorero nka ANTIOKUSI EPIPHANIS. Yesu amaze gusubira mu ijuru, Satani yatumye itorero rihenebera kugeza ubwo ribujije abantu gusoma Bibiliya zabo, bakazitwikana n'abo basanze bazisoma (Wibuke ibya HUSI), bakazihindura mu Kilatini Kitazwi n'abantu benshi, bakanaziheza muri za Bibliothèque. Niho LUTERI yavumbuye BIBILIYA, atuma ubugorizi bugera mu itorero.

Ntibishoboka kumaraho BIBILIYA. Wibuke uko VOLTAIRE yabigenje akerensa Bibiliya, agahanura ko imyaka (100) nimara gushira nta Mukristo uzaba akirangwa mu gihugu. Nyamara imyaka 30 amaze gupfa, urugaga rw'abacapyi bahanga ibiro byabo mu nzu ya Voltaire, na n'ubu Bibiliya imaze guhindurwa mu ndimi zisaga 1.100. Ukuri guca mu ziko ntigushya.

4. **Kudahinduka kwa Bibiliya:** Abahinyuzi bati ibyanditswe mbere na mbere ntabwo tubifite, n'ababyandukuye mbere nta gushidikanya bashyizemo amakosa. K'ubw'ibyo ntibishoboka kumenya ubutumwa bwa Bibiliya uko bwari mbere na mbere.

**TUBISUZUME:** Tuzi ko Abaheburayo bakera bandikaga bibaruhije cyane. Nta nyajwi bandikaga kandi ntibatandukanyaga amagambo. Itangiriro 1:1 handikwaga gutya: "MBRNM BRMNYRM YJRNS". Gukora ibimeze gutyo ntibyoroshye. icyakora bamaze kuva i Babuloni bashyiraho gahunda yo GUTANDUKANYA amagambo niyo KUGABANYA MU MIRONGO ibyanditswe. Ibyo byabaye muri 700 N.K ubwo urugaga rw'Abayuda rwashyiragaho gahunda yo kwitondesha abacapyi. Ni koko rero birashoboka ko mbere ya 700 N.K abakarani bandikaga amafuti menshi, ariko Imana yatubikiye ubuhamya butangaje bwagaragariye ku biziga byahishuwe mu buvumo bwo QUMRAN. Ibyo biziga byahahishwe mu gihe cya Yesu, kandi bimwe byanditswe ataravukira kw'isi, nyamara ntibatandukanye n'ibyo dufite muri Bibiliya kuri ubu. Imana yatanze Ijambo ryayo yayoboye Abakarane bajyaga banyandukura kera.

5. **Ubutumwa bwa Bibiliya:** Bunyuranye n'imyizerere y'abandi bese ba kera. Abo mu Isi yose bizeraga ko hariho imana nyinshi zifite irari n'igishinja bimeze nk'iby' abantu, zikajya zicana, zisambana, zibana, zibeshya, amaherezo zigapfa.

Nicyo cyatumaga nabo bagira bene izo ngeso mbi. Muri Bibiliya havuga Imana imwe rukumbi, Yera, Ihoraho, itameze nk'abantu, kandi yifuza ko abantu baba beza nkayo. Noneho niba Bibiliya yarahimbwe n'umuntu wa kera ntiyajyaga guhimba ibinyuranye n'imyizerere yabo. Ubutumwa bwo muri Bibiliya buhabanye na kamere ya kimuntu ni ubuhamya ko itahimbwe n'umuntu, ahubwo ifite inkomoko y'indengakamere.

6. **Ububasha bwa Bibiliya bwa guhindura abantu:** nta kindi gitabo cyabashije guhindura umuntu nka Bibiliya; hariho ibyitegererezo byinshi twangaho urugero rw'imbaraga itangaje iyirimo.

**Abaheburayo 4:12.**

7. **Gusohora k'ubuhanuzi bwayo:** abahinyuzi bavuga ko ubuhanuzi bwa Bibiliya ari ibyanditswe bimaze kuba. Ariko se twavugaga iki ku buhanuzi bwerekeye MESSIA? Ntawe uhakana ko ibyo mu isezerano rya kera byanditswe Yesu ataravukira muri iy'isi. Aho havugaga heruye ko Messia azaza hati:

- a. Azakomoka mu bantu. Ntazamanuka mu ijuru ashagawe n'abamalayika.
- b. Azakomoka mu muryango wa Yuda, ku nzu ya Dawidi. Yesu yari Umuyuda koko.
- c. Azavukira i Betelehemu, niko byagenze.
- d. Azatangira umurimo we muri 27 N.K nibwo yabatijwe aba Kristo.
- e. Azapfa arenganye, nihashira iminsi 3 azuke. Niko byagenze.

Ibyo byahanuwe mu myaka magana menshi Yesu ataravukira mu isi. Ndetse ubwe nawe yajyaga asomera abigishwa be ubuhanuzi bumwerekeyeho akiri mu isi ( Luka 24:27,44). None se yari kubishobora ate niba ubwo buhanuzi bwaranditswe nyuma? Byongeye kandi ko hari ubuhanuzi bw'inshi bwerekeye kuri iyi minsi turimo ubu, bujya busohorera mu maso yacu uko bukeye bukira, hari uwahakana ko Bibliya itahumetswe n'Imana.

## **IBYEREKEYE AMARENGA N'IBISHUSHANYO BYA GIHANUZI**

Ibyatumye Imana icisha ubhanuzi mu buryo bw'amarenga n'ibishushanyo bitumvikana vuba:

- Kubuhisha ababi n'abatubaha Imana( Dan.12:10; Luka 8:10)
- Kubuhisha ubwoko bw'Imana igihe cyabwo kitaragera, kugirango bubakomeze nibaramuka bacogoye babonye ko hakiri igihe kirekire - Gutuma babwumva neza bamaze kubusobanukirwa.

## **IBY'INGENZI BIJYA BIBONEKA HATO NA HATO NI IBI:**

**Umwana w'intama:** Ni Yesu. Lewi 4:32; Ibyahish.5:13.

**Intare:** Ukomeye. Dan.7:4; Ibyahishuwe 5:5

**Ikiyoka:** Leta ya Satani. Ibyahishuwe 12:9

**Umugore:** Itorero. 2 Korinto 11:2; Yeremiya 3:8, 14, 20, 31:32.

**Umugeni:** Itorero. Ibyahishuwe 21:2.

**Umukwe:** Kristo. 2 Korinto 11:2, Ibyahishuwe 19:7; 21:2.

**Umwari:** Itorero riboneye. 2 Korinto 11:2, Yesaya 37:22.

**Malaya:** Itorero ryononekaye: Yesaya 1:21, Ibyahishuwe 17:1,2.

**Gusambana:** ni ukubangikanya ibibi n'ibyiza mu itorero. Ibyahishuwe 18:3.

**Umutwe:** ni icy'ingenzi, umukuru. Guteg.28:13, Itangiriro 3:15.

**Umurizo:** ikitari ingenzi cyane. Guteg.28:13, Ibyah.12:4.

**Amaraso:** Ubugingo. Itangiriro 9:4; Ibyah.12:11.

**Amaso:** Ubwenge, Ubugenzuzi. Yobu 28:20, 21; 2 Ngoma 16:9, Ibyahishuwe 4:8, 5:6.

**Akanwa:** Kuvuga, imvugo. Imigani 15:2, Danieli 7:8.

**Amababa :** Ubwihute. Habakuki 1:6,8; Danieli 7:4,6.

**Ihembe :** Ubwami, ishyanga. Zaburi 92:10; Luka 1:69; Danieli 8:21.

**Izahabu:** Agaciro, Kubonera. Itangiriro 41:42, Danieli 5:7; Ibyahishuwe 3:18.

**Ibyuma:** Gukomera. Danieli 2:40, 7:7; Ibyahishuwe 2:17.

**Umweru:** Kubonera. Yesaya 1:18, Ibyahishuwe 6:2.

**Umukara:** Kwandura, Ububi, Urupfu. Zaburi 23:4; Yobu 30:30.

**Umuhengeri:** ubugabe, intambara, ibyaha. Danieli.5:7, Yesaya 1:18, Ibyahishuwe 17:4.

**Umucyo:** ubutumwa bw'Ukuri. 2 Korinto 4:4; Ibyakozwe 13:47; Matayo 5:14.

**Umwijima:** ibinyoma, ibyaha, urupfu. 1Tes 5:4, 1Yohana 2:9, Imigani 4:19, Yesaya 60:1, 2.

**Invura:** Umwuka Wera. Hoseya 6:3, Yesaya 5:6.

**Umuyaga:** amahane, intambara Danieli 11:40; 7:2; Hoseya 8:7.

**Umusaruro:** imperuka. Yereimiya 8:20, Ibyahishuwe 14:15.

**Amasaka:** Abeza. Matayo 3:12.

**Umurama, urukungu:** Ababi. Matayo 3:12, 13:7; Ezekiel 2:6.

**Amazi:** Abantu, Amoko. Ibyahishuwe 17:15, 1.

**Umusozi:** Umurwa, Ishyanga, Ingoma. Zek 8:3, Yereimiya 51:25; Danieli 2:25.

**Ibuye, Urutare:** Kristo. Matayo 16:18.

**Ikamba:** Gutsinda. 2 Timoteyo 4:7, 8, Ibyahishuwe 3:11, 6:2.

**Inkota, Icumu:** Gutsinda. Yoeli 3:9, 10; Ibyahishuwe 19:15, 5:8.

**Birindwi:** Byuzuye, Bishyitse. Itangiriro 2:3; Kuva 25:37; 2 Samueli 21:5, 6, 9

Itangiriro 21:28-30, 33:1-3 ,2 Abami 5:10, Zaburi 12:6; 119:164; Matayo 18:21,22; Luka 17:4,

Ibyahishuwe 5:6 .

**Alfa:** Itangiriro. Ibyahishuwe 1:8, 11, 21:6; 22:13.

**Omega:** Iherezo. Kubara 14:34, Ezekieli 4:6; Danieli 8:14.

**Umunsi:** Umwaka. Kubara 14:34, Ezekieli 4:6, Danieli 8:14.

## **IBIRI MU BICE 7-12 MURI MAKE**

1. *Igice cya 7: Danieli yabonye Inyamaswa 4 ziva mu Nyanja: Intare, Idubu, Ingwe, Inyamaswa y'inzaduka ifite amahembe icumi(10).*

2. *Igice cya 8: Yabonye imfizi y'Intama n'Isekurume y'ihene y'Ihembe rirerire, rimaze kuvunika hamera amahembe 4, kuri rimwe muri yo hamera agahembe gato karakura cyane gakuraho iby'ukuri gasenya Ubuturo bwera, Karikakaza.*
3. *Igice cya 9: Danieli yari yarasomye Ubuhanuzi bwa Yerehiya asanga igihe cyo gusubira i Palestina cyegereje amaze **kubara imyaka**; maze asabira ubwoko bwe ku Mana ngo babaturwe bidatinze, Marayika Gaburieli aramubonekera amubwira ko itegeko ryo gusana Yerusalemu rizatangwa bidatinze, ariko ngo umudugudu uzongera kurimburwa hanyuma Ubuturo bwera busigare busenyutse kugeza aho Nyiribihe byose azazira akarimbura umurimbuzi.*
4. *Igice cya 10-12: Hashize imyaka 2 uhaye igihe Marayika Gaburieli yabonekeye Danieli uko byanditswe mu gice cya 9, yongera kumubonekera ubuheruka, arondora ibizaba ku ngoma y'Abamedi n'Abaperezi, amahane azaba hagati y'Umwami wa ruguru n'uwo hepfo, bikageza ku mperuka ubwo Imana izarokora abayo. Igice cya 10 ni Interuro y'iryo Yerekwa, icya 12 kikaba indunduro yaryo.*

\*\*\*\*\*

## IGICE CYA 7

- (1) **Mu mwaka wa mbere wa BERUSHAZALI:** Muri 539 M.K: Tuzi ko Nabonidusi yamuhaye gutegekana nawe nko mu gihe Kuro yimaga ingoma i Bumedi n' i Buperesi, agahangura iya Babuloni kubwa Berushazali.
- (2) **Imiyaga 4:** Intambara cyangwa amahane byakwiriye mu Isi yose. **Inyanja nini:** Ahatuwe n' Abantu benshi. icyo gihe hari mu burayi ari naho hari Intebe nkuru y' Isi.
- (3) **Inyamaswa 4:** Ubwami bune (umurongo wa 17:23). **Kudasangira ubwoko:** kutava mu karere kamwe.



- (4) **Intare:** Ubwami buteye ubwoba kandi bukomeye kubw' imitegekere.  
**Amababa 2:** ubwihute mu kwigarurira ibihugu bungana nk' ubw' igisiga kiguruka. (Habak.1:6, 8b).  
**Gushikuzwa kwayo:** kurangiza kwigarurira Isi.  
**Guhagarara nk' umuntu:** Gutegekana ubwenge n' ubuhanga.  
**Umutima nk' uw' Umuntu:** Kwita ku kiremwa-muntu. Ibuka ko yabitagaho n' ubwo yabaga yarabanyaze, nka ba Danieli.
- (5) **Inyamaswa ya 2:** Ubwami bw' Abamedi n' Abaperesi.  
**Kweguka uruhande rumwe:** Gukomera kwa bamwe. Impande 2 ni Abamedi n' Abaperesi. Urwegutse ni Abaperesi barushaga Abamedi gukomera.  
**Gusa n' Idubu:** Kugira Amahane cyane.  
**Imbavu eshatu zo mu mikaka:** imbaraga 3(ingabo z' ugutatu) bwabanje kurwanya ngo bushobore kwigarurira Isi aribwo LIDIA (Libia y'ubu) muri 547 M.K, Babuloni muri 539 M.K, Egiputa muri 525 M.K.

**Guconcomera inyama nyinshi:** kubabaza no kwica abantu benshi kugeza ubwo bahindutse inyama gusa.

- (6) **Ingwe:** Ubwami bw'Abagiriki. Nk'uko ingwe inyaruka, niko Abagiriki bihuse nkayo kane mu kwigarurira Isi. Babugereranyije n'ingwe kuko bwari bukanganye, ntawizeraga kutazatsindwa nabwo. Alexandre agitangira kwagura ubwami bwe yagenze urugendo rw'iminsi 11 kuva mu Bugiriki ajya i Babuloni, Km 500 zisaga. Kuva muri 331 M.K. kugeza 323 M.K. Ubwo yatangaga yagenze Km 18.000, ari nta Mwami wundi wigeze kworomya ibihugu atyo.

**Imitwe 4:** Abami bane bigabanyije ubwami mo kane nyuma y'intambara yabereye mu IPSUS, Alexandre amaze gupfa. Abo bari abagaba be: **a. KASANDELI** : Yafashe Ubugiriki

**b. LYSIMAKUSI:** Yafashe Asiya nto

**c. SELEUKUSI:** Yafashe Uburusiya na Mezopotamia

**d. PTOLEMY:** Yafashe Egiputa na Palestina y'epfo.

Bamaze kugabana ibihugu gutyo ntibarakwicara hamwe ngo banyurwe amahane yabo arakomeza. Hashize imyaka 20 Lysimakusi yigarurira Kasandeli, Seleukusi nawe atsinda Lysimakusi aramwica. Ubwo hasigara Abami 2, umwe ateguka ibihugu bya ruguru, undi ateguka ibyo hepfo. Ibyaruguru ( i Kasikazi) hategekwa na Seleukusi, ibyo hepfo (i Kusi) aba Ptolemy.

- (7) Inyamaswa ya Kane y'Inzaduka: Ubwami bwa Roma. Kuba inzaduka ni uko yishe abantu kandi ikica na Kristo Umuremyi, ntacyo yitayeho.

**Kudasa n'izindi:** kudahangurwa nk'uko ubundi bwami bwahanguwe. Aho gusimburwa n'ubundi bwami, bwashimbuwe n'amahanga 10 yabuteye akigabanya ubwami mo ibice 10. Byongeye kandi nuko nta Bwami bwarambye ku ngoma nka Roma. (168 M.K-476 N.K). **Ayo mahanga 10 niyo mahembe 10 yari ku mutwe w'iyi nyamaswa.**



**Amahembe 10:**

ABADAGE, ABABIRIGI, ABONGEREZA, ABESPANYORI, ABAPORTIGALI, ABASUWISI, ABAFARANSA, ABAHERULI, ABAVANDALI N'ABOSTRAGOTI.

- (8) **Ihembe ritoya ryameze: Roma Nkristo** (Gatorika=Ubupapa).

**Atatu yakuwe:** Abaheruri, Abavandari, Abostragoti basimburwa na VATIKANI, Intebe y'UBUPAPA (**Soma Imbonera-rugo niba wayibona**). **Amaso asa n'ay'umuntu:** imitegekere cyangwa imigenzurire nk'Abami.

**Akanwa kavuga ibikomeye:** Gutegeka ibintu birwanya Imana. Kubwiriza ibirwanya Imana.

## TUBISESENGURE NEZA

Danieli yahagaritse umutima amaze kwerekwa iby'ihembe rito bituma arwara kubwo igitekerezo gishishana cy'ibizaba kubwoko bw'Imana biturutse kuri iryo hembe rito. Ihembe rito Danieli yeretswe rigereranya umwami ariko utandukanye n'abandi bami (Dan.7:24), akazaduka yoroheje, nyuma akazarusha abandi gukomera. (Danieli 7:8, 20).

Azaduka mu gihe cy'Abami 10 hagati yabo( Dan 7:8,24). Abandi bami 3 bazanyagwa kubwe, ( Dan.7:8,24). Azagira akanwa kavuga: Azaba umubwiriza (Danieli 7:8).

Amagambo ye azaba ari ayo kugomera Imana ( Dan.7:8, 25). Azarwanya abera b'Imana ndetse yende kubanesha (Dan.7:21).

Azahabwa uburenganzira bwo gukomera no gukora ibyo mu gihe cy'imyaka 1260,( Dan.7:25). Azakomwa mu nkokora no kuza kw'ISUMBA BYOSE. ( Dan.7:22).

Mu iherezo ry' ingoma ye urubanza ruzashingwa (Dan.7:26). Imana izima ingoma yayo muri iyi Si. (Dan.7:27).

## UWO NI INDE?

Hari abibwira ko ari **Antiokus VI Epifanisi**, kubwo akarengane yarenganiye Abaheburayo mu 168 M.K.-165 M.K. Nyamara sibyo kuko :

- Antiokusi yabayeho mbere y'amahembe 10. Wibuke ko ayo mahembe yatangiye ubwo yahanguraga Roma muri 476 N.K.
- Byahanuwe ko uwo Mwami azakomera cyane mu myaka 1260. Akarengane ka Antiokusi kamaze imyaka 3 gusa.
- Byahanuwe ko iryo hembe rizagumaho kugeza ku mperuka y'isi, Antiokusi yatanze mu 164 M.K. Uretse n'imperuka, Antiokusi yatanze Yesu ataraza mu isi bwa mbere.

## YOHANA NAWA YERETSWE IBY'UWO MWAMI:

- Ibyahishuwe 12:4-6; 13-15. Reba uko igihe cy'akarengane (12:6-14) gihuye n'ikivugwa muri Danieli 7:25, hagakubitiraho no kutugaragariza ko kazatangira Kristo amaze gusahurirwa mu ijuru. (Ibyahishuwe 12:5)
- Ibyahishuwe 17:1, 6 herura ko akarengane k'Abakristo kazaturuka ku itorero ryangiritse. Bigereranye n'amafarashi 2, cyane cyane iya 2 yo mu byahishuwe 5:2-4. Ongera ugereranye umutima wa Yohana amaze kubona ibya Malaya uwo, n'uwa Danieli yari afite amaze kumenya ibya rya hembe rito.

## MBESE HARI UBWO ABAKRISTO BONONEKAYE BIGEZE GUTERA ABANDI BAKRISTO?

Mu 1488 N.K hariho umugabo w'Umukristo witwaga ALBERTI KANTANO akaba umunyacyubahiro mu itorero rye, atumwa n'Umukuru w'Itorero gutera Abakristo babaga ahitwa i VAL LOUISE ho muri Alps, agaba Ingabo. Agezeyo asanga abaturage baho bahunze, abavumbura aho bari bihishye mu buvumo. Izo

ngabo zibibonye gutyo zirunda ibiti ku muryango w'ubuvumo zirabikongeza, hapfiramo abantu 3.000 n'abana bato 400.

***Mbese uwo KANTANO yari atumwe na nde? Yahoye iki abo Bakristo se?*** ni umukuru w'Itorero ry'i Roma. Yabahoye yuko banze kwakira inyigisho z'iryo torero ziciye ukubiri n'ibyanditswe muri Bibiliya. Tuzabigarukaho mu mpapuro zikurikira. Birahagije kuvuga ko yicishije abantu inzovu inshuro nyinshi, abagabo, abagore n'abana.

Yesu n'intumwa ze bahanuye hakiri kare ko akarengane kazagendana n'abahanuzi b'ibinyoma n'abiyita Kristo.

Paulo mu gihe cye hariho bamwe bari bamaze kuvuga ko Kristo yaje. Ni cyo cyatumye yandikira Abatesaloniki (2 Tes 2: 3, 4) avuga ko umunsi w'Umwami utazaza hatabanje kuboneka ubuhakanyi n'ubuyobe, kandi ko ubwo buyobe buzayoborwa n'uwicara mu rusengero yiyerekana ko ari Imana.

2. Tes 2:7, 8 hagaragaza ko ubuyobe bwari butangiye kuza ariko rwihishwa. Iyo mirongo uyisome neza, uyigereranye n'ibyo twabonye haruguru.

Petero nawe yarabisongeye (2Petero 2: 1-3) ati: “Abigisha b'ibinyoma (nibo kanwa kavuga ibikomeye) bazaduka muri mwe (Itorero). Bazazana inyigisho zirema ibice rwihereranwa”. Yesu agihanga Itorero nta bice byari bihari, ahubwo bose bizeraga kimwe (Ef.4:5). Amatorero cyangwa amadini menshi yahindutse nyuma kubwo inyigisho zitandukanye zazanywe n'abigisha b'ibinyoma.

Paulo ubwo yasuraga abakuru b'Itorero rya Efeso, yababwiye ibyanditswe mu byak. 20:29, havuga ko abazazana ibice mu itorero bazaturuka mu bakuru b'Itorero (Ibyakozwe 20:28-31). Paulo yandikiye Umukuru w'Itorero witwa TIMOTEYO urwandiko arushaho kumusobanurira ibimenyetso byabazirema ibice kubw'inyigisho zidahujye na Bibiliya (1 Timoteyo 4:1-3).

Yohana mu rwandiko rwe rwa mbere yeruye yuko mu gihe cye Itorero ryari rimaze kwigabanyamo kabiri (1 Yohana 2: 18, 19). Yohana yapfuye mu iherezo ry'ijana rya mbere N.K.

Dufite ibindi bimenyetso byerekana ko mu gihe cya Yohana hari amatage mu Itorero bitewe n'abazana inyigisho z'ibinyoma. IRENAEUS yanditse ibya Yohana ati: “Yohana yagiye kwiyuhagirira mu nzu mu Efeso, asangamo SIRINTUSI, amurabutswe arasimbuka, arataka ati: “yemwe duhunge inzu itatugwira. Dore Sirintusi umwanzi w'ukuri kw'Imana ayirimo”. Sirintusi uwo yari uwo mw'ALEXANDRIA.

***Amendeze y'inyigisho ziciye ukubiri n'ijambo ry'Imana n'amatage;***

1. Sitefano amaze kwicwa, haduka akarengane mu bayuda, gatuma Abakristo batatanira mu bihugu by'abapagane (Ibyak.8:1). Imana yabaye hamwe nabo baratsinda kuko bari imbonera, (Ibyah. 6:2), bihanisha abantu benshi nubwo akarengane kabagezeho no mu banyamahanga bamaze kwakira Ubukristo. Abo bakristo bagize Amatorero ahantu 4: muri Antiokiya, Alexandria n'i Byzantium (Konstantinople) n'i Roma.
2. Akaga katangiye mu Itorero ubwo:
  - Abapagane bihanaga batamaramaje, bakinjira mu itorero bakaziririza imitukiro n'imiziririzo ya gipagane.

- Abakuru b'itorero bamwe boroheje inyigisho zimwe zari zihabanye n'ubupagane, kugira ngo bitarushya abapagane kwihana ibirenze urugero.
- Akaga gakomeye cyane katangiye gatewe n'umwami w'i Roma witwa **Konstantino**. Mbere yicyo gihe cye, Abami bose barenganyaga abakristo bitangaje, ariko akarengane katumye baba beza. Mu gihe cya Konstantino, avuga ko yahindutse Umukristo, nuko abakristo bava ikuzimu bajya ibuntu, bibabera intandaro yo kwangirika. Konstantino ntiyihannye by'ukuri, yanze kubatizwa, abyemera abonye agiye gupfa, nabwo akomeza kuraguza. Kuba Umukristo kwe ntikwavuye ku mutima, yabitewe n'impamvu 2:
  - a. Yabonye ko abami b'i Roma bamubanjirije bose bapfuye nabi, yibwira ko babitewe nuko basheshe amaraso y'Abakristo. Umwami umwe gusa washaje neza ni se wa Konstantino, kandi ntiyigeze arenganya Abakristo, Konstantino abibonye atyo arinira, atinya gukora ku Bakristo ngo batazamukoraho nawe.
  - b. Hari amatage kubw'Abarbaro bateraga mu bwami bwe, ashaka uburyo bwatumwa yunga ubumwe n'amoko menshi. Abonye ko mu moko hafi ya yose hari Abakristo, yigira inama yo gutona kuri bo, ngo abone inshuti mu moko atari amwe, niko kuvuga ko abaye UMUKRISTO.
- Muri 313 N.K yatanze itegeko ry'**imirimo** rivuga ko: Abakristo banyazwe ibyabo bibagarurirwa. Ntihakagire Umukristo uzongera kurenganira mu gihugu cye. Ntihakagire umuntu uvuguruzwa umukuru w'Itorero.
- Byari kuba byiza ko Abakristo bagarura ubuyanja ntibabe bagihigwa nk'inyamaswa, ariko akaga ka mbere karashize haza aka kabiri.

Mu gitekerezo tugeze mu gihe cy'Ifarashi ya 3 (Ibyahishuwe 6:5), kubera Konstantino wari umaze kuba Umukristo, Abakristo bariraye (Umurengwe wica nk'inzara), abatware bamwe bategeka abantu guhinduka Abakristo banze bakunze, benshi babikora bya nikize batabishaka, bapfa gufata impu zombi.

Konstantino ubwe yigize Umutegetsi w'iby'Itorero atuma inyigisho za gipagane zibona ishyikizo mu Itorero.

**Icyitegererezo:** Muri 321 N.K yategetse ko abantu bose bo mu midugudu baruhuka umunsi w'**IZUBA**, maze Abakristo b'i Roma bahatirwa kuwubangikanya n'**ISABATO YERA**.

Kubw'ibimeze bityo, inyigisho z'amahame bakurikizaga i Roma zitangira gutandukana n'iz'i Konstantinople, n'iz' Antiokiya no muri Alexandriya, imyigishirize y'i Roma iba ariyo ihabwa isumbwe kuko Itorero ry'Inyarurembo ritabura kurusha ayandi icyubahiro.

Konstantino ubwe yubahirije Umukuru w'Itorero ry'i Roma amufata bupfura, ngo bibe intandaro yo gutuma Abakristo bose bamukunda, bakamugandukira. Bukeye Konstantino agabira uwo Mukuru w'Itorero inyumba ya cyami yari i LATRANI i Roma.

Muri 330 N.K. Konstantino yimukira i BYZANTIUM (Aziya nto), noneho Umukuru w'itorero ry'i Roma, aho gutegeka iby'itorero gusa, akubitiraho n'ubutegetsi bw'igihugu. Niko gufatanywa **UBUTEGETSI n'UBUPOLITIKE**. Ngaho jya wasobanukirwa n'ibyho mu **Byahishuwe 17:1,2**.

## UKO AKANWA KAVUZE IBIKOMEYE (Dan.7:8)

- a. INNOSENTI I (402 N.K): Ninjye Mukuru w’Itorero wo mu Isi yose.
- b. SIXTUS III (432 N.K): Nashyiriweho n’Imana guhagarikira Itorero ryose.
- c. SYMAKUSI (498 N.K): Umukuru w’Itorero ry’i Roma ni Umucamanza uhagarariye Imana muri iyi Si.
- d. Papa afite icyubahiro n’ikuzo bihebuje. Ntabwo ari umuntu gusa ni n’Imana;...Papa yitwa Nyiri Ubutungane rwose kuko ari koko. Nuko rero ni UMWAMI UKOMEYE WERA, ni UMWAMI W’ABAMI. nicyo gituma yambara amakamba atatu agerekeranye agaragaza ko ari Umwami wo mu Ijuru, uwo mu Isi n’uw’ibiri munsu y’Isi. Ubutware bwa PAPA si ubwo gutwara ibyo mu Ijuru no mu Isi n’ibyo munsu y’Isi gusa, ahubwo atwara n’Abamalayika, ahebuje bose. Iyaba byashobokaga ko batekereza ibiciye ukubiri cyangwa bagacumura, baciriweho iteka na Papa bagacibwa na Papa.  
Papa afite icyubahiro n’ubushobozi biheraniye, nicyo gituma afatanyaga na Kristo guca imanza. Nuko rero icyo Papa akora cyose bisa naho kiva mu kanwa k’Imana. Papa abasha guhindura amategeko y’Imana ho hato kubw’ububasha bwe butari ubw’umuntu ahubwo ari ubw’Imana. Niwe uri mu cyimbo cy’Imana muri iyi Si. Afite ububasha bwose bwo kuboha no kubohora intama zayo.  
***Aya magambo yanditswe mu gitabo cya GATORIKA cyitwa PROMPTA BIBLIOTHECA, vol. VI, p.25-29. Cyanditswe mu 1746 N.K cyongera gucapwaga i Roma mu 1899 N.K. mu icapiro ryitwa IMPRIMERIE DE PROPAGANDE.***
- e. Papa Leo XIII: Mu rwandiko yandikiye Abagatolika bose mu 1894 N.K agira ati : « Ndi muri icyi isi mu cyimbo cy’Imana Nyiri ubushobozi bwose ».
- f. Ku ikamba rya Papa handitswe aya magambo ngo: « VICARIVS FILLI DE » . Asobanurwa ngo « URI MU CYIMBO CY’UMWANA W’IMANA ». Ibuka ubusobanuro bwa ANTI-KRISTO rero.

**Danieli 7:9-14:** Danieli yakomeje kwitegereza kugeza ubwo Imperuka iye, Kristo agarutse, ahabwaga ubutware. Yabangamiye ya Leta cyangwa bwa Bwami (Roma) kugeza ubwo yabonye burimbuwe bugatabwaga mu muriro, hamwe na rya HEMBE ryavugaga ibikomeye (Ubupapa cyangwa Gatolika). Ngayo amaherezo yayo.

**Inyamaswa zanyazwe ubutware:** Ni za zindi 3 za mbere: Babuloni, Abamedi n’Abaperesi n’Abagiriki. Ngo nta teka bazacirwaho ritewe no kurenganya ABERA.

**Danieli 7:15-24:** Ndetse kugera kuri 27, Danieli yarasobanuye by’amashirakinyoma abwirwaga uko bizamera kugeza imperuka.

**Danieli 7:25: Azavugaga ibyo kugomera Isumba byose:** Iryo jambo KUGOMERA mu Ruheburayo ni TSAD. Mu Rugiriki ni ANTI risobanurwa ngo URI MU CYIMBO CYA... aya magambo afite icyo ahuriyeho.

Ukurikije ibyo, byarushaho guhindura neza Dan.7:25 ngo: “***Niwe uzavugaga ibyo kwishyira mu cyimbo cy’Isumba byose***”.

Uko byasohoye tumaze kubivuga haruguru kuri **(d-f)** bigereranye na 2Tes.2:4 na Dan.11:36, 37. Uretse no kwerura mu magambo ko ari Umwana w’Imana, Papa anabigaragarisha inyigisho ze:

- Bibiliya muri 1 Timoteyo 2:5 iti:”Hariho Umuhuza umwe w’Imana n’abantu, **ni Kristo**”. Papa abihakanisha inyigisho ze zo kwaturira Abasaserodoti ibyaha (Penetensiya) n’Indurugensiya.
- Heb.9:26-28 hati:”Imana yatanze Yesu ngo atambwe rimwe gusa”. Papa ati: Umusaserdoti atambe Yesu Kristo buri muni mu MISA”.
- Ibyak.4:12 hati:” Nta rindi zina ryahawe abantu gukirizwamo”. Papa ngo ntawe uzajya mu Ijuru yaranze kumuyoboka. Ngo ni iteme rikomeye. (PONTIFEX MAXIMUS).

### ***Azarenganya Abera b’Isumba byose:***

Twibuke ko Abakristo bahanze amatorero akomeye muri Antiyokiya, Alexandriya, Konstantinople n’i Roma. Mu gihe cya Yohana, inyigisho zizana ibice mu itorero zari zimaze kuboneka mu Itorero. Konstantino amaze kwimukira i Konstantinople, Itorero ryaho rigirana amakimbirane n’iry’ i Roma kubw’umukuru w’itorero ry’i Roma ngo uwo mukuru ARIUSI yigisha inyigisho z’ibinyoma.

Muri 325 N.K. Konstantino akoranye inama z’Itorero i NICASA, zitegeka ko umukuru w’itorero ry’i Roma arusha uw’i Konstantinople icyubahiro, ARIUSI bamucira muri ILURIKO, bamubuzanya n’abayoboke be kwamamaza inyigisho zabo, baranga bazisakaza hose, bahindura ABAHERULI, ABAVANDALI N’ABOSTROGOTI abigishwa babo. Ayo moko yibasira gukuraho itorero ry’i Roma n’inyigisho zaryo.

Abavandali barabanje batera i Roma barahasakiza, barahatwika muri 476 N.K. Abaheruli bakura Romulusi ku ngoma barayihangura, bashyiraho itegeko ngo: “Nta Mukuru w’itorero ry’i Roma uzatorwa umwami wabo atabanje kumwemera”.

Ab’itorero ry’i Roma bibanga mu nda, niko gutabaza ZENO wari wicaye ku ntebe y’ubwami i Konstantinople, agambana ku Bastrogoti birukana Abaheruli mu ITALIYA, Abakristo b’i Roma batangira gutoteza Ariusi maze TEODORIKI, Umwami w’Abostrogoti ati: “Nimumutoteza kubwo inyigisho zanyu atemera natwe tuzabatoteza kubw’izacu mutemera. Ahita ategeka umukuru ry’i Roma kubuza ako karengane, amutuma mu bihugu by’i Burasirazuba ngo ntakagaruke atabirangije, abitunganyije.

Abavandali uko bari basigaye ari aba ARIUSI, bakomeza gutera amahane n’ab’ i Roma. Muri 533 N.K. JUSTINIANI umwami w’i Konstantinople, ashaka guhosha amahane, ati: “Umukuru w’itorero ry’i Roma niwe mutwe w’amatorero yose, bese bakwiriye kumwumvira, ntibamuvuguruze”. Nyamara itegeko rye ribura uburyo kubwo Abavandali n’Abostrogoti.

Muri 534 N.K. agaba ingabo anesha Abavandali. Muri 538 N.K umugaba we Berizariusi atsinda Abostrogoti, arabirukana umukuru w’itorero ry’i Roma ariruhutsa, arishyira arizana nta nkomyi. ***Nguko uko Amahembe 3 yakuwe irito rigakura.***

## **DORE UKO PAPA YARENGANYIJE ABERA B’ISUMBABYOSE**

1. Kuva ubwo Papa ahindukirira abanze kwakira inyigisho ze ati: “Mutazemeye mukivugurura nzabacura inkumbi. Akarengane katangiye buhoro buhoro, hashize igihe haba ibishishana Papa

afatanya na Leta, iba ariyo imusohoreza imigambi ye yose, ari ukwica abagabo n'abagore, abasaza n'abana nta mbabazi”.

Dore uko Papa INNOCENT III yandikiye abakuru b'amatorero:” Muri uru rwandiko rwanjye, jyewe intumwa ya Kristo, mbahaye itegeko ridakuka ko mugomba gushaka uburyo bwose, bwo kurimbura abacye ukubiri n'inyigisho zacu. Ndetse mukwiriye kwirukana, mugaca mu mihana yanyu yose umuntu wese wandujwe nabo n'uwigeze kubagenderera. Muje mukoresha imbaraga z'ububasha bwose z'itorero mufite, mukubitiyeho no kubagaruza inkota z'abatware b'ibihugu”.

INNOCENT IV nawe ati: “Abahakanyi nibamara gutangwa mu maboko ya Leta n'umukuru w'itorero. Bourgmestre mukuru akwiriye kubahana atajuyaje hatarashira iminsi itanu”. Papa ateguka ko abantu bose bemera kumutabarira bakica abanzi be, bazahabwa INDURGенсиYA zitabura kubasohozu mu ijuru.

2. Akaga kagera ku Bakristo banze guca ukubiri n'Ijambo ry'Imana, barahunga bibera mu misozi no mu mavumo, baba mu bidaturwa, batatanira hose, mu Bwongereza, mu Buhinde, mu Bushinwa, ndetse hanyuma bamwe bambuka inyanja bahungira muri Afrika yo hefo no muri Amerika ya ruguru.

Nubwo Imana yakundiye bamwe ko babaho, abenshi banyuze mu GIKOMBE CY'IGICUCU CY'URUPFU. Urugero ni ba bandi bihisha mu buvumo bwo mu Alps bishwe na Albert Kantano mu 1488 N.K (3000).

Ubundi bashingaga ibiti bisongoye bakabibambaho abo bitaga abahakanyi abandi bakabacagagura, bakabakerera abandi bakabashyiramo urutambi bakabajugunya mu muriro bagaturika. Abandi babacaga amaboko n'amaguru bagasiga igihimba gitereye aho. Abantu b'abanyamaboko bagondaga igiti, cyagera bugufi bagafata umuntu bakamuzirika ukuguru gishinze, amaboko bakayazirika kuri cya kindi baganze, maze bakakirekura kikamushibukana, igice kimwe kikagenda ikindi kigasigara ku giti gishinze, kikiri kizima. Urukiko rwo muri ESPAGNE rwatumye abantu 31.912 batwikwa bagashya bumva, 290.000 babagirira ibyamfura mbi barabanoza. Mu Buholandi ku ngoma ya CHARLES V hishwe abasaga 50.000, no ku ngoma y'umuhungu we hapfa abandi 25.000, abandi Badage n'Ababiligi basaga 50.000 babura ubugingo bazira kunyongwa; gutwikwa, no guhambwa babona.

Mu Bufaransa, ku muni wa Mutagatifu BARTOLOMAO, abanyedini b'i Roma barashega, muri iryo joro bica Abakristo 30.000. Amakuru yabyo ageze i Roma Abakaridinali baraterana bashaka kumva neza uko byagenze. Bamaze kubyumva ibyishimo birabasaba, bagirira Papa GREGOIRE XIII Tedeum y'Impundu. Ni igitekerezo kirekire kandi kibabaje bitavugwa. Bavuga yuko abazize itorero ry'i Roma barenga 50.000.000 ! Yohana yabonye yuko Malaya asinze Amaraso y'abahowe Yesu, aratangara! (Ibyahishuwe 17:6).

## AZIGIRA INAMA YO GUHINDURA IBIHE N'AMATEGEKO:

- A. **IBIHE:** mu Ruheburayo ni ZEMAN. Iryo risobanurwa ngo: Igihe cyashyizweho, cyategatswe. Iryo Jambo niryo bahinduye UMUNSI. Muri Danieli 2:16. Bigeranyaga na za Bibliya zo mu zindi ndimi. Imana yeretse Danieli yuko uwo mukuru w'itorero azigira inama yo guhindura ZEMAN s'ukuvuga ko azabikora ni ukubishaka. Guhindura ibihe cyangwa iminsi byashyizweho n'Imana ntibishoboka. Kubwo gushaka guhindura n'ibihe, hashyizweho **INGENGA-BIHE** (kalendali) isimburu iyahozeho mbere no mu gihe cya Yesu. **Mu kwezi kwa 10/1582 N.K** niho ubwo buhanuzi

bwasohoye butangirana n'iyi Kalendali dufite yitiriwe **Papa GREGOIRE, ikagira iminsi 365 na 1/4 isimbura iya Julien yatangiyeye muri 44 M.K ifite iminsi 360.**

**Kuba Yesu yaravutse agasanga iyo Kalendali iriho ntagire icyo ayinengaho, ikanahura n'ubuhungu, nuko ariyo yemewe n'Imana. Abantu baribeshya ariko Imana ntiyibeshya. Iyo kalendali ya Papa rero yatangiranye n'itariki 31/10/1582 N.K.** Bitari n'ibyo gusa, amasaha nayo arabiranga. Iyo ubajije umuntu isaha, uko bakubwira mu Kinyarwanda siko bivugika muzindi ndimi. Saa moya itandukanye na Sept heure.

- B. **AMATEGEKO:** Itorerero Gatorika ryigisha ko Abakristo badakwiriye kuruhuka umunsi w'Isabato, kandi ari umunsi wategetse n'Imana.

Ibyo biboneka muri **GATIKISIMU ISOBANUYE p.126 igice cya 2.**

Reba uko Abagatolika bavugaga kububasha bwa Papa n'Amategeko: "Papa afite ububasha bwo guhindura amategeko y'Imana ho hato, kuko ububasha bwe butari ubw'umuntu ahubwo ni ubw'Imana". **Prompta Bibliotheca, vol. VI, p.29.**

"Papa afite ububasha bwo gukuraho amategeko ya Yesu Kristo...ashobora kuyarenzaho, agatuma ibifutanye bibi bihinduka ibyiza bitunganye kubwo gufutura no guhindura amategeko". **God speaks to modern man, p.317.**

Gereranya amategeko y'Imana yanditswe muri Bibliya n'aya Gatolika uko yanditse muri Gatigisimu yabo, urebe aho bitandukaniye.

#### **Uretse n'ayo gusa yahinduye n'amategeko y'iminsi:**

Bibiliya iti: Umunsi utangira ni mugoroba **Itangiriro 1:5, 8, 13, 19, 23, 31; Abalewi 23:32.**

Gatolika iti: « Umunsi uzajya utangira saa sita z'ijoro ». Ibyo byatangiranye na Kalendali ya Papa Gregoire na none.

Bibiliya iti: "Umwaka ugira iminsi 360".PAPA ati: « ugira 365 n'amasaha atandatu (6 h), ndetse hazajya habaho umwaka udasanze rimwe mu myaka 4. Wari uzi ko mbere hose Kalendali itaratangira, buri gihe ku wa 25/12 habaga ari ku cyumweru (Dimanche).

#### **Bizarekerwa mu maboko ye kugeza aho ibihe, n'igihe n'igice cy'igihe bizashirira :**

Gereranya Danieli 7:25 (ibihe) na Danieli 12:7; Iyahishuwe 11:2, 3; 12:6, 14; 13:5-7. Iyo mirongo yose ivugaga iby'igihe kimwe.

**IGIHE** = Umwaka 1: Iminsi **360** (Iyahishuwe 12:14 na 12:6)

**IBIHE** = Imyaka 2: Iminsi **720**

**IGICE CY'IGIHE** = Amezi 6: iminsi **180**

**Byose bikaba Iminsi.....1260**

Mu buhanuzi umunsi ni **UMWAKA** (Kub.14:34 na Ezek.4:6)

Igihe n'ibihe n'igice cy'ibihe= Imyaka 1260.

Iyo myaka 1260 yatangiye ubwo ya mahembe 3 yari amaze gukurwaho, agasimburwa na VATICAN muri 538 N.K, Ubupapa bugategeka Iyobokamana n'Ubupolitike ku isi yose.

Iyo myaka yarangiye mu 1798 N.K ubwo Ubupapa bwakurwagaho na **NAPOLEON** w’umufaransa, PAPA PIO VI yaboshywe na BERTIER, akagwa muri gereza i **VALANCE**. Ni nacyo gihe Ubupapa bwamaze imyaka 131 bwaranyazwe icyubahiro, batanavugwa. Bigereranye n’Ibyahishuwe 13:3; 2 Tes.3,4.

**(26) Urubanza ruzashingwa:**

- Antikristo amaze kugaragara, Danieli 7:8b, 9a.
- Nyuma y’imyaka 1260 ,Danieli 7:25b,26.
- Abera batarahabwa Ubwami, Danieli 7:26, 27.

**Urwo rubanza rufite imyanya 3:**

1. Urushingwa n’Imana Yesu ataragaruka kurobanura Abera mu Babi
2. Uruzacibwa n’Abakiranutsi bari mu ijuru mu myaka 1.000.
3. Uruzacibwa n’Imana nyuma y’imyaka 1.000.

Bisome ukurikiranyije: Danieli 7:9, 10; Ibyahishuwe 20:4; Ibyahishuwe 20:11

**Umwanya wa Mbere w’Urubanza nurangira:**

- Kristo azahabwa Ubwami bwo mu Ijuru Danieli 7:13, 14. gereranya na Luka 19:12-15.
- Abera bazahabwa Ubwami butazahunguka, Danieli 7:27.
- Ihembe rito rizaba ryaranyazwe ububasha ryahoranye mu myaka 1260: ngo buzarimbuka kugeza imperuka. Ni ukuvuga imyaka 1000 irangiye.

**Umwanya uheruka nurangira:**

- Ubwami bw’Abera b’Imana buzaza kuri Iyi Si. Ibyahishuwe 21:2,3.
- Ibyaremwe byose bizahamya ko Imana Yera kandi Itabera, ariko ubuhanuzi buzasohora: Ibyahishuwe 5: 12-14; Abafilipi 2:10; Yesaya 45:23.
- Inkozi z’ibibi zizarimbuka buheriheri, Ibyahishuwe 21:2,3.
- Hazumvikana ijwi ngo” **Birarangiye**”. Ibizaba birangiye se ni ibiki? Ni iby’inama y’agakiza, intambara ya Satani n’Imana, urubanza rw’Imana.

\*\*\*\*\*

## **IGICE CYA MUNANI: (Danieli 8)**

Iri yerekwa ryabaye mu mwaka wa 3 umwami Berushazali agiye ku ngoma. Bitewe nuko uwo mwami atamaze umwaka ku ngoma, kuvuga ko hari mu mwaka wa 3 w'ingoma ye, ni ukuvuga uherye igihe yimye ingoma. Ni muri 537 M.K rero. Ubwami bwa BABULONI rero ntibuvugwa muri iki gice kuko bwari bwarahangutse.

Danieli yabonye imfizi y'intama ihagaze ku ruzi. Uruzi kuko rugirwa n'amazi nk'inyanja, rugereranya abantu benshi, amoko. Kuko ari ULAI ruri i Bumedi n'i Buperesi, bigereranya abantu bo muri ibyo bihugu Dan.8:20.

### **Ububabwari bw'Icyo gice:**

**(8:1): Umwaka wa 3 wa Berushazali:** muri 537 M.K.

**(8:2): Uruzi Ulai** ruba i Medi-Peresi. Si mu buhanuzi biri kuvugwa.

**(8:3): Imfizi y'intama:** Ubwami bwa Medi-Peresi.

**Amahembe 2:** ibyo bihugu byombi byishyize hamwe **Dan8:20:**

**Kuba nk'intama:** Ni uko amahembe yayo aba areba inyuma. Bigasobanura ko bwari bugiye guhanguka.

**Iryasumbaga irindi:** Ni Abaperesi barushaka Abamedi gukomera.

**(8:4): Yari ishyamye Yerekeye:** Ubwo Bwami bwagukaga bwerekeye:

- Iburengerazuba: I Lidia (547 M.K).
- Ikasikasi: i Babuloni (539 M.K). - Ikusi : mu Egiputa (525 M.K).

**Ntayindi nyamaswa yayihagaze imbere:** Nta Bwami bwashoboye gutsinda Abamedi-Peresi cyangwa kurwanirira ibyo bihugu uko ari bitatu.

**(8:5) Isekurume y'ihene:** Ubwami bw'Abagiriki (8:21).

**Idakoza amaguru hasi:** Bwigaruriye isi vuba cyane.

**Ikwira isi yose:** Butegeka isi yose.

**Ihembe rigaragara cyane:** Alexandre, umwami wabo wa mbere, (21b).

**(8:6): Itera ya mfizi y'intama:** Ubwo Bwami burwanya ba Bamedi-Peresi.

**Ifite imbaraga n'uburakari bukaze:** nta mpuhwe cyangwa kuvugana.

**(8:7): Iyivuna ya mahembe yombi:** Ubwo bwami bukuraho ba Bamedi n'Abaperesi

**Iyikubita hasi, irayisiribanga:** Burabatsinda, ntibongera kubyutsa umutwe.

(8:8):**Igira imbaraga nyinshi:** Burakomera.

**Ihembe rinini riravunika:** Umwami Alexandre arapfa.

**Hamera amahembe 4 mu cyimbo cyaryo:** Ubwami bwe babwigabanya ari bane: Seleukusi, Lisimakusi, Kasandeli, Ptolemy. Ongera ubisome ku rupapuro rwa p.30.

(8:9) **Kuri rimwe muri ayo mahembe:** Ku Bwami bumwe bwo muri ubwo bune, ni kubwa Seleukusi.

**Hashamikiraho agahembe gato:** Ako ko gatandukanye na ka kandi ko muri Dan.7:8.

Muri Dan 7:8: Havuga Roma Nkristo gusa (Ubupapa=Gatorika). Irya mbere rikomoka ku nyamaswa ya 4, naho iri rikomoka kuya 3. Irya mbere ryabonetse amahembe 10 amaze kugaragara. Imirongo 9,10 havuga Abakayisari b' i Roma. 10-12 havuga Roma Nkristo(Ubupapa).

**Karakura cyane Kaba rinini:** Nta bwami bwigeze gukomera nk'ubwa Roma; bwatwaje amahanga inkoni y'icyuma, bumaze kuyamena bushyiraho PAX ROMANA (Umusoro wabo).

**Ryerekerwa i kusi:** mu Egiputa kwa PTOLEMY (30 M.K).

**Ryerekerwa i burasirazuba:** Mu Burusiya kwa Seleukusi (65 M.K).

**Ryerekerwa mu gihugu gifite ubwiza:** I Buyuda ( mu gihugu gitemba amata n'ubuki) Kaizali yahahinduye intara y'ubwami bwe.

(8:10): **Rigere mu Ngabo zo mu Ijuru:** izo ngabo ni:

- a. Abakuru b'Abayuda n'abategetsi babo. Tuzi ko ubutegetsu bw'Abayuda bwagiye mu maboko y'ubwami bwa Roma, na Yesu agatambwa ku itegeko rya PILATO w'Umuroma.

Umurongo wa 23 havuga ko Ubwami bwa Roma bwatangiyeye ubwa ya Sekurume bugiye gushira. Niko byagenze kuko Roma yatangiye kubwa Seleukusi na Ptolemy, bushamikiye Kubwa Seleukusi. Roma yabanje kwigarurira i Makedoniya kwa Kasandeli na Lysimakusi (168 M.K), ikurikizaho aha Seleukusi (65 M.K) iherutsa aha Ptolemy (30 M.K).

- b. Abamalayika bo mu Ijuru. Ubupapa bwariyijije kugeza ubwo bwireshyeshya n'Abamalayika ngo busanga buhebuje bose. Soma mu gitabo cya Gatorika cyitwa **Prompta Bibliotheca, Vol. VI, P.2529**. Ingabo zimwe n'inyenyeri zimwe ribijugunywe hasi. Ingabo zajugunywe hasi ni Abamalayika, ubwo Ubupapa bwahamye ko bushobora kubaciraho iteka bukanabaca baramutse bacumuye cyangwa batekereje ukubiri. Ibyo nabyo biboneka muri icyo gitabo cyavuzwe haruguru. Inyenyeri ni Abakristo. Bajugunywe hasi ubwo bahigwaga bakicwa cyane kugera ubwo basaga miliyoni 50.

(8:11): **Ririkuza, ryireshyeshya n'Umugaba w'Ingabo:**

Bigereranye n'iby'AKANWA KAVUGA IBIKOMEYE n'ahavugaga ububasha bwa Papa n'Amategeko.

Hari n'amazina ya Yesu bihaye kwitwa: UMWAMI W'ABAMI, nyamara reba Ibyah. 19:16. Musenyeri (Monseigneur).

**Rimukuraho igitambo gihoraho:** Ubutambyi bwa Kristo babuhinduye ubusa kuri ubu buryo:

- Aho gutambira Imana mu izina rya Yesu, biyambaza Abatagatifu, ubwo rero bashyizeho abatambyi benshi mu Buturo Bwera bagahita bapfa kuko hatinjiramo abarenze umwe.
- Aho kubwira Imana yonyine ibyaha byabo ngo bejeshwe amaraso ya Kristo, babibwira Padiri.
- Ku magambo bihamiriza mu gitabo cyabo cyitwa **DIGNITY AND DUTIES OF THE PRIEST P.26 na THE HOLY SACRIFICE OF MASS P.42** n'ibindi...

## UKO RYAMUKUYEHO IGITAMBO GIHORAHU:

A. **Misa:** Igitambo cy'i Kalvari si impongano ihagije y'ibyaha. Ahubwo Kristo akwiriye gutambwa n'umusaserodoti buri muni mu buryo bw'igitambo cya Misa. Ukalistiya iyo imaze kwezwa n'Umusaserodoti kubw'amagambo avuga, Ihinduka umubiri w'Umwami wacu bwite, ugatambwa kuri Altali. Ni Kristo ubwe utambwa bundi bushya k'ubwapfuye n'Abazima.

Icyubahiro cy'Umusaserdoti kigaragarira ku bushobozi n'urutabi afite ku mubiri wa Kristo...Iyo amaze kwatura amagambo ya KONSECRATION, Kristo agomba kwishyira mu maboko ye...mu buryo bwa SAKRAMENTO. Bijya bidutangaza kumva ko Imana yumviye ijwi rya Yosua 10:14, igatuma izuba rihagarara...Ariko tujya dutangara kurutaho iyo twumvise ko, kubwo kumvira amagambo y'Abasaserodoti bayo bavugaga bati : **HOC EST CORPUS MEUM**, Imana imanukira mu ntoki, ikaza kuri Altali, ikajya aho bayishatse n'aho bayibwiye hose, ikishyira mu maboko yabo, naho ndetse baba abanzi bayo. N'icyo imaze kubazaho, isigara aho ngo bayigire uko bashatse. Bashobora kuyishyira aho bashatse, bakayikura hamwe bakayijyana ahandi, babishatse bakayikingira muri TABERNAKURO cyangwa kuyimurira kuri Altari, cyangwa kuyisohora mu Kiliziya, bashatse bakayirya inyama zayo cyangwa bakayigaburira abandi". Ibyo Byanditswe na Mutagatifu ALPHONSE de LIGUOR mu gitabo cya DIGNITY AND DUTIES OF PRIEST, P.25.

Mutagatifu AGUSTINO abimenye aratangira ati: "Mbega icyubahiro cy'Abasaserodoti! Mu biganza byabo harimo umumaro ungana n'uw'inda ya BIKIRA MARIYA Mutagatifu", ngo abe ariho ikibondo cyayo kibonera umubiri!

Kubw'ibyo Abasaserdoti bitwa ababyeyi ba Yesu Kristo, kandi rero twabita abaremyi ba Rurema kuko, kubw'amagambo yabo barema Yesu muri Sakramento ngo abone kuba gatozi yo gutambirwa Data Uhoraho. Nkuko byari bihagije ku Mana ubwo yaremushaga kuvuga...bikaba, niko bihagije ko Umusaserdoti avugaga ati: "HOC EST CORPUS MEUM, umutsima ukaba Atari umutsima, ahubwo ari umubiri wa Yesu Kristo, Mutagatifu Bernardine w'i SIENNA yaravuze ati: "Imbaraga z'Umusaserdoti nizo mbaraga z'ubumana, kuko guhindura umutsima mo umubiri bigomba imbaraga zihwanye n'izo kurema isi".(DIGNITY AND DUTIES OF THE PRIEST. P.32).

"Buri Musaserdoti atamba igitambo gihebuje, kandi icyo gitambo ni Umwana w'Intama w'Imana ikuraho ibyaha by'abari mu Isi(CATHOLIC DOCTRINE AS DEFINED BY THE COUNCIL OF TRENT, THE HOLY SACRIFICE OF THE MASS, P.54).

**Misa ntatagatifu igira umumaro uruta uw'Igitambo cy'i Kalvari, kuko kuza mu Misa bitwungura kuruta uko byari kutwungura iyo tuba i Kalvari ubwo Yesu yapfaga ' '(THE PEOPLES' MANUEL...THE HOLY SACRIFICE OF THE MASS P.42)**

*Nihagira uvuga ko igitamboya Misa....ari urwibutso gusa rw'igitambo cyatambwe k'umusaraba, Atari igitambo bwite cy'impongano, avumwe. Ibyo byategetswe na za nama za Kiliziya z'i TRENT.*

*Itorero ry'i Roma ryigisha ko bidahagije gutega amakiriro kuri Yesu Kristo. Ngo ni ngombwa kwitwara ku musaserdoti ngo atubere umuhuza n'Imana, anatubabarire ibyaha byacu.*

## SUZUMA IBI BYANDITSWE BY'IRYO TORERO:

“Igihe Umusaserdoti avuga ati: EGO TE ABSOLVO (Ndakubabariye) aba ari mu cyimbo cy'Umukiza ubwe. icyo Imana ibashishwa n'ubushobozi bw'ubumana bwayo, nicyo umusaserdoti ashobozwa no kuvuga ngo **EGO TE ABSOLVO APICATIS TUIS: Nkubabariye ibyaha byawe**”.(ALPHONSE de LIGUORE,...OP, CIT.P.34).

“ Isumbwe ry'Umusaserdoti riruta iry'Abamalayika, kuko nabo bubaha Abasaserdoti. Abamalayika bose bo mu Ijuru ntibashobora kubabarira umuntu icyaha na kimwe...Nubwo Abamalayika baba bahari, bakwiriye kurindira ko agaragaza ubushobozi bwe, kuko ari nta n'umwe mu Bamalayika ufite urufunguzo rwo gufunga cyangwa gufungura...”

Mutagatifu FRANCIS WA ASISE aravuga ati:” Ndamutse mbonye Malayika n'Umusaserdoti bahagaranyeye, nabanza kwicisha bugufi imbere y'Umusaserdoti, hanyuma nkabona kuramutsa Malayika (IBID.P.31).

Gereranya ibyo bishyira Umusaserdoti hagati y'umuntu n'Umukiza we n'iyi mirongo: Heb.4:14,16 , Ibyah.4:12, 1Tim.2:5, 1 Yoh.2:1, Zab.130:4 na Zab 32:5.

**Ubuturo bwera busenyuka:** ubwo buturo buvugwa ni umutima w'umuntu. Gusenyuka ni ukuvana ibyiringiro kuri Kristo.

Ubu imitima ya benshi yavuye kuri Kristo bayerekeza kuri Mariya, ku Batagatifu, ku bapfuye, ku ba Pasitoro no kubandi bantu. Ibyo byose byaturutse kuri Roma Nkristo yashyizeho akarengane n'Indulugensiya ngo abantu babyemere ku gahato cyangwa bahitemo gupfa. Ibyahishuwe 17:5,6

**(Dan.8:12): Iby'ukuri ribijugunya hasi: Ijambo ry'Imana (Bibiliya) ubwo bwami buyigira igitabo cyaciwe na kliziya, isimburwa na gatigisimu.**

**Rikajya ribasha ibyo rikambiriye:** Uko bashatse kwishyira hejuru, bakabyandika muri Gatigisimu akaba aribyo bigisha, kuko Bibiliya ibaciraho iteka.

( Dan 8:13): **Abera:** bahavugwa ni Abamalayika.

( Dan 8:14): **Iminsi 2300:** Ni imyaka 2300 (Kub.14:34 na Ezek.4:6).

**Ubuturo bwera bubone kwezwa:** Imitima y'abantu ibone kwakira ubutumwa bwiza bw'imiburo iheruka. Kristo abone gutangira guca imanza kuko ukuri kuzaba kwongeye kujya ahagaragara (Kweza Ubuturo bwo mu ijuru).

( Dan 8:15-26) :Danieli yarasobanuriwe uko iyo gahunda izakurikirana.

( Dan 8:24): **Imbaraga ntizizaba ari ize:** Si ubwo Bwami buzaba bwikoresha, ahubwo ni ikizaba cyabwihanzemo. Ni iza Satani.

***Azarimbura abakomeye n'ubwoko bw'Abera:*** Ubwo Bwami (Roma Mpagane) Bwishe benshi bashakaga kwigomeka.

***Urugero:*** Ku ngoma ya KAIZARI ADRIANE ubwo Abayuda bigomekaga, ntihishwe ab'Imana gusa hapfuye n'Abandi. Ngabo Abakomeye. Roma Nkristo nayo yahitanye abantu 50.000.000 basaga kuko banze kuyiyoboka. N'ubu twiteguye kuzapfamo abandi tutazemera kumanura ibendera ry'Imana SABATO, ngo tuzamure irya PAPAUTE ryashyizweho nyuma ku wa 7/3/321N.K ngubwo ubwoko bw'Abera. ( Dan 8:25): ***Azagira imigambi ituma abashishwa byose n'uburyarya:*** Azakora k'uburyo azagera kucyo yagambiriye, akoresheje uburiganya n'ubucakura. Ndetse azakoresha ibimenyetso bikomeye n'ibitangaza by'ibinyoma. Azaca bugufi yigire nka Malayika mwiza yizeze abantu ibitangaza, maze abanze kwemera ukuri ngo bakizwe, bazamufasha mu migambi ye (Mat.24:24; Rom.1:24-26; Reba n'Ibyah.13:13).

\*\*\*\*\*

## **IGICE CYA CYENDA: URUHEREREKANE RW'IMYAKA 2,300**

Mu gice cya 8 Danieli yeretswe ibiteye amatsiko (15), Gabrieli atumwa kubimusobanurira (16) byose arabirondora, ariko agiye kumusobanurira iby'Ubuturo Bwera (26) ararabirana amara iminsi arwaye, nuko Gabrieli asubira mu Ijuru atarabirangiza.

Danieli yamaze koroherwa, akomeza kubizirikana ariko ntiyamenya ubusobanuro bw'ibyerekeye Ubuturo Bwera. Yibwiraga ko Ubuturo Bwera ari Ubw'i Yerusalemu (9:16, 17), akibwira ko ya minsi 2300 igira ihuriro n'igihe bari bakwiriye kumara i Babuloni, ngo babone gusubira i Yerusalemu. Niko gushishikarira gusoma ubuhanuzi bwose bwerekeye ku bunyage bwabo uko bwanditswe muri Yeremiya, arabusoma asanga muri Yer.25:11; 29:10 ko Imana yari yarabageneye imyaka 70 bari i Babuloni, bakabona gusubira i Yerusalemu. Ubwo bagombaga kuzahava muri 535 M.K (605-70).

(9:1): ***Mu mwaka wa 1 wa Dario w'Umumedi:*** Ni muri 539 M.K.

(9:1-21): Danieli yarasomye ngo amenye igihe bazamara i Babuloni; arasenga, yatura ibyaha bacumuye, asaba imbabazi, maze Gaburieli agaruka kumusobanurira ibyari byasigaye bidasobanuwe.

9:22: ***Nzanywe no kukungura ubwenge:*** nzanywe no kuguhugura, no kugusobanurira.

9:23: ***Malayika amumenyesha ko yumviwe agitangira gusenga.***

9:24: ***Ibyumweru 70:*** Imyaka 490= (iminsi 490=70x7=imyaka dukurikije Ezek.4:6).

***Ubwoko bwa Danieli:*** Abayuda

***Umurwa wera:*** Yerusalemu

***Ibicumuro bicibwe:*** ibivugwa ni ibyahanurira bisohozwa mu Ijuru na Satani. Byaciwe rero ubwo yabuzwaga kuzongera kuhakandagira ajanywe no kurega (Ibyah.12:10; Yoh.12:31).

***Gukiranirwa gutangirwe impongano:*** Ibyaha bitangirwe igitambo gihoraho, kitari Intama cyangwa Inuma, n'ibindi...

***Haze Gukiranuka kw'Iteka:*** Kristo Gukiranuka kwacu yizerwe ubuziraherezo, ahore yeza abantu be.

***Ibyahanuwe bifatanishwe ikimenyetso:*** Ubuhanuzi n'amategeko byerekane uwo byasuraga. Imana itangire kuvuganira n'abayo mu kanwa k'Umwana wayo.

***Ahera hasigwe amavuta:*** Imitima y'abantu igaruke ku Mana (Yoh.12:32).

(9:25): ***Itegeko ryo gusana, Yeresalemu bayisana:*** Uhereye igihe bazatangira itegeko rigakurikizwa. Iryo ryatangizwe na ARTAZERUSI muri 457 M.K. rihita rikurikizwa (Ezira 7).

***Messia Umutware:*** Kristo Umwami. Yesu yabaye MESSIYA amaze kubatizwa, ijwi rimaze kumuhamya (Mat.3:16, 17). Yesu yabatijwe muri 27 N.K.

***Hazacamo ibyumweru 7:*** Imyaka 49 yo gusana Yerusalemu.

***Ibyumweru 62:*** Imyaka 434 yo gutegereza MESSIA.

**Bizakorwa mu bihe biruhije:** Bazahasana hari intambara y’abababuza gusana. Birebe uko byagenze muri Nehemiya 4:16-23.

(9:26): **Ibyumweru 62 nibishira, Messia azakurwaho:** Nyuma y’iminsi yo gutegereza Messia, ni ukuvuga nyuma y’imyaka 49 yo gusana, na 434 yo gutegereza, bikaba nyuma y’imyaka 483 kuva ku itegeko ryo gusana, Kristo azabambwa apfire k’umusaraba. Niko byagenze; nyuma ya 27 N.K, hagati mu cyumweru cya 70 niho yabambwe. Hari muri 31 N.K.

**Ntacyo azaba asigaranye cyangwa Atari kubwe:** Ntabwo azaba yizize ni koko kandi yapfuye nta cyaha yakozwe, nitwe yazize ngo dukizwe ibyaha byacu abidukujeho amaraso ye. Ibyaha byacu nibyo bamujijije.

**Abantu b’umutware uzaza bazarimbura, Ubuturo Bwera:** Ingabo za TITO (70 N.K) zizasenyaye Urusengero rwa Yerusalemu, Ubuturo Bwera buvugwa hano si imitima noneho; ni Urusengero rw’i Yerusalemu (Luka 21:20). Ibyo byabaye muri 70 N.K ku ngoma ya TITO.

**Iherezo rye ni nk’utembanywe n’uruzi:** uwo ntazamara igihe ku ngoma. Niko byanagenze ntiyatinze ku bwami.

**Intambara n’ibyago bizarinda bigeza imperuka:** Guhera icyo gihe intambara yo kurwanya abantu b’Imana ntizigera ishira kugeza ku kugaruka kwa Kristo. Ibyago bivugwa n’ingorane ku Bakristo biterwa n’abanzi b’Imana.

(9:27): **Uwo mutware azasezerana na benshi isezerano ry’icyumweru 1:**

- Umutware ni MESSIA (25) ariwe Yesu Kristo; isezerano ni ubutumwa bwiza bwo mu **Isezerano Rishya** kuva kuri Matayo kugeza ku Byahishuwe.
- **Rizamara icyumweru kimwe:** Ubwo butumwa bwabwiwe Abayuda mu myaka 7 ariyo minsi 7 y’icyumweru mu buhanuzi.


**Nikigera hagati, azabuzanya ibitambo n’amaturu:** Ubwo butumwa yabuvuze mu myaka itatu n’igice, maze arabambwa, arapfa, bukomeza kuvugwa mu Bayuda n’Intumwa ze. Ubwo yapfaga, umwenda ugabanyaye **AHERA** n’**AHERA CYANE** watabutsemo kabiri. Ibyo byagaragazaga ko umurimo w’ubutambyi mu isi urangiye, ko Kristo ariwe ubaye igitambo n’Umutambyi. Amaturu avugwa ni Kefa z’ifu, Isogi, Nyiragasogereza n’ibindi... (Luka 11:42).

**Umurimbuzi azaza ku ibaba ry’ibizira:** Satani azafatira aho azane ibirwanya gahunda y’Imana. Uko niko yabigenje: Yesu amaze kwerekana ko ariwe gitambo n’umutambyi, ubwo umwenda washwanyukaga, Satani yateje Abayuda kwongera kuwudoda, ntibemera ko Kristo yashohoye byose uko byakorerwaga mu Buturo Bwera.

**Kugeza imperuka yategetswe ko uburakari buzamusandazwaho:**


Ibyo bizira bizageza igihe isi izashirira, Satani, abo bafatanije n’abo yigaruriye batabwe mu muriro.

# ICYO NI IGISHUSHANYO CYEREKANA UKO IBYUMWERU 70 BYAGENZE



## Iki gishushanyo kirerekana uko imyaka 2300 yagenze

|                         |                    |       |       |        |                |
|-------------------------|--------------------|-------|-------|--------|----------------|
| <b>457M.K</b>           | <b>Imyaka 2300</b> |       |       |        | <b>1844N.K</b> |
|                         | 408 M.K            | 27N.K | 31N.K | 34 N.K |                |
| Imyaka 49               | imyaka 434         |       |       |        | Imyaka 1810    |
| Imyaka 7                |                    |       |       |        |                |
| Imyaka 490= ibyumweru 7 |                    |       |       |        |                |



**Ubuturo bwo mu ijuru buzezwa: Ahera hazasigwa amavuta:** Dan.8:14 Ngo Ubuturo buzezwa. Iryo jambo “ KWEZWA” Mu Ruheburayo ryanditswe ngo “TSADAD”: rigasobanura ngo ***gutsindishirizwa, Kugaragara ko ukiranuka, gusubizwa mu cyubahiro.***Reba uko ryahinduwe muri Yobu 11:2; Yes.43:9; ugereranye na Bibiliya y'Icyongereza.

Nkuko Ubuturo bwo mu Isi bwezwaga n'amaraso y'ihene yashushanyaga Kristo, ubuhumane bugashyirwa ku mutwe w'ihene (AZAZELI) yoherwaga yahushanyaga Satani, niko n'Ubuturo bwo mu ijuru buzezwa ubwo umugayo wose uzashyirwa ku mutwe wa Satani, ingabo zo mu ijuru zose zikamenya yuko inkomoko y'ibibi byose atari Imana ahubwo ko ari Satani.

Ubu Imana iri mu rubanza (mu maso y'abo mu ijuru bose) kubwo ibyo yakoze ubwo yacaga Satani mu Ijuru. Ubwo izatsindishirizwa rero Satani akagaragara yeruye ko ariwe nkomoko y'ibibi byose, nibwo amahoro adendeje azagaruka mu Ijuru. Ubuturo bwose bw'ibyo Imana yaremeye bukaba bwejejwe.

\*\*\*\*\*

## **IGICE CYA CUMI: iyerekwa ry'intambara zigeza imperuka**

- (1) *Mu mwaka wa 3 w'ingoma ya Kuro:* ni muri 537 M.K Danieli yihamiriza ko ibyo yabonye byamusobanukiye.
- (2) *Ibyumweru 3 by'akababaro ka Danieli,* abitewe no kudasobanuka k'ubuhanuzi. icyamubabaje ni imitima y'abantu be (Abayuda). Benshi banze gusohozza itegeko ryo gusana Yerusalemu, kubw'imitima yabo inangiye.
- (3) *Danieli yibabaje cyane atarya, atanywa* kubwo kwita ku Mana kubera ibicumuro by'ubwoko bwe. Yibwiraga ko Imana yongereye igihano kubw'ibicumuro byabo.

(4-9) *Havugwa uko Danieli yagiye mu iyerekwa,* abantu bari kumwe nawe bagahunga, bakamusiga wenyine; yabona ibyo yeretswe agacika intege akarabirana.

*Umugabo yabonye ni KRISTO ubwe (Ibyahishuwe 1 :13-15)*

(10-21) Hatubwira uko Danieli yasubizwagamo imbaraga ariko akongera akabura intege ataramara kubwirwa. Malayika yari azanywe no kumubwira ibizaba mu minsi y'imperuka, Umwami w'i Buperesi amutinzira iminsi 21 amubuza.

**Kumubuza kuvugwa:** Guhosha intambara Kuro yashakaga gushoza igihe cyagenwe kitaragera. Uwo wamubwiraga ibyo byose ni Nyiri kwa kuboko kwamubyukije (10). Ni Malayika rero si uwo mugabo yabonye. Uwafashaga uwo Malayika guhosha intambara ni MIKAYILE (**Mika:** Usa, **Eli:** Imana. Usa n' Imana ni Kristo) niwe Yesu Kristo.

### **Mbese dukurikije Danieli 10 Yesu yaje mu Isi kurwana na Kuro?**

Yaraje ariko intambara yarwanye si iy'iy'imiheto cyangwa amacumu (2Kor.10:4, 5). Soma Efeso 6:11,12.

Mme WHITE aragira ati: 'Ubwo Satani yashishikariraga gutuma abatware bo mu bwami bwa Medi-Peresi bagirira abantu b'Imana nabi, Abamalayika niba barengere abo banyagano, abo mu ijuru bose bakabizirikana babyitayeho cyane. Kubw'ubuhanuzi bwa Danieli, natwe twahawe kurabukwa kuri iyo ndwano ikomeye yabaye hagati y'imbaraga y'ibizaba n'iy'ibibi.

Ibyumweru 3 Gabrieli yakomeje gukirana n'ubushobozi bw'umwijima ashaka kugwabiza imigambi ya Satani yari yashyize mu mutima wa Kuro; ndetse iyo ntambara itarashira **Kristo** ubwe aza kumufasha. Gabrieli ati: "Umutware w'ubwami bw'i Buperesi yamaze iminsi 21 amubuza, nyuma Mikaeli, umwe wo mu Batware bakomeye aza kuntabara, ntinda mu Bami b'i Buperesi". Abo mu ijuru ntacyo basize batakoze ngo bahagarare ku bantu b'Imana, amaherezo baranesha, ingabo za Satani zikomwira mu nkokora iminsi yose ya Kuro n'iy'umuhungu we KAMBUSI wimye ingoma imyaka 7 n'igice. *Abahanuzi n'Abami, P.571, 572.*

Ariko intambara yari itararangira rwose, kandi ntizashira keretse Satani amaze gutsembwaho. Mu gice cya 11 Danieli yahishuriwe uburyo TSABA izakomeza kuramba kugeza ubwo MIKAELI ubwe azagoboka abantu be, akabahagararaho aje kubajyana mu Ijuru. Dan.12:1-3.

## **IGICE CYA CUMI NA RIMWE: uko izo intambara** **zizakurikirana**

Iki ni igice gitangaje cyane kuko kigaragaza kikanarondora iby'intambara nyinshi zajyaga kubaho hagati y'amahanga, zifite aho zihurira n'abantu b'Imana. Umurongo wa mbere uhera ku ngoma ya Medi-Peresi, maze igitekerezo kikagera muri 12:3, ubwo Mikaeli azarokora abantu be akabajyana ahatazaba TSABA ukundi.

### **1 - Uvugwa ni Malayika.**

- Icyatumaga afasha Dario no kumukomeza, nuko ariwe wahawe na Kuro kumutegekera i Babuloni aho Abayuda bari batuye. Dan.9:1.

### **2 *Hazima Abami 3 b'i Buperesi:*** Abazunguye Kuro ku Ngoma ni aba: KAMBUSI, SIMERDISI, DARIO I (w'Umuperesi).

**Uwa 4 azarusha abandi bose ubutunzi cyane:** uwo ni ZERUSI. Ni nawe witwaga AHASUERUSI n'Abayuda. Ubutunzi bw'uwo Mwami ukomeye bugaragarira muri Esiteri 1 :1-9. Uhasome witonze usome n'ibya TSABA yabaye ku Bayuda mu gihe cy'uwo Mwami muri Esiteri 3 :8-11.

**Azahagurutsa ingabo ze zose kurwanya ubwami bw'i Bugiriki :** yarabikoze koko abitewe nuko Abagiriki bari batangiye kubyutsa umutwe. Nyuma ye hakurikiyeho abandi bami 9 b'i Buperesi ariko b'abanyantegye nke. Zerusi niwe waherukije gutera Abagiriki.

### **3 *Hazima umwami ukomeye :*** Ni Alexandre wigaruriye isi, akarizwa nuko adashoboye kugera ku yandi masi ngo ayigarurire nayo.

**Azategekeshwa imbaraga nyinshi :** Iyibutse ko yoromeje ibihugu yihuta bitangaje, akarangiza urugendo rwa Km 18.000 mu myaka 8 gusa.

### **4 *Namara gukomera Ubwami bwe buzatagarana :*** Ubwami bwe nibumara gukomera, azapfa.

Niko byagenze, maze ubwami bwe bugabanywamo 4 n'abagaba b'ingabo ze.

**Ntibuzazungurwa n'urubyaro rwe :** Ishyari niryo ryamaze abo mu rubyaro rwe hamwe n'amakimbirane. Bamaze kwicwa hima ba ANTIGONIDI, na none Tsaba iracana, bigejeje muri 301 M.K intambara yabereye i PISUS ihesha abagaba be 4 kwigabanira ubwami.

**Ntibuzategekwa uko yari asanzwe abutegeka :** kuko we yabutegekaga bukubiye hamwe, abandi bakarinda kubwigabanya kane

### **5 *Umwami w'i Kusi azakomera :*** uwo ni Ptolemy (Egiputa ,i Kusi),

**Umwe wo mubataware be (ba Alexandre) azamurusha amaboko :** uwo warushije Ptolemy amaboko ni Seleukusi. Wibuke ko ariwe wari wikubiye intara za Kasanderi na Lysimakusi. Muri iki gice hari igitekerezo cy' amakimbirane n'intambara zabaye hagati y'Umwami w'i Kusi n'uw'i Kasikasi, kuko Abayuda baturaga hagati, maze izo ntambara n'amakimbirane bikabakoraho bibataye hagati.

### **6 *Nihashira imyaka bazuzura :*** abo ni Ptolemy na Seleukusi.

**Umukobwa w'Umwami w'i Kusi azasanga Umwami w'i Kasikasi kugirango abuzuze :** Uwo mukobwa ni BERENIKE mwene Ptolemy washyingiwe Antiokusi II. Ptolemy yabikoze azi ko bizabuzura.

**Ariko uwo mukobwa azabura imbaraga ze :** Ptolemy yamaze gutanga yigarurira umugore we wa mbere witwaga LAODIKE yirukana Berenike kuko yari amaze kumuharuruka.

**Umugabo nawe ntazahagarara ngo akomere :** Laodike amaze kugaruka ashaka uburyo yakwihorera kwirukanwa kwe, aroga uwo mugabo Antiokusi II.

**Uwo mukobwa azatanganwa n'abamuzanye :** Laodike amaze kwica umugabo we ahindukirira BERENIKE amwicishanya n'Abanyegiputa bamuzanye kwa Antiokusi II. Nguko uko inama ya Ptolemy yo kunga ubumwe n'Umwami w'i Kasikazi yagize amaherezo mabi. Aho guhosha amahane, TSABA irushaho kuba mbi y'ayo mahanga yombi.\

**(7-13)** Harondora intambara yateye hagati y'ayo mahanga yombi ; Umwami w'i Kusi n'uwo i Kasikazi.

**Uwo mu rubyaro rwe wakomotse ku gishyitsi cye (7) :** Ni umuvandimwe we bwite, Ptolemy EUGETE wahise akoranya ingabo akimara kwima akerekeza i Kasikazi ajanywe no guhorera mushiki we BERNIKE wari umaze kwicwa na Laodike muka Antiokusi II. Amaze kuhasiribanga, ajyana iminyago mu Egiputa, maze amara imyaka igera kuri 5 yigamba hejuru y'umwanzi we Seleukusi CALLINISI mwene Laodike.

**8)** Iminyago yatwaye twabonye uko yayitwaye, kugeza ubwo asahuye no mu nzu ya Seleukusi Callinisi, wasimbuye Antiokusi II.

**(10-11)** Abahungu ba Seleukusi bafata imigambi yo kurwanira ubwami bwa Se, bitegura kujya gutera umwami w'i Kusi. Uwo nyine Ptolemy PHILOPARTER wari ku ngoma nyuma ya Ptolemy EUGETE araterwa maze hagenda we. Egiputa yongeye gutsinda muri icyo ntambara y'i RAPHAIA yo muri 217 M.K.

**(12, 13)** Kubwo kutamenya Imana no kudasobanukirwa n'ubwibone bwe, Ptolemy wishimiye ko yatsinze, arihimbaza. Yari afite ingabo zikomeye impande zose, nyamara azira ubwenge buke bwe no kutibaza. Yazize gukiranirwa n'ubusinzi, abantu babonye uko yabaye ntibongera kumwitaho. Abibonye atyo ahita yiyahura, asiga ku Ngoma Ptolemy EPIPHANE.

Ibyo byafashije umwami w'i Kasikazi gutegura intambara yo kwongera gutera uw'i Kusi. Uwo mwami w'i Kasikazi arundanya benshi barimo Philipe umwami w'i Makedoniya wabagiriye inama yo kugabanya Egiputa abandi bami ngo bayigabane.

**14). icyo gihe benshi bazahagurutswa no kurwanya umwami w'ikusi:**

Tugeze mu gihe cya ANTIOKUSI EPIFANISI umwami wa 8 wo murubyaro rwa SELEUKUSI. Uwo yashatse gutera i Kusi kandi harishingiwe na Roma kuko bari bayitabaje, Roma yamubuza akayima amatwi maze igihe kimwe ateye Ubugiriki mu 197 M.K. Abaroma bararakara cyane bahita bamutera batsindira ku rugamba i MAGNESIA. Antiokusi ahunga i Siria nk'imbwa ihunze ishyize umurizo mu maguru. Kuva ubwo antiokusi yemera gutegekwa no gusuzugurwa n'Abaroma.

**Ab'inguguzi bo mu bwoko bwawe:** Ni Abayuda gito bemeye guhakana idini yabo bagashyira hamwe na Antiokusi Epiphanisi gusohozza ubupolitike.

**Bazahaguruka kugira ngo basohoze ibyerekanywe mu nzosi:** Ibyerekanywe ni ibi:

**IGIHORAHU** = igitambo cya buri munsu kizakurwaho n'ubuturo

Bwera busenyuke (Dan. 8:11-13).

Bati ubwo byahanuwe reka tubisohoze. Uko babikoze tubisanga muli ibi bitabo:

1 Makabe 1:7-25,41-64.

2 Makabe 6:1-11.

Yozefus: Antiquities II, vol.4

Wibuke iby'akarengane kageze ku bantu b'Imana bo mu Bayuda banze kudohoka muri icyo gihe cy'Akaga.

**(15) Umwami w'i Kasikazi azaza atere umudugudu ugoswe n'inkike:** Wibuke ko akarengane ka Antiokusi katangiye mu 168 M.K muri uwo mwaka niho Abaroma batsinze Abagiriki ku rugamba rw'i PYDNA, bakomeza kwigarurira ibihugu. Kuri izo mpamvu, noneho abami bajyaga baturuka i Kasikazi bazanywe no kurwanya ab'i Kusi ntibari bakiri aba Seleukusi ahubwo ni Abaroma. Ni umwami w' i Roma uvugwa muri uyu murongo wateye umurwa wa Yerusalemu muri 63 M.K amaze kuwuzenguruka no guhezamo abawurimo bose, bamaramo amezi 3 babona gutsinda.

**(16) Igihugu gifite ubwiza:** Ni Palestina. Muri icyo gihe nibwo ubwami bw'i Roma bwigaruriye Palestina.

**(17) Azikiranura n'umwami w'i Kusi :** Azamushyingira umukobwa we. Ubu buhanuzi buvugwa, buvuga ibyaga kuba ku ngoma ya KAISARI YULIUSI. Umukobwa uvugwa ni CLEOPATRE mwene

Ptolemy (izina ry'ubwami). Ugushyingirwa kuvugwa hano si uk'ukuri ; Kaisari ntiyamugize umugore we bwite. N'ubundi ngo icyo yabigiriye ni ukugirango azazanire ubwami bwa Egiputa kurimbuka. **Ariko imigambi ye ntizuzura ; ntabwo azahindura icyo gihugu:** Nubwo Cleopatre yasambanye na Kaisari, ntarakemera kuba umugore we kuko iyo abikora yari kuba amwihanye n'ubwami bwe. Se wa Cleopatre yamaze gupfa yari yaraze ubwami uwo mukobwa we.

**(18) Undi mutware azashyira iherezo ku gasuzuguro yabasuzuguraga:** uyu murongo uvuga iby'ubugome bwari kuzaduka mu bwami bwa Kaisari Yuliusi. Nkuko yajyaga asuzugura abandi bami bato bo mu bwami bwe niko hatangiye kuboneka hamwe na hamwe abantu bamugaruriye agasuzuguro ke, bati: 'Nkuko wadusuzuguye niko natwe tugusuzuguye. Ntabwo twemera ko udutegeka, ahubwo nitwe tugutegeka'. Ibyo byagaragaye cyane muri AZIA NTO, za Koloni za AFRIKA, no muri Espania.

**(19) Azahindukirira ibihome byo mu gihugu cye bwite:** Kubw'ibyo azasubira i ROMA iwabo abone kujya inama n'abatware be n'abagaba be baturaga i Roma mu bihome byaho, babone uburyo bazacubya amahane n'agasuzuguro.

**Ariko azasitara agwe ye kuzaboneka ukundi:** Ugusitara kuvugwa hano ni uko mu bupolitike. Kaisari yasubiye iwabo ashaka inama ku bayobozi yiringiraga, aba aribyo bimusitaza kuko bamuciriye igico bakamwica. Koko yaguye ubutazabyuka ukundi.

**(20) Bukeye hazahaguruka undi mu cyimbo cye:** Uwo ni OCTAVIUSI wahimbwe KAISARI AUGUSTO, wazunguye Yuliusi.

**Niwe uzohereza umukoresha w' ikoro mu gihugu gifite ubwiza:** Ibyo byasohoye Yesu agiye kuvuka. Ni nabyo byatumye Yosefu na Mariya baja i Beterehemu kandi atwite. Soma Luka 2:1-3; mu Kinyarwanda ngo bagiye kwandikwa. Mu cyoingereza ngo bagiye gutanga umusoro.

**Nihashira iminsi mike azarimbuka atazize uburakari cyangwa intambara:** Augusto yapfuye atazize ikindi keretse indwara gusa, amaze gusaza, afite imyaka 76 y'ubukuru. Muri iyo minsi ya TSABA, byari igitangaza ngo umwami apfe ashaje, atazize abanzi cyanga kwiyahura. Nicyo cyatumye ubuhanuzi bubyerura.

**21) Bukeye mu cyimbo cye hazahaguruka undi w'insuzugurwa:** Ubwo ni KAISARI TIBERIO, umuhungu w'umugore Augusto yacyuye. Byageze mu gihe cyo gutora uzasimbura Augusto ku ngoma amaze gutanga, uwo mugore asaba Kaisari ko aba Tiberio wo kumuzungura, undi aranga ngo ni insuzugurwa cyane, ngo ntakwiriye kwambara umuhemba w'i Roma. Kaizari ahera ko atora AGRIPPA, ariko kubwo kwihakirizwa Augusto amaze gupfa, Tiberio ahabwa kuzungura Augusto. Uko yabishoboye bigaragara mu buhanuzi bukurikiyeho.

**Azaza mu gihe cyo kwirara, azihesha igihugu kwihakirizwa kwe:** Igihe cyo kwirara ni PAX ROMANA. Nubwo amahoro yari yuzuye mu gihugu, mu Budage habaye amahane mu gihe Augusto yari ashaje, Tiberio agaba ingabo, ageze mu Budage ahaba intwari cyane aratsinda agaruka iwabo neza bituma Augusto apfa kumurambikaho ibiganza amuraga ubwami. Nubwo yabaye umwami ku izina ariko, ubuhanuzi ngo ntazahabwa icyubahiro cy'ubwami byamusohoyeho. Ntawamwubashye; ingeso ze za kabutindi zamunyaze icyubahiro mu maso ya rubanda bose, hanyuma ariyufura ava i Bwami i Roma ajya gutura ku kirwa cya KAPRI, amaherezo ye yicwa n' abantu ba LETA. Umwe muri abo bagabo yaravuze ati: "Uyu mugabo yasinze rimwe gusa mu kubaho kwe". Yashakaga kuvuga ko kuva yanywa agasinda atigeze asinduka arinda apfa.

**22) Ingabo zizatamba imbere ye nk'umwuzure, zimenagurike:** Aya magambo yerekeye intambara no gutsinda kwa TIBERIO.

**Ndetse n'umutware w'isezerano nawe ni uko:** Dan.9:27: Hahanura ko Yesu yagombaga gupfa ku ngoma ya KAISARI TIBERIO. Luka 3:1 hatubwira ko Yohana yatangiye kubwiriza ibya Yesu ku ngoma ya Tiberio, ubwo PONTIO PILATO yari umutegeka w'i Yudaya.

**23) Nibamara gusezerana nawe azamuriganya:** iri jambo GUSEZERANA NAWA rishobora gusobanurwa mu buryo 3:

1. Gusezerana n'abigishwa ba Yesu nawe, Nkuko Petero yabikoze amusezeranira ko atazamuhana na hato naho byageza gupfa, maze bakiri mu murima wa Getsemani ijamba rya kabiri rigasohora ngo: Azamuriganya, kuko Yesu yagambaniwe n'abatari mu ruhande rwe agafatwa n'abasirikare ba Kaisari Tiberio.
2. Gusezerana kw'Abayuda na Pilato bahamya ko ari ntawundi Mwami bashaka utari Tiberio (Yohana 14, 15); ukuriganya kuvugwa ni ukwa Pilato wemeye kubamba Yesu atariho urubanza (Mat.27:22-24).
3. Gusezerana kw'Abatambyi bakuru n'Abafarisayo na Pilato mu cyimbo cya Tiberio (Mat.27:62-28:6) bariganya Yesu mu ntekerezo z'abantu (Mat.28:11-15).

**Nubwo azaba afite abantu bake:** Abavugwa n'ingabo za Tiberio zari i Yerusalemu icyo gihe. Abenshi babaga i Kayisaria ahabaye umurwa mukuru mu gihe cy'ubutegetsi bwa KAISARI.

**24) Mu minsi yo kwirara:** ni ukuvuga mu gihe cya PAX ROMANA amaze kwiganzura hose, uretse mu Buyuda banganye n'aya mahanga bari batuye muri bo.

**Azatera ahantu harumbuka hose ho mu gihugu:** Kubw' amahane y'Abayuda muri 63 N.K KAISARI NERO yarabateye arimbura imirima, asaka amazu, atwika igihugu, ariko nta mudugudu yateye ubwe. Nubwo yigiriye inama yo gutera ibihome byabo bikomeye (24 b), ntiyabikoze, keretse muri 66 N.K.

**25) Ubu tugeze ku gihe agahenge gashize intambara zigiyeye gukomeza.** Kugeza k'umurongo wa 27 hatubwira ko bizaza mu buryarya. Abo bami bavugwa ni MARIKO ANTONI (i Kasikazi) na CLEOPATRE (umwamikazi w'i Kusi) bishyize hamwe bakarwanya Kaisari.

**28)** Kuko Abayuda uretse kugomera abanyamahanga, noneho bagomera n'ubutegetsi bw'i Roma, bituma Kaisari atuma CESTUS CALLUS umutegetsi w'i Busiria, gutera i Yerusalemu. Muri 66 M.K ingabo ze zigera ku nkike y'i Kasikazi h'urusengero. Zimaze kuhananirwa zirigendera, Abakristo babibonye batyo bamenya ko ubuhanuzi kwasohoye (Mat.24:15), nuko bariyarura barahunga, bajya ahitwa i Pella.

Muri uyu murongo wa 28 aya magambo ngo arakariye isezerano ryera agaragaza umutima Kaisari yari afitiye Abayuda, ariko bo babaye ubwoko bw'Imana bwatoranijwe kubw'isezerano ryera bari barasezeranye nayo. Aya ngo: maze asubire mu gihugu cye yasohoye ubwo ingabo ze zagiye zitigaruriye Yerusalemu.

**29) Mu minsi yategetswe:** uko iminsi yagenwe n'Imana. Bya byumweru 7 byari bigiye gushira. Muri 67 N.K VESPANIA yibasiye ibihugu byose by' i Buyuda, arimbura ibihome byaho, atsinda i Korazini, i Betsayida, i Kaperinawumu n'i Galilaya imidugudu yari yaramaze kwemera KRISTO ho MESSIA. Mu mwaka wa 69 N.K Vespasia ahabwa ingoma, aha umuhungu we gutwara mu cyimbo cye i Buyuda. Uwo rero niwe TITO.

**30) Inkuge z'i kitimu zizamutera:** Iyo ntambara yo hanyuma itazamera nk'iya mbere ( 29) niyo ivugwa muri uyu murongo wa 30. Uyu rero uratubwira ibyo muri 476 N.K ubwo Ababarobaro bateraga ubwami bwa Roma bakabwigabanya.

**“Kitimu”** isobanura impande zose n'ibirwa byose bya Mediteranne mu Ruheburayo. Abavandali bateye i Roma basahura imigi bakoresheje amato yabo menshi batururanye. Roma isigara mu bwigunge kuko nta bikoresho yari isigaranye. Ibyubahiro n'ubushobozi bya Roma mpagane bishirira aho.

Ubundi bwami buratangira aribwo bugereranywa n'IHEMBE RITO (7:8), burwanya abo Bavandali, ndetse n'Abaheruli n'Abostrogoti, bihinduka VATICAN. Umwami w'abami w'i Roma witwaga Yustiyani, amaze kwirukana Abavandali i Roma atinya kugera mu ngando zabo kuko ingabo z'i Roma zitari zigikomeye nka mbere. Inkunga yaje kumugeraho iturutse k'umukuru w'itorero ry'i Roma ngo ahashye rwose atsiratsize Abavandali n'utwabo, kuko uwo mukuru w'itorero yabitaga abanzi ba KRISTO bitewe nuko bakurikije Arius umukuru w'itorero ry'i Konstantinople wanze kwemera ko inyigisho n'imihango bya Gipagani byinjira mu itorero.

**Azasubirayo yitaye kubaretse isezerano:** Abo ni abakuru b'itorero Gatolika ry'i Roma bashyize iruhande ivanjili (ubutumwa) ya Yesu Kristo bakagira Bibiliya igitabo cyaciwe na KILIZIYA GATOLIKA.

Kubwo kurwanya Abavandali n'abandi bose nkabo, Yustiniani atanga itegeko rikomeye ngo: UMUKURU W'ITORERO RY'I ROMA ABAYE UMUTWE W'ITORERO KU ISI YOSE, NI UMUCAMANZA UTAVUGURUZA. Nguko uko muri 538 N.K hatangiye ububasha bwa Gipapa bw'i Roma, Ubuhanuzi buruzura, Isi itangira kwinjira mu mwijima wo mu myaka yo hagati (**Moyen Age**).

**31) Azahagurutsa ingabo ze zonone ubuturo bwera n'igihome:** Tuvuye kuri Roma mpagane tugeze ku bupapa. Umujyi wa Roma wari warasahuwe n'icyo gihome, umurwa mukuru wari warashyizwe i Konstantinople. Umukuru w'itorero ry'i Roma yishyira mu rwego rw'Abapapa (data) yishingikirije k'ububasha bw'abagaba b'ingabo no ku ngabo ngo bamufashe gushyiraho ubwami bwagombaga gutwara isi yose mu myaka 1260. Abo bagaba n'izo ngabo bakoresheya muri ubwo buryo.

**Ubuturo bwera:** buvugwa hano ni imitima y'abantu yashenye no gushyiraho ikizira cy'umurimbuzi (inyigisho zipfuye) aribyo kurwanya Ukuri nyakuri kwa Kristo. Ibuka ibyanditswe imbere ( uko bamukuyeho igitambo gihoraho).

**Bakureho igitambo gihoraho:** Iri jambo ntiribamo. Mu gifaransa (Commentaire de Daniel.8:11) baraduhakanira. Havugwa gusa « IGIHORAHO » (le perpétuel ou le continuel) bisobanura inkunga y'Imana. Impamvu yo gukuraho igihoraho ni ukugira ngo bategure inzira y'ikizira cy'umurimbuzi. Ubwo ni ukuvuga ko icyatumye babuza abantu gutega amakiriro kuri Kristo gusa bashakaga uburyo inyigisho zabo zizashyigikirwa zikemerwa. Ingabo nizo zasimbuye IGIHORAHO.

**Bashyiraho ikizira cy'umurimbuzi:** ni inyigisho zashyizweho zigahabwa kubahirizwa ku ngufu, zigatera abantu : aho kwiringira inkunga y'Imana, biringira imbaraga za gisirikare, aho kwishingikiriza ku Mana bishingikiriza ku bantu. Nyamara soma iyi mirongo wiyumvire uko bihabanye n'ukuri : Yes.2 :22 ; 51 :12,13 ; Yereimiya 17 :5,6.

**32. Abaca mu isezerano azabayobesha kubashyeshyenga :** Turebe uburyo butandukanye bwo gushyeshyenga yakoresheje :

1. Abapapa batangira kwigana Bibiliya bakurikije ubushake bwa gipagane.
2. Kugirango babone abayoboke benshi, inyigisho za Bibiliya bazitesha agaciro bongeramo ibishyigikira abapagane. Gusenga ibigirwamana byinjira mu itorero rya gikristo, itegeko rya kabiri mu mategeko 10 y'Imana rivaho imbonankubone. Kugira ngo bahishe icyo cyaha, itegeko rya 10 barigabanyamo kabiri ngo buzuze uwo mubare w'amategeko 10 nk'uko Bibiliya ibivuga.
3. Isabato y'ukuri, urwibutso rw'irema, ishyirwa buhoro buhoro iruhande isimburwa umunsi wa mbere (Dimanche), uwo basengagaho izuba, Ikimenyetso cy'ubutegetsu bwo mu ijuru kigizwayo gityo.

4. bavuga ko BIBILIA YERA itagomba gusomwa na bese, ngo irakomeye kuyisobanukirwa, ko abayobozi bakuru bonyine aribo bazajya bayigisha, bakanayihindura. Muri ubwo buryo Umwuka w'Imana wera bawupfobya mu ibanga.
5. Inyigisho zipfuye zihamya ko abapfuye baba badapfuye rwose, zatanze urwaho rwo kwiambaza BIKIRA MARIYA N'ABATAGATIFU. Kubw'ibyo abantu bakura amaso kuri Kristo, Umuhuza wacu wenyine n'Imana. Uwo tuboneramo agakiza n'imbabazi, bayahanga ku bantu bakora ibyaha nkabo.
6. Papa n'abakuru b'itorero bihaye uruhushya rwo kubabarira ibyaha, icyo Kristo wenyine ashobora gukora. Abantu bayoborwa ku kwishingikiriza ku mirimo yabo bwite ngo babone agakiza, aho kwishingikiriza gusa ku gukiranuka no ku gakiza kazanywe n'Umwana w'Imana.
7. Ukwigenga muby'iyobokamana bikurwaho. Abantu batemeye kwigisha ukwizera badashobora guhamya, bahanishwa igifungo, kugirirwa nabi no kwicwa, bihitana ibihumbi byinshi by'abantu bakinishaga kwigisha ko Kristo ariwe Mucunguzi wenyine.

Abazaca mu isezerano bavugwa ni abemeye ko inyigisho za papa ari ukuri bakirengagiza isezerano ry'Imana Bibiliya.

**Abazi Imana bazakora iby'ubutwari:** Nubwo byagenze gutyo, hirya no hino hasigaye abishingikirije ku Mana gusa. Umwami Yesu yakomeje kugira impande zose no mu bihe byose abigishwa n'intumwa bamukoreraga uko bikwirye. Twavugaga nk'ABAVODOIS b'i PIEMONT bahagarariye umucyo kugirango natwe tumurikirwe, BEMERA KWICWA ariko ukuri ntikwazimangana.

**33. Abanyabwenge bo mu bantu bazigisha benshi:** Ni abubaha Imana by'ukuri (Imigani 1:7 na Yobu 28:28) bigishije benshi kugeza ubu, uhaye mu gihe cy'ubutegetsi bwa gipapa mu myaka 1260. Hazaba igihe kirekire bicwe n'inkota n'umuriro bajyanwe ari imbohe, bagiye bafatwa na Roma icyo gihe cy'umwijima, niko byabagendekeye, baratwitswe, bicishwa inkota, bicishwa inzara, bafungirwe muri za gereza zikomeye cyane, aho umwana arira nyina ntiyumve.

**34. Ni bagwa muri ibyo byago bazabona gufashwa :** ni koko. Amakimbirane amaze guhagarara, hari mu 1798 N.K abavugiraga Imana bifashishije ku bihugu baturukamo. Aho kujyanwa n'imari yabo ngo bamamaze ubutumwa bwa Kristo ukuri gusakare, bagategereza inkunga ya leta bituma ubutumwa bunigwa. Rimwe na rimwe inkunga bakayihabwa ubundi bakayibura kubera kwikanyiza kw'ubutegetsi.

**Benshi bazifatanya nabo babaryarya :** Nubwo ibyo bihugu byabafashaga ariko s'uko bari bifatanije nabo. Bigereranye n'igihe cya FILADELIFIYA.

**35.** Haratugaragariza impamvu Imana yemera ko abantu bayo banyura mu karengane n'umubabaro. Wibuke Rom.8 :28 ; 2 Tim. 3 :12.

**36. Uwo mwami azakora uko ashatse yigire munini, yishyire hejuru ngo asumbe byose :** uwo ni umwami (Umukuru w'itorero ry'i Roma) uvugwa wagombaga kwikuza mu cyimbo cy'Imana. Reba uko yabikoze mu nyandiko zabanje (p 31-p38).

**Azavuga ibikomeye bisuzuguzwa Imana nyamana :** reba nanone muri izo nyandiko zabanje.

**Azishyira yizane kugeza aho uburakari buzasohorera :** imyigishirize yabo ntizigera ivaho (irekwa) kugeza ubwo Kristo azagarukira, akabarimbura akajyana abera be. (2 Tes.2 :8). Soma guhera 2 :3-12.

**37. Uwo mwami ntazita ku Mana za Basekuruza:** Ntazakorera Imana ngo aiyoboke, kandi ntazakorera ibigirwamana by'abapagane. **Cyangwa ku gushaka abagore:** kutarongora kw'Abasaserdoti niho bikomoka.

**38. Azubaha imana y'ibihome :** IBIHOME bisobanura we n'Inkike:

-Inyubako nini cyane.

- Umutima w'impaka no kwishyira hejuru (2 Kor.10:4, 5).

Imana azayisimbuza imyubakire minini ( KILIZIYA n'ibikari byazo) n'ibitekerezo by'abantu benshi bahuriye hamwe gupinga ukuri kw'Imana BIBILIYA (ngo:"*la raison du plus fort est toujours la meilleure*"). Ibuka rero iby'inzi ngari (Mat. 7:13, 14).

**Azayubahisha izahabu, ifeza n'amabuye y'igicro n'icyubahiro:**

a. izo nyubako azazitaka kuburyo bukomeye akoresheje amabuye y'agaciro kenshi, atakemo ibintu by'igikundiro. Garura amaso yawe kuri Kiliziya n'amashusho arimo cyane cyane ibibumbano by'amashusho ya Bikira-Mariya.

b. Ibyo bitekerezo by'abantu azabashimangiza guhabwa icyubahiro (Zahabu), guhabwa amafaranga y'imfashanyo (ifeza) n'imyanya mu nzego z'ubutegetsi.( agaciro kenshi).

**39. Azaneshya ibihome birusha ibindi gukomera:**

a. Azagira impaka zizatera ubwoba, bitume iz'abandi zitagira uzitega amatwi kubw'ibyo bitatu azazishimangiza.

b. Mu Ruheburayo ngo :'' Azarundukira mu bihome birusha ibindi gukomera''. Ibyo ni imyubakire myinshi kandi minini ya za Kiliziya na za Missioni zabo zizengurutse n'inkike.

**40. Mu gihe cy'Imperuka:** Si imperuka y'ibihe. Hari itandukaniro hagati y'igihe cy'imperuka n'imperuka y'ibihe:

Igihe cy'Imperuka= Iminsi y'imperuka

Imperuka y'igihe=Umunsi w'Imperuka

Igihe cy'imperuka cyatangiyeye imyaka 2300 irangiye. Ni uguhera mu 1844 N.K kugeza umunsi w'Imperuka.

***Umwami w'ikusi azamutera :*** Nubwo bitarasohora byose ibyo muri uyu murongo, ariko ntitubura kubigenekereza ngo dutegereze tuzarebe uko bizasohora.

Umwami uzaterwa ni umukuru w'itorero ry'i Roma (ubupapa). Uزامutera ni Ubutumwa bwiza bw'imiburo iheruka buzaturuka mu bihugu byo hepfo ( Africa, Amerika) *bwerekana ikimenyetso cy'inyamaswa n'imigambi yayo.*

***Umwami w'i Kasikazi azamutera Ameze nka Serwakira :*** Ubupapa buzawanyabavugaga iyo miburo byihutirwa, bwitabaje abantu benshi maze hacike icyuho.

***Azanye amagare n'amafarashi n'inkuge nyinshi atere ibihugu :*** Muri icyo ntambara hazakoreshezwamo intwari z'ubwoko butari bumwe, aribwo bugeranywaga n'amagare, inkuge n'amafarashi. Ntabwo ari muri Egiputa gusa ahubwo bizagera hose.

***Abisandaremo nk'umwuzure w'amazi:*** Azagarurira aho hantu ku buryo budatinze, kandi azabatera ubwoba kugeza ubwo bazatinyarukwaga kuvuza icyo miburo.

***41. Agere mu gihugu gifite ubwiza:*** Intambara izagera no muri Palestina, kugirango bayoboke papa.

***Benshi bazatikizwa:*** birumvikana ko hazapfaga benshi kuko bazabaga bazi Imana ya basekuruzaga, ntibayinamukeho; bitewe nuko Bibiliya izahabwaga akato muri icyo gihe, bo ntibayitezukeho kuko na mbere hose bamenye icyo Imana ibashakaho babirebeye mu mizungu.

***Abanyedomu, Abamoabu n'imfura z'Abamoni bazamurokoka:*** Ayo moko yose ni banyamujya icyo bigiye. Icyo bapfaga ni ukubaho, batagira aho babogamiye. Urushije undi ubushobozi niwe bemera, batarebye niba ari mu kuri cyangwa icyo azabagezaho. Impamvu rero nuko bazumvaga ko ubupapa bwari koroze, bati: icyo dupfaga ni ukutagerwaho n'akarengane. Ntibazazuyaza rero kumwumvira.

***42. N'igihugu cya Egiputa ntikizamurokoka:*** Impamvu aricyo kivugwaga nuko aricyo cyemera imana zacyo gusa nticyemere izahandi. Nubwo bimeze bityo bwose, bazabacicaho bayoboke imana y'ibihome yo kwa Papa.

***43. Ngo ibintu by'igiciro cyinshi bya Egiputa azabyigarurira.***

***Abalibiya n'Abanyetiyoziya bazamushagaga:*** Aho niho Abisilamu biganjaga cyane. Abo basanzwe bumvira ubutegetsi kuruta Imana. Icyo gihe nikigera rero bazakirana ubupapa umutima ukunze, kuko aribwo buzababushakaga intebe y'ubwami kw'Isi nkukobahoze mu myaka 1260. Ibyo nibyo bivugwaga mu Byahishuwe 13:11-18;17:8,11.

***44. Inkuru zivuye Iburasirazuba n'i Kasikazi zizamuhagarika umutima:*** Kuko Amerika izabayateye ubupapa inkunga, kandi ubupapa bugashakaga gutegeka isi, Uburusiya n'ibihugu bimwe by'Aziya n'Uburayi ntibizabyemera bitewe nuko bazavugaga ko ari Amerika izababateye bitume bihagararaho. Biramenyerewe ko Amerika n'Uburusiya aribwo bihanganye ku isi mu ntambara. Impamvu azagira umutima uhagaze nuko ibyo azabayaraserezanyaga n'Amerika bizakomwaga mu nkokora n'Uburusiya.

**Aveyo arakaye azanywe no kurimbura:** Ubwo azahindukira ahere inyuma n'abari basigaye ndetse n'abigeze kumwihakana abihimureho, ashyireho n'itegeko ryo kwica abazaba bafunzwe muri Prison ku itariki runaka.

Ubwo nibwo tuzaba twiteguye Kristo uzahagarika iyo ntambara kubwo kuza kwe ko ku bicu, tutarapfa. Niba mushaka kubimenya, ngaho ahazava abantu 144.000 (Ibyahishuwe 7:4) batazasogongera ku rupfu. Muri iyo ntambara nimo za nzige zo mu Byah.9:3-5 zizakora umurimo wazo.

**45. Azabamba amahema y'ubwami hagati y'inyanja n'umusozi wera:** Inyanja ni Mediterrane umusozi wera ni Yerusalemu. Urabyemezwa na Zekariya 8:3, Yes.66:20, Yoeli 3:17. Dukurikije ubu buhanuzi, igihe kizaza papa ashingure intebe ye i Roma, aje kuyishinga muri Palestina. Birashoboka ko azabiterwa n'abamwanga bazaba bavuye mu bihugu by'Abakoministi. Reba uko byanditswe mu igazeti yitwa ***THE CONVERTED CATHOLIC 2/1947: "The rapid increase of anti-clericalism in Italy may result in an effort to chase the pope out of Rome"***. Nyamara ngo bizaba bimurangiranye. Bishoboka ko azahazanwa nuko ku ntebe ye hacuze Umwijima (Ibyahishuwe 16:10).

\*\*\*\*\*

## **IGICE CYA CUMI NA KABIRI:AKAZAKURIKIRA INTAMBARA**

Igice cya 11 cyose kugeza 12:3 havuga gahunda y'intambara ziheruka. Igice cya 12:4-13 hari umusozo uvuga ibyahishuwe n'ibizahishurwa n'igihe bizahishurirwa.

1. **Maze icyo gihe Mikaeli...azahaguruka:** Mika= Usa, Eli= Imana. Mugihe papa azimuka i Roma hazaba ari intambara ikomeye izahitana benshi. Iyo TSABA izaba ishaka abana b'Imana. Nibwo usa n'Imana (Mikaeli) Yesu Kristo azagaruka muri iyi Si, azanywe no kugoboka abe.  
**Nuko icyo gihe abantu bawe...bazarokorwa:** Abantu ba Danieli ni abubaha Imana yo mu Ijuru. Kuri Danieli byari bishyize kera koko, ariko kuri twebwe ni hafi cyane.
2. **Benshi bazaba barasinziriye...bazakanguka:** Ku muzuko wa mbere. **Bamwe bazakangukira ubugingo buhoraho:** Havugwa bamwe kuko mu bantu ba Danieli harimo n'abo ku ivuko (Abayuda) abazazukira ubugingo ni abizeye Kristo bakamunambaho. **Abandi bazazukira gukorwa n'isoni:** Ni ba Bayuda bihakanye Yesu bakamwica (Ibyah.1:7)
3. **Abanyabwenge bazarabagirana:** Abubaha Imana bazahabwa ubwiza. Mbifuriye mwese kuzarabagirana ubwo Kristo azagaruka.

**Abahinduliye benshi ubukiranutsi bazaka nk'inzenyeri:** Abagize abo bagezaho ubutumwa nabo bazahabwa kurabagirana. Kora uko ushoboye we kuzaburamo.

4. **Bumba igitabo:** ntushake kwibwira ko ubisobanukirwa, ntiwirushye ngo urabisobanuzi. **Ugifatanishe ubushishi:** He kugira undi ucyumva.  
**Kugeza igihe cy'Imperuka:** kugeza mu gihe cy'urubanza (Laodokia) 1798. **Benshi bazajajajara hirya no hino:**  
- Muri Bibiliya ngo babone gusobanukirwa n'ubwo buhanuzi. -  
Mu ngendo kubera imodoka, indege bizaba byaravumbuwe.  
**Ubwenge buzagwira:** -Bwo gusobanukirwa Bibiliya,  
-Bwo kuvumbura ibikoreshe by'ubwoko bwinshi.

**(5,6) Danieli yabajije igihe bizamenyekanira n'aho bizagarukira.**

**7) Igihe n'ibihe n'igice cy'igihe:** Iminsi 1260=Imyaka 1260. Nibamara kumenagura imbaraga z'Abera.

**(8,9) Danieli amaze kubaza amenyeshwa ko atari ibye kubimenya kuko atari mu gihe cy'imperuka kandi byo ari ibyaho.**

**(10) Danieli yabwiwe ko hazabanza urubanza rwo kurobanura ababi n'abeza; kandi ko abubaha Imana (Abanyabwenge- Yobu 28:28) bazabisobanukirwa.**

**(11) Uhereye igihe igitambo gihoraho kizakurirwaho:** Uhereye igihe igitambo cy'i Kalvali kizatangirira gupfobywa, ubwo bazategekera gukura amaso kuri Kristo bakayerekeza kuri

Mariya no ku Batagatifu. Ibyo byatangiye muri 508 N.K bashyiraho umugabe-kazi wagombaga gusimbura Babel= ukwezi kubw'abapagane binjiye mu itorero bagatera amahane.

**Bagashyiraho ikizira cy'umurimbuzi:** Bakigisha gutega amakiriro kuri Mariya no ku Batagatifu, aho kuyahanga kuri Kristo. Hazacaho iminsi 1290: (imyaka 1290) Ubwo ni ukuvuga umunyabugome ahishuwe (2Tes.2:3,4). Uruguma rwica rugeze. Ubupapa bukomwa mu nkokora.

**(12) Hahirwa uzategereza akageza iminsi 1335:** 508N.K+1335=1843.

- Amahirwe ni ayo gusobanukirwa n'ibyahanuwe, bakumva imiburo iheruka bakanamenya no kubara ibimenyetso bikurikirana.
- Kutazongera kuyobya n'abigisha batagira icyo basubirisha ikibazo kibajijwe, ngo bapfunyikirwe amazi ngo bicecekwe.
- Kureba ibyo abantu bategereje bagasinzira batarabibona.
- Kubumburwa kwa cya gitabo Danieli yabwiwe kubumba.
- Kubara imyaka ukamenya aho igihe kigeze.

**13. Igendere Danieli utegereze imperuka kuko uzaruhuka:** Ntabwo yabwiwe ko azategereza kugeza mu minsi y'imperuka, ni ukugeza ku munsu w'imperuka. Ntiyari gutegereza ku isi ari muzima kugeza k'umunsu w'imperuka, ni mu gitaka yategereje kuzageza kumuzuko wa mbere. Ntabwo yigeze amenya iby'ubuhanuzi, kandi ntazabumenya keretse amaze kuzuka (1Petro 1:12).

**Uzahagarara mu mugabane wawe:** Mu migabane ibiri ivugwa muri Dan.12:2. Azahagarara mu mugabane w'abazazukira ubugingo buhoraho.

**Iyo minsi nishira:** ni iminsi 1335 cyangwa imyaka 1335. Nishira urubanza ruzatangira ube mu mugabane wawe. Iyo myaka yashiranye n' i 1843. Urubanza rutangira mu 1844 N.K ruherereye mu basinziriye.

***Agatabo karabumbutse, ibyari ibihishwe byabaye ibyahishuwe."Ibihishwe ni iby'Uwiteka Imana yacu, ariko ibyahishuwe ni ibyacu n'urubyaro rwacu iteka, kugira ngo twumvire amagambo yose y'amategako". (Guteg.29:29)***

**IMANA IDUHE GUSOBANUKIRWA NO KUBASHA GUSOHOZA IBYO IDUSHAKAHO, NIBYO MBIFURIJE KANDI MBASABIRA, NANJYE NISABIRA MU IZINA RYA YESU KRISTO UMWAMI WACU. AMEN!**

\*\*\*\*\*